

**ASO LUA, 30 IUNI 2020**

*Na nofoia e le Fofoga Fetalai le Nofoa i le itula e 9:12 i le taeao.*

Tatalo.

**FOFOGA FETALAI:** Ou te faasilasila atu ua toe amatalia Taulumaga ma Galuega a le Fono Aoaio Faitulafono.

Malo le soifua i lenei taeao fou malo le tauatai.

**TUUINA ATU O LIPOTI A KOMITI FAA-PALEMENE**

*Na tolaulauina e le Failautusi le faasologa o Lipoti a Komiti Faa-Palemene e tusa ai ma T.T.52(5).*

1. P.P.2020/2021 Nu.26, Lipoti a le Komiti o Tulaga Aloaia ma Amio Taualoa i le Lipoti a le Komiti o Tupe Maua ma Tupe Totogi e faatatau i le Mataupu a le sui usufono mo Gagaifomauga Nu.3.

**TULAFONO TAU FAAOFI O TEUTEUGA ESEESE (AIAIGA O TOTOGI INA UA FAAMALOLO LE TUMAU MAI GALUEGA) 2020 – faitauga muamua**

**FOFOGA FETALAI:** Ma lou faaaloalo ou te tapa lau Afioga i le Palemia.

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI (Palemia):** Lau Afioga i le Fofoga Fetalai, tatou te auai faatasi i le viiga ma le faafetai na siitia e lau Afioga i le tatalo e viia ai lo tatou Matai Sili i le toe taitaiina mai o le Maota nei i le soifua lelei ma le lagi e mama.

Ou te tulai atu e faatu le lafo, *Ina ia faitauina nei le Tulafono Tau Faaofi o Teuteuga Eseese (Aiaiga o Totogi ina ua faamalolo le tumau mai le Galuega) 2020 i lona faitauga muamua.*

*Faaluaia e le Minisita mo Pisinisi, Alamanuia ma Leipa.*

*Na faamaonia le lafo ma faitauina le Tulafono Tau Faaofi i lona faitauga muamua.*

**TULAFONO TAU FAAOFI O LE VAEGA O FAATOAGA MA  
FAIGA FAIVA 2019 - iloiloga auiliili**

**FOFOGA FETALAI:** E tusa ai ma Tulafono Tumau e ao ona faamaonia muamua e le Fono Aoa le Lipoti a le Komiti i le Tulafono Tau Faaofi ona avanoa ai lea mo le iloiloga auiliili.

Ou te tapa lau Afioga i le Taitaifono o le Komiti o le Vaega tau le Tamaoaiga lau Tofa i le Igoamatua Lauofo Fonotoe.

**Tofa Hon LAUOFO FONOTOE NUAFESILI PIERRE LAUOFO (Taitaifono o le Komiti o Vaega tau le Tamaoaiga):** Faafetai i lau afioga i le Fofoga Fetalai. E faatalofa atu foi ma ofo alofa atu i lenei taeao fou i lau Afioga i le Fofoga Fetalai faapea foi le Afioga i le Palemia ma le Kapeneta, ma lena Itu o le Maota faapea foi le afifio atu o afioga i Taitaifono ma Sui Taitaifono ma sui usufono mamalu o lenei itu o le Maota, e faapea foi le faafogafoga tapuai mai o Samoa.

Ae ua ou tulai ma le agaga faaaloalo e faatu le lafo, *Ina ia faamaonia e le Fono Aoa le Lipoti a le Komiti o lo o fautuaina ai ina ia faagasolo le Tulafono Tau Faaofi o le Vaega o Faatoaga ma Faiga Faiva 2019 faatasi ma Faasaoga.*

*Faaluaina e le sui usufono mo Palauli le Falefa ma le sui usufono mo Faasaleleaga Nu.1 Sisifo.*

*Na faamaonia le Lipoti.*

**FOFOGA FETALAI:** Ou te faasilasila atu ua faamaonia nei e le Fono Aoa le Lipoti a le Komiti i le Tulafono Tau Faaofi ma o le a sagai atu loa le Fono Aoa mo le iloiloga auiliili.

E tusa ai ma Tulafono Tumau e amata le iloiloga auiliili i le Fuaiupu 2.

**FUAIUPU 2: Faamatalaina o uiga o upu.**

*Faamaonia.*

**FUAIUPU 3: Tulafono e noatia ai le Malo.**

*Faamaonia.*

**FUAIUPU 4: Taiala faavae.**

*Faamaonia.*

**FUAIUPU 5: Galuega tauave ma malosiaga.**

*Faamaonia.*

**FUAIUPU 6: Tuuina atu o malosiaga e le Malosiaga.**

*Faamaonia.*

**FUAIUPU 7: Ofisa Sili o Pulega.**

*Faamaonia.*

**FUAIUPU 8: Galuega tauave.**

*Faamaonia.*

**FUAIUPU 9: Malosiaga e suesueina ai.**

*Faamaonia.*

**FUAIUPU 10. Malosiaga e faatinoina ai suesuega.**

*Faamaonia.*

**FUAIUPU 11: Tuuina atu o malosiaga.**

*Faamaonia.*

**FUAIUPU 12: Faamoemoe o le Matagaluega.**

*Faamaonia.*

**FUAIUPU 13: Faaauauina o le Matagaluega.**

*Faamaonia.*

**FUAIUPU 14: Vaevaega, vaega taitasi po o isi vaega.**

*Faamaonia.*

**FUAIUPU 15: Tagata faigaluega.**

*Faamaonia.*

**FUAIUPU 16: Galuega tauave.**

*Faamaonia.*

**FUAIUPU 17: Tulafono na faia.**

*Faamaonia.*

**FUAIUPU 18:** O le galulue felagolagomai ma faalapotopotoga tau faatoaga ma faiga faiva.

*Faamaonia.*

**FUAIUPU 19:** Lipoti faaletausaga.

*Faamaonia.*

**FUAIUPU 20:** Faavaeina.

*Faamaonia.*

**FUAIUPU 21:** Tofiga.

*Faamaonia.*

**FUAIUPU 22:** Totogi.

*Faamaonia.*

**FUAIUPU 23:** Faasilasilaga o le faavaeina ma le faataapeina.

*Faamaonia.*

**FUAIUPU 24:** Faamatalaga molimau e ala i tusi faamaonia.

*Faamaonia.*

**FUAIUPU 25: Puipuiga mai noataga tau le tagata.**

*Faamaonia.*

**FUAIUPU 26: Tulafono Faatonutonu.**

*Faamaonia.*

**FUAIUPU 27: Soloia.**

*Faamaonia.*

**FUAIUPU 28: O aiaiga faasaoina ma aiaiga tau soloaiga.**

*Faamaonia.*

**FAAMATALAGA:**

*Faamaonia.*

**FUAIUPU 1 MA LE IGOA:**

**FUAIUPU 1: Igoa puupuu ma le amataga.**

**IGOA: Tulafono o le Vaega o Faatoaga ma Faiga Faiva 2019.**

**FOFOGA FETALAI:** O lo o i ai le Faasaoga a le Komiti i le Fuaiupu 1 ma le Igoa.

Ou te tapa ma le faaaloalo lau Afioga i le Taitaifono o le Komiti.

**Tofa Hon LAUOFO FONOTOE NUAFESILI PIERRE LAUOFO:**  
Lau Afioga i le Fofoga Fetalai ou te faatu le Faasaoga i le Fuaiupu 1 ma le Igoa o le Tulafono e faapea:

**“TEUTEUGA:**

Ia aveese le fuainumera 2019 ma suia i le fuainumera 2020 ma faitauina ai le Igoa o le Tulafono e faapea:

**Tulafono o le Vaega o Faatoaga ma Faiga Faiva 2020.**

*Faamaonia le Faasaoga.*

*Faamaonia le Fuaiupu 1 ma le Igoa e pei ona Faasaoina.*

*Na faagasolo le Tulafono Tau Faaofi o le Vaega o Faatoaga ma Faiga Faiva 2020 faatasi ma le Faasaoga.*

**LAFO MO LE FAATAATIA ESE O TULAFONO TUMAU 108(4)**

**FOFOGA FETALAI:** Lau Afioga i le Palemia, ou te tapa ma le faaaloalo.

**Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI (Palemia):** Lau Afioga i le Fofoga Fetalai ua ou tulai atu ma le agaga faaaloalo e faatu le lafo, *Ina ia faataatiaese Tulafono Tumau 108(4) ina ia avanoa ai le faitauga faatolu o le Tulafono Tau Faaofi lea sa iloilo ina auiliili nei.*

*Faaluaina mai e le Minisita mo Pisinisi, Alamanuia ma Leipa ma le Minisita mo Tina ma Tamaitai, Atinae o Nuu ma Afioaga ma Agafesootai.*

*Na faamaonia le lafo.*

**TULAFONO TAU FAAOFI O LE VAEGA O FAATOAGA MA FAIGA FAIVA 2020 – faitauga faatolu**

**FOFOGA FETALAI:** Ou te tapa lau Afioga i le Minisita mo Faatoaga ma Faiga Faiva.

**Tofa Hon LOPAOO NATANIELU MUA:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Vaega o Faatoaga ma Faiga Faiva 2020 i lona faitauga faatolu.*

*Faaluaina mai e le Minisita mo Galuega, Felauaiga ma Atinae Eseese, Minisita mo Tagata Tafafao Maimoa Mai Fafu ma le Minisita mo le Soifua Maloloina.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

**ILOILOGA O LE LIPOTI A LE KOMITI O AMIO TAUALOA E  
FAATATAU I LE LIPOTI A LE KOMITI O TUPE MAUA MA  
TUPE TOTOGI E UIGA I LE SUI USUFONO O  
GAGAIFOMAUGA NU.3**

**FOFOGA FETALAI:** Ou te tapa lau Afioga i le Taitaifono o le Komiti o Amio Tauloa.

**Tofa NAFOITOA TALAIMANU KETI (Taitaifono o le Komiti o Amio Tauloa):** Lau Afioga i le Fofoga Fetalai ou te tulai ma le faaaloalo e faatu le lafo, *Ina ia faamaonia e le Fono Aoao le Lipoti a le Komiti o Tulaga Aloaia ma Amio Tauloa o lo o tuuina atu ai ana Sailiiliga ma ana Fautuaga.*

**Afioga Faumuina Asi Pauli Wayne Fong (Nuu Tu Taulaga i Sisifo):** Lau Afioga i le Fofoga Fetalai, e talosagaina lau afioga mo se avanoa a o le i pasia le lafo faatu lau Afioga i se mea e fia faasao mo faamaumauga o le Lipoti. Ma le faaaloalo lava.

**FOFOGA FETALAI:** O lea ua tulai mai le Taitaifono, e sese le taimi o lou tulai mai le sui usufono mamalu mo le Nu'u Tu Taulaga i Sisifo. Se i tulai mai lau Afioga i le Taitaifono.

**Afioga Faumuina Asi Pauli Wayne Fong:** Faafetai i lau Afioga. Leaga o lea e tilotilo atu lau Afioga o lo o i ai i totonu o le lipoti molimau ma fesoasoani e uiga i le talanoaina e le Komiti o Tupe, o lo o i ai le faamaumauga faapea sa i ai le molimau a le kamupani a le Freight Plus i lea Komiti. Ae fia faailoa atu ma le faaaloalo lava, e le i i ai se molimau a le Freight Plus i le Komiti o Tupe. Faatoa fai le molimau a le Freight Plus i le Komiti mulimuli lea sa fai nei i tulaga tau Aloaia ma Amio Tauloa.



**FOFOGA FETALAI:** Malie le sui usufono, e leai e le faimea faalogo le Fofoga Fetalai ma le Palemene i lou tulai mai. O le faagasologa o galuega o lea sa tuuina atu i le Lipoti a le Komiti o Tupe Maua ma Tupe Totogi, o lea sa toe tuuina atu ina ua tuuina mai i le Palemene le Lipoti a le Komiti o Tupe Maua ma Tupe Totogi ma o lea sa finagalo le Palemene e tuuina atu i le Komiti o Amio Taualao.

**Susuga Hon Laauli Polataivao Leuatea (Gagaifomauga Nu.3):** Lau Afioga i le Fofoga Fetalai, i le agaga lava ma le faaaloalo, e leai lava se isi e paopaoina le faaiuga a lau Afioga i le Fofoga Fetalai ona o le tausisia lava o tatou Tulafono Tumau. Atonu foi o lea lava ua oo mai le tatou Lipoti iinei i le Palemene, a o le aafiaga o au nei e le gata foi i lea o le Afioga i le sui usufono, ou te tatalo ai i aiaiga o tatou Tulafono Tumau i mataupu faapenei, se i tuu mai sina taimi se i tilotilo ma vaavaai, aua o lea ua aumai le Lipoti a le Komiti, o lea faatoa ta tau mai i luga o lata kesi ae le i aumaia se kopi ta te vaavaai ma tapena mai i ai i le mataupu lenei i le faataatiaga o le faatuina o le lafo a le Komiti, ia faataatia i luga o aiaiga o Tulafono Tumau i se mataupu o lo o tuuaia leaga ai au nei ma le Afioga i le sui usufono. A o lenei ua aumai, ia e leai sota taimi o lenei faatoa taunuu mai le Lipoti o lea faatoa iloa mai le Lipoti i luma o le Laulau a Fono. Ia o le a la lata tala o le a fai atu? O le a lata tali o le a fai atu i le saunoaga a le Taitaifono?

O le agaga lea lau Afioga, i le tausisia o tatou Tulafono Tumau i lafo faatu i mataupu ogaoga faapea, ia ou te tatalo atu ai, sa tatau ona aumai ananafi po o le vaiaso lea na tea nei se i ota faitau ma se i maua se manatu po o fea lea ua agai mai ai le Lipoti a le Komiti. Ma lou agaga faaaloalo.

**FOFOGA FETALAI:** O lea ua maua atu lou finagalo, ae leaga o lea ua tulai mai le Palemia a o lea e tau fai atu le manatu o le Nofoa.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, o tatou uma lava lea faatoa tufa mai le tatou Lipoti ae sa i ai foi le Lipoti muamua na aumai na table mai foi. O le finagalo o le sui usufono lea mo Gagaifomauga Nu.3, sa tatau ona ave le Lipoti i o i le Komiti o Amioga Taualao lea la na ala ai ona toe ave i luga o le fautuaga lava a le sui usufono lava lenei. O lea la ua faataoto le Lipoti, o lea faatoa faitau uma ai lava tatou. E le o ni mea foi e faapea e tau toe faitau i ai, lea na tele lava le malamalama i le taimi na aumai muamua ai le Lipoti. Na pau lava la le mea, o le toe ave pea i o i le Komiti e tusa o lau fautuaga, a o lea ua malamalama uma lava le Maota. Lau Afioga, o lau Afioga e faia le faaiuga faaiu lau Afioga i le Fofoga Fetalai. O le a silafia lelei e le sui usufono mo Gagaifomauga Nu.3 i le mea lea o le faauigaina o tatou Tulafono Tumau, na o le tasi lava le tagata na te faauigaina na o le Fofoga Fetalai. O lena e te silafia. E le o ni mea fou foi

mea nei. A mea foi o mea tuai? O lea lava sa e tulai mai ai, ma o mea foi nei e le i faapea o ni mea na te i te i tupu ae i totonu o le Maota. Na tupu ae o lau lava finau ma e aumaia lipoti i totonu o le Maota e faamaonia ai au mau.

Na pau lava la le mea lea sa tapa ai le Komiti o Tupe, se i silasila i le faamaoniga o au mau na aumai, ia lea la na aumai e toe talosaga foi, sa tatau ona ave i o, lea na ou io atu foi i ai ma io i ai le Maota, toe ave i o. E le fou la, ae o le umi o le taimi sa i ai i o sa tatau ona e afio i ai i o, o lea foi ou te vaai atu, o oe le isi o molimau.

Lau Afioga i le Fofoga Fetalai, e leai se mea e toe natia ua oo i le taimi e tatau ona talanoa ai i le faasologa o le fonotaga a le Maota lenei, ua oo i le taimi e tatau ona talanoa ai ae leai se mea e te popole ai pe afai o oe e te amiotonu. Ua faafia ea ona e tu ae i luga e te manao e saili le amiotonu, e te manao e saili le amiotonu, e te manao e saili le amiotonu. O mea lava ia e te tautala soo i ai. A o le a la le mea ua e toe fefe ai?

Lau Afioga i le Fofoga Fetalai, o upu e fai I totonu o le Maota lenei...

**Susuga Hon Laauli Polataivao Leuatea:** Lau Afioga i le Fofoga Fetalai...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga se i uma atu lau faamatalaga...

**FOFOGA FETALAI:** Malie le sui usufono se i alaala mai i lalo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** O upu e fai i totonu o le Maota lenei, e molimauina e le 50 sui usufono nei ma Ofisa Sili o Pulega o Matagaluega ma le 200,000 o tagata Samoa ia e faalogologo mai i le tatou felafolafoaiga e mafai ona e olegiaina le faamasinoga aua e tausaili ni faamaoniga, ae o i inei, e le mafai la ona e alo ai, leaga o lea e matilatila saunoaga e mau i totonu o faamaumauga a le Palemene, e mau i totonu o tulaga o le faamauina o tatou talanoaga i tatou masini pueleo. E le mafai lava la ona alo ai se isi.

Lau Afioga i le Fofoga Fetalai, o lou tulai atu lena e toe faamalamalama mataupu o le Fono.

**Susuga Hon Laauli Polataivao Leuatea:** Lau Afioga i le Fofoga Fetalai...

**FOFOGA FETALAI:** Malie le sui usufono...

**Susuga Hon Laauli Polataivao Leuatea:** Ioe lau Afioga, o le agaga lea sa ou taumafai atu ai o le faataatiaga o le mataupu, ou te le o toe faafinauina se isi mea. O le agaga lea e taumafai atu i le Lipoti a le Komiti...

**FOFOGA FETALAI:** Malie le sui usufono, o lea ua ou... se i faafofoga mai

**Susuga Hon Laauli Polataivao Leuatea:** Ina ia faataatia i tatou Tulafono Tumau e ala i le lafo faatu.

**FOFOGA FETALAI:** E le faia le tatou Palemene i le mea e te finagalo i ai. Malie, alaala mai i lalo le sui usufono mamalu. Se o tatou, e tumu foi le Nofoa i le ava ma le faaaloalo i faitau mai le atunuu i te i ua sopotuaoui se tala pe paopapa foi ona afaina lea o se finagalo. A o le faamuamua a oo loa ina tuuina mai le Lipoti a le Komiti o Tulaga Aloaia, ia ona ave lea i ai o le faamuamua ma o faamaoniga lava e aumai i totonu o le Palemene, e le tausailia aua e leaga o la e i ai faamaoniga, o tatou faamaumauga. E faapena, e le tausailia la se faamaoniga a se sui usufono i sana saunoaga na tuuina mai pe na fai i totonu o le Palemene leaga o lea e faamaumau uma lava. E le tausailia la po o fea e aumai ai ni faamaumauga, o lea lava e i totonu o le Palemene faamaumauga. Na ona tuu atu lava i le Komiti.

**Susuga Hon Laauli Polataivao Leuatea:** Ioe lau Afioga i le Fofoga Fetalai, ou te le tapa lava nisi itu. Na pau lava lea o le mea na ou tulai atu ai lau Afioga i le Fofoga Fetalai, o tatou Tulafono Tumau. A faatu le lafo mo se mataupu faapenei, e aumai le avanoa ia te au o lea e tuuaia. E le afaina le Afioga i le Palemia leaga e leai se isi o outou o aafia. O au lea e abuse.

**FOFOGA FETALAI:** Malie, malie. Malie le sui usufono, o lea o le a fai lava... ia vaai...

**Susuga Hon Laauli Polataivao Leuatea:** O le fesili lea faapea o lou faamaoni, Tuilaepa, o le ute lena o faigamea.

**FOFOGA FETALAI:** Ia vaai... ua faasolo lava ina e le mafaufau.

**Susuga Hon Laauli Polataivao Leuatea:** Ou te le fefe e table le mea lea. Ou te le fefe, ou te le fefe, ou te le fefe. Aua e te tautau soo ma e faaleaga, o lea foi o le a amata lau faaleaga. Ua ou ava atu Toleafoa.

**FOFOGA FETALAI:** E faapea, e faapea. Toeitiiti ona ou poloaiina lea o le Satini e... Se malie le sui usufono...

**Susuga Hon Laauli Polataivao Leuatea:** Silasila i Tulafono Tumau e le sao le mea lea o le a table.

**FOFOGA FETALAI:** O lea e tuu atu avanoa i sui usufono uma lava e fia saunoa i le mataupu.

**Susuga Hon Laauli Polataivao Leuatea:** E le uma lou faufau.

**FOFOGA FETALAI:** O le mea la lea, e faamalulu atu. Ou te poloiina le sui usufono e i ai le tatou avafatafata i totonu o le Palemene lenei, ou te manatu e nofo magalafu e iloga malalaola i totonu o le Palemene i le Taitai o le Malo, e faapena ona tatou ave i ai le faamuamua aua e tulai mai e saunoa i mea e fia faamalamalama ma faiga faavae a le Malo.

O le mea la lea, ou te faamalulu atu i le sui usufono mamalu, se i tuu se i maea le saunoaga a le Taitaifono e uiga i le latou lipoti ma tuuina mai, aua o tatou uma lava, o lea foi ou te le i faitau i le lipoti, ioe, o lea na ona taatia i i, o lea ua amata le Fono, faatoa maua sou manatu pe a tolaulau mai e le Taitaifono le latou lipoti ma a latou fautuaga. O le mea la lea e faamalulu atu, e o lava i le mea lena e i ai lou finagalo ae le o faamallosia leaga o lea tatou te mulimulitui i a tatou faiga faavae e lilifa i ai le taitaiga o le tatou Palemene i a tatou Tulafono Tumau.

O le mea la lea ou te faamalulu atu i finagalo o sui usufono, ia...

**Afioga Faumuina Asi Pauli Wayne Fong:** Malie le sui usufono, leaga o lea e sese le mea lea e aumai i i...

**FOFOGA FETALAI:** Malie le sui usufono... O lona uiga e sese au?

**Afioga Faumuina Asi Pauli Wayne Fong:** E leai e le sese oe, o lea e sese le Lipoti.

**FOFOGA FETALAI:** Ia malie la se i tatou talanoa i le Lipoti...

**Afioga Faumuina Asi Pauli Wayne Fong:** O faamaumauga o le Lipoti lau Afioga.

**FOFOGA FETALAI:** Se malie le sui usufono se i alaala mai i lalo faamolemole. Ia, lau Afioga i le Taitaifono, tulai maia, aua e te toe alaala i lalo seiloga ua e faafofoga mai ua ou tapa se suafa o se sui usufono. Seiloga lava e tapa e le Fofoga Fetalai se suafa o se sui usufono mamalu e tulai mai ona e alaala lea i lalo, a o le upu lava ia o lou tulai mai, e fai lava oe, e fai lava oe seiloga ou te tapa atu ma ou faatonu atu.

Ia saunoa lau Afioga i le Taitaifono.

**Tofa NAFOITOA TALAIMANU KETI:** Faafetai i lau Afioga i le Fofoga Fetalai mo le avanoa e tusa o le faasologa o galuega a le Maota i lenei vaega o ana taualumaga. E manatu o le a ulufale le gae ia se leo o lenei Komiti, o lea ua nati-a-pasina le sooga a taiula ina ua sola le nuu tu tai ae laga mauga tali malama. Ua le o se malama la na saia i le ata, a o tupe lava na susuu. Tulouna le paia o le Fonousu a Samoa vae atu paia faalagi o le Palemene, le paia o lau Afioga i le Fofoga Fetalai o le fala fofola o le Palemene, afio lau Afioga i le Palemia o le Taitai o le Malo, lau Afioga i le Sui Palemia ma le mamalu o le atisa o le Kapeneta, a outou Afioga i Minisita Lagolago a outou Afioga i Taitaifono o Komiti faa-Palemene ma le mamalu o sui usufono o le Palemene a Samoa i lona lona Paeaiga XVI. E fia afea foi se matou gagana le tafatafafuga o le tapuaiga a Ofisa Sili o Pulega o Matagaluega ma Faalapotoptoga uma Tumaoti a le Malo. O lo o tapuaia ma lagolagosua i le tatou galuega i lenei aso. E faatulou foi i le tapuaiga a Samoa i ona tafa e fia. Mai mauga tetele ma tolotolo faitauina o paia lava e le avea. E le toe tau sulaina foi, e faapea foi le tapuaiga i paia o auuuna tofofi a le Atua, i so o se Ekalesia Kerisiano. Tulou o mamalu lava e tumau e oo i le faavavau. Matou te faatalofa atu i lenei vaega o le aso, malo onosai malo le tapuai. O upu tuu na faapaiaina ai le Maota lenei, ia avea o se Maota e ofi ai le tele o le Atua. O le Atua lea o lo o Faavae ai le Malo Tutoatasi o Samoa. O le Atua e Silisili Ese, o le Atua o le alofa fua lava Ia. O le Atua foi o le faamasinoga tonu ma le amiotonu.

Sa o matou taumafai lava e asa magavai uma, ina se i saili le uluvai. Aisea? Leaga o le Komiti o Tulaga Aloaia ma Amio Taualoa a le Palemene. O le Komiti aupito i maualuga lea. E tatau lava i lenei suesuega ona saili ina ia maua figota o le moana uli. Ma saili ina ia maua le auro i le manava o le eleele tulou. Faatasi ma le faatumuga a le Agaga Paia i outou finagalo ma o matou loto. Ina ia atoa tino le galuega i se taunuuga e faamalieina ai le Palemene aemaise o le faafofoga taputapu mai o Samoa.

Lau Afioga i le Fofoga Fetalai, i le ava tele ou te tolalauina ai Sailiiliga ma Fautuaga a le Komiti, mo le silafia e lenei Maota ma le faafofoga tapuai mai a Samoa e faapea.

E tusa ai o le lafo na faamaonia e le Fono Aoaio Faitulafono i le aso 18 Mati 2020, sa faatonuina ai le Komiti lenei mo le galuega suesue lea, ma mafai ona fofoga faatasi ai ma Tuutuuga ma Taiala o Iloiloga o Galuega a le Komiti e faapea:

- (1) **Iloilo totoa o sailiiliga ma fautuaga a le Komiti o Tupe Maua ma Tupe totogi, po o ua aafia ma solia ai tulaga aloaia, ma amio taualoa a le Palemene e tusa ai ma aiaiga o Tulafono Tumau 186;**

**(2) Ia toe lipoti mai le Komiti i se Fonotaga o lumanai a le Fono Aoao Faitulafono, e i ai leni taeao.**

I lea foi lava lafo sa faamaonia i le Maota leni, sa tofia faatasi ai ma sui usufono e toa 7, mo le Komiti o Tulaga Aloaia ma Amio Taualoa a le Palemene mai itumalo eseese, mo le susesueina o leni mataupu mo le:

**Sui Usufono Filifilia (Tofia Aso 18/03/2020)**

Tofa NAFOITOA Talaimanu Ketu, Gagaemauga Nu.3 - *Taitaifono*  
Hon LAUOFO FONOTOE Nuafesili Pierre Laufo, Anoamaa Sisifo, -*Sui Taitaifono*

Afioga TAFUA Maluelue Tafua, Aleipata Itupa i Lalo - *Sui Usufono*

Afioga TAEFU Lemi, Falelatai & Samatau - *Sui Usufono*

Afioga ALAIASA MUAGUTUTIA MOEFAAUOUO

MALAGAITUTOGIAI Sepulona Moananu, Anoamaa Sasae - *Sui Usufono*

Tofa AUMUA Isaia Lameko, Falealili Sisifo - *Sui Usufono*

Afioga TOFA Foleni Lio Tama Galu, Faasaleleaga Nu.3 - *Sui Usufono*

**Ofisa fesoasoani i le Komiti:**

Ofisa o le Failautusi o le Fono Aoao Faitulafono

Ofisa o le Loia Sili

**Taualumaga o Iloiloga a le Komiti:**

Lau Afioga i le Fofoga Fetalai, sa muamua ona agai susesuega a le Komiti i le faamaoniga o saunoaga a le sui usufono i taualumaga a le Palemene aso 24 Ianuari 2020. E talitonu le Komiti o le afuaga o leni mataupu, ona o saunoaga na faia e le sui usufono mo Gagaemauga Nu 3 i totonu o le Maota i le aso 24 Ianuari 2020. O lea na ia fesiligia ai le tele o le vaegatupe e \$300,000, ua faatatauina mo le afi eletise mo le auuanaga tau Falepuipui ma le Toefuataina.

Na faavae lona talitonuga ua taugata pe a faatusatusa i le afi eletise na ia faatauina mai Niu Sila. O lea na ia saunoa ai e faapea, “O au nei sa faatau lau standby power 200kva e le i mamao tele atu, e na o le \$100,000 Samoa na alu ai” (*itulau 981, Hansard 24/1/2020*). Sa fesiligia foi po o lea le tausaga na faatau mai ai, peitai o le tali a le sui usufono. “O le tausaga lea na tea nei lau Afioga” (*itulau 981, Hansard 24/1/2020*)

I sailiiliga ma susesuega a le Komiti, ua faamaonia ai e le moni ma faamaoni ia saunoaga, ona e leai se afi 200kva na faatauina a le sui usufono, i le tausaga na tea nei 2019. Na faamaonia mai e le sui usufono i lana molimau i luma o le Komiti i le aso 7 o Me 2020, o le afi eletise faaleoleo e 200kva o lo o i pepa sa ia tuuina atu i le Palemene, ua na o se pepa tauofo (quote) o se afi o lo o fuafua e auina mai i se taimi lata mai mo lona itumalo. “O lau afi

lea na aumai mo le silafia e le tatou Komiti, e na o le 30kva e faaaoga i lou fale, ae o le afi lona lua lea na tuu ou te aumaia i le tausaga lea na tea nei e 200kva mo lou itumalo.” (*Faamaumauga o Taualumaga a le Komiti aso 7 o Me 2020*). Ua mautinoa ma talitonuina ai e le Komiti lenei, ua manino atoatoa mai ai, na faia le saunoaga a le sui usufono mo Gagaifomauga Nu 3 i totonu o le Maota ma lona silafia lelei, e leai sana afi faaleoleo 200kva na faatau mai.

Na faamaonia mai foi e le sui usufono ina ua fesiligia e le Komiti o lo o sao Faamaumauga Aloaia a le Palemene i ana saunoaga sa fai, peitai o le mafuaaga o le eseese o ana saunoaga i le Maota i le aso 24 Ianuari 2020 ma lana molimau i luma o le Komiti, ona o lona faanaunautaiga ina ia faamalosi lana mau, ae o ana upu sa fai e manatu ia o lape ia o lauga. Na ia toe faamaonia mai foi, o lana saunoaga sa faia i le Maota, na faavae i lona faamoemoega sa i ai mo le fia fatauina o sana afi eletise 200kva mo lona itumalo, ona o ana suesuega (enquiries) sa faia ina ua faatau mai lana afi faleoleo e 30kva.

Na ia faamaonia mai foi i luma o le Komiti, ua ia talia le tulaga e faapea, “E ese au upu na fai i o (Palemene), ese au upu ia ua ou fai atu ai nei (luma o le Komiti)” O le agaga o le sui sufono na faavaeina ai lana finau i le mataupu, ona o lona talitonuga, ua utiuti le faasoia i tulaga tau tupe, ae ua taugata tele le afi eletise faaleoleo a le Auaunaga o Falepuipui ma le Toefuataiga, pe a faatusa i lana afi eletise faaleoleo sa faatau mai e \$100,000 Samoa i le tausaga 2019.

Lau Afioga i le Fofoga Fetalai, o le Vaega 2 o le suesuega a le Komiti, o le agai lea i faamaumauga na tauaaoina e le sui usufono. O faamaumauga a le sui usufono sa tuuina i luga o le Laulau-a-Fono a le Palemene e aofia ai, (1) Tusi o le Aso 27 Ianuari 2020 agai i le Fofoga Fetalai. (2) Pepa o tauofoga (quotation mo le afi eletise 200kva aso 25 Ianuari 2020). (3) Ata o le Afi faaleoleo (Generator consist) 200kva. (4) Ata o le Pepa o Faamatalaga faapitoa (Technical Datasheet)

(5) Ata o le Vaega o fua faatatau o faatonuga - (Standard Control Panels) (6) Ata o le Vaega o fua faatatau o faatonuga – Filifiliga (Standard Control Panels Optionals) (7) Pepa o uta o Vaa (Bill of Lading) - aso 23 Ianuari 2020. Silasila i pepa na e faapipii atu i le lipoti. (8) Ata o le afi eletise 30kva - aso 9 Ianuari 2018 i le 2.06pm. (9) Ata o le lifi ma le ave lifi a le Freight Plus Ltd - aso 9 Ianuari 2018 i le 2.16pm, (10) Ata o le loli, lifi ma le aufaigaluega a le Freight Plus Ltd - aso 9 Ianuari 2018 i le 2.10pm.

Peitai na maua i sailiiliga a lenei Komiti o Tulaga Aloaia ma Amio Taualoa, e leai ma se fesootaiga o faamaumauga na tuuina mai e le sui usufono i le aso 27 Ianuari 2020, e faamaonia ai ana saunoaga sa faia i le aso 24 Ianuari 2020 i totonu o le Palemene lenei. Ona e leai se afi 200kva na faatauina mai Niu Sila i lalo o le suafa o le sui usufono i le vaitau tonu lea (2019) na ia taua i lana saunoaga. Ae na o le afi 30kva na faaulufale mai i lalo o le suafa

o le sui usufono i le tausaga 2017/2018. I le saililiga a le Komiti, o ata uma nei na tuuina mai e le sui usufono e faamaonia ai, o le afi eletise lea, o le afi e 30kva lona malosi.

Na taulimaina e le Komiti le kopi ole tusi a le Kamupani o le QPower, i le sui usufono i le aso 21 Fepuari 2020, e faamaonia ai o le aso 7 Tesema 2017, na o latou taulimaina ai le tau atoa o le afi, NZ\$13,500 i luga o le pepa o Tau o tupe totogi (Invoice1024), o le totogi lea mo le afi JD30kva (serial number 25864). O lea tusi o lo o saini ai le suafa o le alii pule o le Kamupani a le Q Power i Niu Sila.

Ina ua fesiligia le Kamupani a le Freight Plus i le mataupu leni, ma latou faamaonia mai ai, e leai se afi faaleoleo a le sui usufono na kilia e la latou Kamupani le tausaga 2019, vagana ai le tausaga 2018 e pei ona molimauina e le Komiti i ata na tuuina mai e le sui usufono i le Palemene i le aso 27 Ianuari 2020.

Na faamaonia mai foi e le sui o le Faalapotopotoga o le Malosi Faa-Eletise o le afi faaleoleo na ia vaai ai i ata, o le afi lava lea na vaai ai foi i le Maota o le sui usufono, i le aso tonu o le asiasiga a le Matagaluega o Tiute, a o faagasolo le suesuega a le Komiti o Tupe Maua ma Tupe Totogi. Na tautino mai foi e sui o le Faalapotopotoga, na faigata ona iloa tonu le malosi o le afi i lea asiasiga ona e le i mafai na faaola le afi. Ae peitai, na ia fesootai ai i le Kamupani a le Q Power i le taimi lava lea, mo se faamaoniga o le malosi o le afi. O le aso lava lena 10 Mati 2020 na faamaonia mai ai e le Kamupani a le Q Power e 30kva lona malosi. O le afi lava lea na fai ai le asiasiga a le Komiti leni, o le Aso Faraile 15 Me 2020. O le afi eletise faaleoleo a le sui usufono e pei ona taua i faamaumauga, ma malaga uma sui o le Komiti i Vaitele i le Maota o Samoa i le vaega tonu o lo o i ai le afi, ma faamaonia ai o le afi lava lea e tasi na asia e le Matagaluega o Tiute ma Tupe Maua, ma le sui o le Faalapotopotoga o le Malosi faa-Eletise i le aso 10 o Mati 2020. Sa talosagaina e le Komiti le sui usufono ina ia faaola lana afi eletise faaleoleo, sa molimauina e le Komiti o lo o ola, ae peitai, e le i maea ona faapipii atu i lona maota mo le faaaogaina. O le taunuuga o le asiasiga a le Komiti na faamaonia ai, e 30kva le afi a le sui usufono o lo o i ai i le taimi nei, lea sa auina mai i le faaiuga o le tausaga e 2017, ae kilia i tua i le amataga o le tausaga e 2018. Na faamaonia mai e le sui usufono i le feiloaiga ma le Komiti e faapea, na faatauina mai lana afi, ae e le 200kva, e na o le 30kva ma na taunuu mai i le tausaga 2017 ia ma kilia i le amataga o le tausaga 2018. O faamaumauga na tuuina mai e le sui usufono i le Palemene i le aso 27 Ianuari 2020, e le o mafai ona faamaonia ai ana saunoaga na tautino ai i totonu o le Maota. O le faamaoniga lea, o le lē faamaonia o Pepa ma Faamaumauga uma na ia faataatia i luma o le Palemene, e pei ona taua manino i le lipoti a le Komiti o Tupe Maua ma Tupe Totogi. Ua manino mai ai foi, sa ia faia lava ma le mautinoa, e ese Pepa ma Faamaumauga na ia tuuina atu i le Maota, ese ana saunoaga na faia i luma o le Palemene.



Sa matua auiliili atoatoa e le Komiti lenei Sailiiliga ma Fautuaga a le Komiti o Tupe Maua ma Tupe Totogi, e tusa ai ma le faamaoniaga a le Palemene ma e lagolagoina ma faamaonia e le Komiti lenei, le suesuega na faatinoina i lona Aotelega. Na mafai e le Komiti lenei ona valaauina ni molimau e faamautu ma faamausali ai tuuaiga, ma fesoasoani e talafeagai e fesootai ma lenei mataupu. 1. O le Ofisa o le Loia Sili a le Malo, o le Komiti o Tupe Maua ma Tupe Maua a le Palemene. O le Pulega o le Matagaluega o Tiute ma Tupe Maua. O le Kamupani a le Freight Plus Limited, o le Matagaluega o Tupe, o le Matagaluega o Leoleo ma Falepuipui ma le Ola Toefuataina. O sui o le Faalapotopotoga o le Malosi faa-Eletise. O alii ofisa o le Matagaluega o Tiute ma Tupe Maua sa faatinoa le galuega, faapea foi ma le sui usufono mo Gagaifomauga Nu 3.

Lau Afioga i le Fofoga Fetalai, sa silasila loa le Komiti lenei i Tulafono talafeagai mo le mataupu lenei. O le vaega taua o lenei Suesuega, o le iloilo atoatoa o Sailiiliga ma Fautuaga a le Komiti o tupe Maua ma Tupe totogi po ua aafia ma solia ai tulaga aloaia ma amio taualoa a le Palemene e tusa ma aiaiga o Tulafono Tumua 186. O le a le Tulafono Tumau 186?. O le Faataitaiga o uiga le migao. O lo o aiaia manino mai ai faataitaiga i so o se gaioiga, po o se faatinoga e faia e se sui usufono, e faauigaina o se uiga le migao. I le matau a le Komiti i le mataupu lenei, o lo o aiaia i le (b) o le Tulafono Tumau nei le faataitaiga e fesootai tonu ma lenei mataupu e faapea. Tulafono Tumau 186 faataitaiga o uiga le migao. E aunoa ma le faatapulaaina o tulaga aoao o Tulafono Tumau 185, e mafai e le Palemene ona faia e avea o se uiga le migao so o se tulaga e faapea, (b) taumafai ma le maatinoa e taufaasese le Fono Aoao po o se Komiti i luga o se faamatalaga molimau po o se talosaga. Sa mafai foi ona silasila le Komiti lenei, i tulaga o Tulafono o ona Faasalaga. I le tulaga tau faasalaga, na asia e le Komiti le Tulafono o Pule ma Tulaga Aloaia o le Fono Aoao Faitulafono 1960. E faavae ai le atoaga o sana fautuaga mo se faaiuga amiotonu a le Fono Aoao. I lona Fuaiupu 21, Uiga faale-migao o se sui usufono o le Fono Aoao i lona (4). Afai o se sui usufono ua nofosala i le fale-migao i le Fono Aoao, e mafai e le Fono Aoao i sana iugafono ona aoaina sea sui usufono po o le tuueseina o ia mai le galuega a le Fono Aoao, mo se vaitaimi e pei ona ia faafinagaloina e tatau ai.

E pei ona faaalua manino mai i le Fuaiupu ua taua i luga, o le malosiaga tau faasalaga, o lea ua tuuina atu i le Fono Aoao i se iugafono, latou te faasalaina ai se sui usufono ua nofosala i le faale-migao i le Fono Aoao. O faasalaga e pei ona taua, (1) Aoaina (reprimand) se sui usufono; po o (2) Tuueseina (suspend) o ia mai le galuega o le Fono Aoao mo se vaitaimi e pei ona faafinagaloina, e tatau ai e le Fono Aoao. E tusa ai foi ma le Fuaiupu 21 (5) o le Tulafono lava lenei 1960, e le agavaa le sui usufono nofosala i totogi ma alauni faa-Palemene pe a faapea ua finagalo le Fono aoao e tuueseina le sui usufono mai galuega a le Fono Aoao mo se vaitaimi.

Ona ou taunuu mai lea i le Iloiloga auiliili a le Komiti. O le faagasologa o Iloiloga auiliili a le Komiti, lau Afioga i le Fofoga Fetalai, sa taumafai lava e aoao manogi i ona itu uma, e mautinoa ai le amiotonu o sana fautuaga, e tuuina mai i le Fono Aoao Faitulafono lenei.

O le suesuega a le Komiti, sa agai tonu lava i vaega e lua e ala i saunoaga, ma faamaumauga a le sui usufono, i le tulaga o le solia o le Tulafono Tumau 186 (b), pe na ia taumafai ma le mautinoa, e taufaasese le Fono Aoao, i mataupu ia e 2. (1) O se saunoaga na ia faia i totonu o le Maota, i le aso 24 ma le 27 Ianuari 2020. O lona 2, o ni faamaumauga na ia tuuina i le Palemene i le aso 27 Ianuari 2020. Lau Afioga i le Fofoga Fetalai, talu ai o le taimi muamua lenei, ua suesueina ai se sui usufono i lalo o le Vaega lenei o le Tulafono Tumau 186(b). Sa maua ai le avanoa, e silasila ai le Komiti i nisi o suesuega sa faatinoina i Komiti faa-Palemene o Tulaga Aloaia ma Amio Taualoa i tausaga ua mavae. Sa faatinoina ma fofogaina iuga i totonu lava o le Palemene lenei, e taiialaina ai se Fautuaga talafeagai. Na agai foi le silasila a le Komiti i mataupu e foliga tutusa ma le mataupu ua suesueina i atunuu e pei o Niu Sila ma Ausetalia. Ona e matauina le tutusa o faaupuga o lo o faaaogaina e a latou Tulafono Tumau faa-Palemene ma a tatou foi Tulafono Tumau. O suesuega na faatino e ia Palemene na matauina ai lo latou faaaogaina o se alafua, na faataatia mai i se faiga faavae faa-Palemene a Niu Sila. Parliamentary Practise in New Zealand e faaigoa o le McGee test. Talu ai o le fesootaiga vavalalata (relevance) o le mataupu ua suesueina nei ma mataupu na silasila i ai Komiti faapenei i Niu Sila ma Ausetalia, ua ono talafeagai ai i le Komiti ona silasila i elemeni nei e 3, the 3 elements, e faamaonia ai tuuaiga. (1) Pe faamaonia le sao ma le moni o saunoaga ma faamaumauga a le sui usufono i totonu o le Palemene? Does the Member's statement and evidence tabled in Parliament contain any apparent or proven factually incorrect matter? (2) Pe sa silafia e le sui usufono i le taimi o ana saunoa, ma le taimi na tuuina atu ai i le Laulau-a-Fono ana faamaumauga, ua ia taitaiseseina le Palemene? Did the Member know at the time the statement was made and the time the evidence were tabled in Parliament, that he was misleading Parliament? (3) Pe sa taumafai le sui usufono ma le mautinoa e taitaiseseina le Palemene i ana saunoaga ma faamaumauga? Did the Member deliberately attempt to mislead Parliament by way of statement and evidence? The Standard of Proof. Tulaga talitonuina o faamatalaga nei, molimau na fofogaina. I le fuafua tataua ina o se iuga talafeagai mo mataupu faapenei, e manatu ai le Komiti. So o se sui usufono ua solia tulaga aloaia ma amio taualoa a le Palemene, e limataitaina suesuega nei i le tulaga talitonuina lea o faamatalaga molimau na tuuina mai, i luga o fua faatatau o mea e ono tutupu mai. In determining the outcome of this matter, is of the opinion that for these particular matters such as breach of Parliamentary privileges, the standard of proof required is the civil standard of proof on the balance of probabilities.

Lau Afioga i le Fofoga Fetalai, se i ou agai atu la e auiliili taitasi elemeni nei e 3. E faatatau i mau ma molimau sa tauaaoina e le Komiti. (1) Pe faamaonia le sao ma le moni o saunoaga a le sui usufono i totonu o le Maota. Na taua manino e le sui usufono i ana saunoaga, o le aso 24 ma le 27 o Ianuari 2020 “O au nei sa faatau lau standby power 200kva e le i mamao tele atu, e na o le \$100,000 na alu ai.” faamauina i le (itulau 981 - Hansard 24/01/2020)

Lau Afioga i le Fofoga Fetalai, o le tau atoa upgate quote na tuuina mai, e \$72,210.00 faatupeina lea i totonu o le taumafaiga a lenei aiga. Ma na taunuu mai le afi, na faagaoioina uma e le Kamupani o le Freight Plus i Vailoa Faleata. (Faamauina i le itulau 988 Hansard 27/01/2020). I le ma le isi na faamaonia mai lava e le sui usufono i le feiloaiga ma le Komiti i le aso 7 Me 2020, na te le i faataua mai se afi 200kva. O lana saunoaga i le Maota na faavae i lona faamoemoe sa i ai, o le faatauina mai o sana afi eletise 200kva mo lona itumalo. Ua ogatasi lea ma le molimau a le Pulega o le Matagaluega o Tiute ma Tupe Maua. E leai se afi eletise na faaulufale mai i le atunuu i lalo o le suafa o le sui usufono i le tausaga e 2019. E vagana ai le afi eletise e 30kva na aumai i le uta faamomoli i le faaiuga o le tausaga 2017. O lea o lo o mafai ona faamaonia i pepa o vaa uta (bill of lading) o lo o faapipiina atu i le lipoti.

O le molimau a Faumuina Wayne Fong, ma le Pule Sili o le Freight Plus i luma o le Komiti, latou te le i faagaoioiga le kiliaina o le afi faaleoleo a le sui usufono, o le matafaioi patino lea sa nafa ma le alii ofisa o le tiute. Ona o ia mafuaaga lau Afioga i le Fofoga Fetalai ma le Maota, ua faamaonia ai e le Komiti, o saunoaga a le sui usufono na faia i luma o le Palemene i le aso 24 ma le 27 Ianuari 2020, e lē sao, e le moni ana saunoaga. (2) Pe sa silafia e le sui usufono i le taimi o ana saunoaga, ua ia taitaiseseina le Palemene?

O saunoaga a le sui usufono i le feiloaiga ma le Komiti, e atagia ai, na ia silafia lelei lava le faamaoni o ana saunoaga i le taimi na fai ai i luga o le Palemene, sa ia silafia lelei lava e leai se afi eletise e 200kva na ia faatauina mai. Na ia tautino foi i luma o le Komiti, sa ia taumafai e faaauauina pea lona tauina o le afi 200kva i ana saunoaga, i lona talitonuga, afai na te faaaogaina lana afi 30kva na faatau mai. E finau ai le mataupu, o lona uiga e le lava le malosi e lagolago ai lana mau. Ona o ia tautinoga lau Afioga i le Fofoga Fetalai, ua faamaonia ai e le Komiti, o saunoaga na faia e le sui usufono i luma o le Palemene i le aso 24 ma le 27 Ianuari 2020, sa ia faia lava ma le mautinoa, ua ia taitaisese le Palemene. (3) Pe sa taumafai le sui usufono ma le mautinoa e taitaiseseina le Palemene i ana saunoaga? Lau Afioga i le Fofoga Fetalai ma le Maota, sa taumafai lava le Komiti e faapaleni tulaga ia, i le amanaia o le aano moni o lona finagalo, sa taumafai i ai lana mau i lenei mataupu i le taimi o Tualumaga a le Palemene. O lana folasaga i luma o le Komiti, na mafua ona ia taua le afi 200kva i lana saunoaga, ona o se pepa tauofo aupito lata mai (update quote), o le afi

200kva o lo o fuafua e aumai mo lona itumalo. Ina ia faamalosi ai lana mau ma ana saunoaga, aua ana faapea na te taua le afi eletise e 30kva, o lona uiga e le malosai lana mau. Ona o ia tautinoga, e talitonu le Komiti, sa taumafai lava le sui usufono ma le mautinoa, e taitaiseseina le Palemene, aua foi ua na o ia o lo o silafia le uiga moni o lana saunoaga, na fai i le tulaga aloaia i totonu o le Maota. E pei ona ia faamatala auililli i luma o le Komiti. Lau Afioga i le Fofoga Fetalai ma le Maota, e tele lava le avanoa sa tatau ona ia toe faasao ai lana saunoaga, pe a fua i le va o le aso 24 ma le 27 Ianuari 2020. Ae peitai na te le i faasaoina ana saunoaga.

Lau Afioga i le Fofoga Fetalai ma le Maota ona ou oo mai lea i le tulaga i faamaumauga na faataatitia i le Laulau-a-Fono. Ou te fia tautala ai foi i elemeni lava ia e 3. E taua mo le mataupu lenei, (1) Pe faamaonia le sao ma le moni o faamaumauga na tuuina mai i le Palemene i le aso 27 Ianuari 2020? I Iloiloga a le Komiti, na faamaonia ai le lē sao o pepa ma faamaumauga na tuuina mai e le sui usufono i le Palemene e pei ona faamaonia mai. (1) Pepa o uta o Vaa (Bill of Lading) e mo le afi eletise 30kva ae le o se pepa mo le afi eletise 200kva. (2) Na faamaonia mai e le Matagaluega o Tupe Maua ma Tiute e leai se afi eletise 200kva na aumai mai fafo i lalo o le suafa o le sui usufono i le tausaga e 2019, ae na o le afi eletise e 30kva na aumai i le tausaga e 2017/2018. Ua faamonia ai e le Komiti le lē sao o faamaumauga na tuuina mai e le sui usufono i le Palemene i le aso 27 Ianuari 2020 mo le faamaoniaina o ana saunoaga na faia i le aso 24 Ianuari 2020. (2) Pe sa silafia e le sui sufono i le taimi na tuuina atu ai ana faamaumauga i le Palemene i le aso 27 Ianuari 2020, ua ia taitaiseseina le Palemene? Na faamaonia lava e le sui usufono i le feiloaiga ma le Komiti i le aso 7 Me 2020, o le pepa tauofo aupito lata mai (update quote), na ia tuuina atu faatasi ma faamaumauga i le Palemene, mo lona faamoemoe o lana afi eletise e 200kva e fia faatau mai, mo lona itumalo ae le i faatauina mai. O ata o lo o faapipiina atu i le lipoti na pueina i le lotoa o le Kamupani o le Freight Plus, lea na tuuina mai ai ana faamaumauga i luma o le Palemene, na ia faamaonia mai ai i luma o le Komiti, o ata na o le afi eletise 30kva na faatau mai. Ua faamaonia ai e le Komiti, sa silafia lelei e le sui usufono i le taimi na tuuina atu ai ana faamaumauga i le Palemene i le aso 27 Ianuari 2020, ua ia taitaiseseina le Palemene. (3) Pe sa taumafai le sui usufono ma le mautinoa e taitaiseseina le Palemene i ana faamaumauga. O faamaumauga na faataatia e le sui usufono i le Laulau-a-fono a le Palemene, o lo o atagia manino mai ai, o lo o ia silafia lelei lava le atoaga, the content, o ia faamaumauga ma le taunuuga e taunuu i ai. Sa tatau foi i le sui usufono ona sili faamaumauga sao e fesootai ma lana saunoaga sa faia i le aso 24 o Ianuari 2020 i totonu o le Maota lenei, ae peitai ua ia taumafai lava e tuuina atu faamaumauga sese e lagolagoina ai lana mau sa finauina.

Lau Afioga i le Fofoga Fetalai ma le Maota, ua faamaonia ai e le Komiti sa taumafai ma le mautinoa le sui usufono e taitaiseseina le Palemene i ana faamaumauga na tuuina atu i luma o le Palemene i le aso 27 Ianuari 2020.

Ona ou oo mai lea i le Fautuaga a le Komiti. Lau Afioga i le Fofoga Fetalai, a o le i tuuina atu le Fautuaga a le Komiti. Sa toe iloilo atoa e le Matagaluega o Tiute ma Tupe Maua ia oloa e 5 e le i tiute ina. (1) E aofia ai ma le afi eletise e tusa ma le Tulafono o Tiute 2014, i le aso 2 Mati 2020 ma maua ai, o le aofai atoa o le tiute e tataua ona totogi, e \$7,405.40. Ma ua maea ona totogi e le sui usufono ma lona aiga i le aso 13 Mati 2020. Ua mautinoa foi i le suesuega, o le le faamaoni lava o le alii ofisa sa faatinoina le galuega, na mafua ai ona tulai mai lenei faaletonu. Ua faatinoina foi e le Pulega o Matagaluega o Tiute faasalaga ma tuutuuga talafeagai mo lea foi taulealea e tusa ma lana tautua.

Le mamalu o le Palemene, o le sui usufono mo Gagaifomauga Nu 3, ua leva i le Maota. Sa avea ma sui Fofoga Fetalai i le 5 tausaga, sa tofia e fai ma Fofoga Fetalai mo le 5 tausaga. O ia foi o se sui usufono sa umia le tofi Minisita o le Kapeneta, e talitonu ai le Komiti ua lava le silafia o le sui usufono, i aiaiga ma aulape o le Tulafono, o lo o faafoe ai galuega a le Fono Aoaio Faitulafono. Ma ua tataua ona tausisia i taimi uma, i le faatinoga o tiute faa-sui usufono o le Maota.

Ona taunuu mai lea i le fautuaga a le Komiti, e faavae i luga o Sailiiliga maumaututu ma le mautinoa, ua faamaonia ai e le Komiti o Tulaga Aloaia ma Amio Taualoa le solia e le sui usufono mo Gagaifomauga Nu 3, o le Fuaiupu 186(b) o le Tulafono Tumau. Ma ua fautua ai le Fono Aoaio e faapea;

Ia tuueseina pe faamalolo le tumau le sui usufono mo le itumalo faa-palota mo Gagaifomauga Nu 3, mai le galuega a le Fono Aoaio Faitulafono mo le 3 masina. E tusa ai ma le Fuaiupu 21(4) o le Tulafono o Pule ma Tulaga Aloaia o le Fono Aoaio Faitulafono 1960. Afai o lea, e amata atu i le aso e faamaonia ai le Fautuaga a le Komiti o Tulaga Aloaia ma Amio Taualoa a le Fono Aoaio Faitulafono. O le a lē agavaa foi le sui usufono nofosala, i totogi ma alauni faa-Palemene e tusa ai ma le Fuaiupu 21(5) o le Tulafono o Pule ma Tulaga Aloaia o le Fono Aoaio Faitulafono 1960.

Iugafono: I le maea ai o Sailiiliga a le Komiti o Tulaga Aloaia ma Amio Taualoa, ua faaiugafonoina ai e fautuaina le Fono Aoaio Faitulafono ina ia talai ma faamaonia lana Lipoti. Ia faatumauina pea le maualuga, ma le mamalu o tulaga aloaia o le Palemene o le Malo Tutoatasi o Samoa. Soifua ma ia manuia.

**FOFOGA FETALAI:** Malo i lau Afioga i le Taitaifono o le Komiti o Tulaga Aloaia ma Amio Taualoa. E tapa le sui usufono e faaluaia le...

*Faalua e le sui usufono mo Lefaga ma Faleaseela ma le sui usufono mo Falealili i Sisifo.*

**FOFOGA FETALAI:** Tulai mai le sui usufono mo Salega. E te tulai mai e faalua le lafo?

**Tofa OLO FITI AFOA VAAI (Salega Sasae):** E leai, a lea ua uma ona faalua mai o, ae o lea o le a fai atu sina tamai tala e tusa ai ma le lipoti.

**FOFOGA FETALAI:** Malie se i tuu atu muamua le avanoa i le Palemia.

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAIELLE MALIELEGAOI:** Lau Afioga i le Fofoga Fetalai, ou te tulai atu e momoli le faafetai i le Taitaifono ma la outou Komiti. E tusa ai ma le lipoti ua tuuina mai. Lau Afioga i le Fofoga Fetalai e tusa ai ma tulaga taualoa, ou te manatu e pei o le avanoa lenei, i le Afioga i le sui usufono mo Gagaifomauga Nu 3, pe tatau ai ona tali mai i le lipoti, faapea foi le sui usufono sa tu tu ae e luga, se i sausaunoa mai, ona avatu ai lea o ni manatu o i matou nei, e fia tofu sao i le lipoti matagofie ua tuuina mai. Ua tele foi masina o latou auiliiliina aemaise o le tagofia o molimau esee ma ata ua tuuina mai, mo le silafia e le Palemene. E taua tele le lipoti ua aumai, ae taua foi le tatou faafogafoga loa i sui o lo o aafia i lenei mataupu, ona avatu ai foi lea o nai o matou manatu i le mataupu e pei ona laga i le taeao nei.

**Tofa OLO FITI AFOA VAAI:** Lau Afioga i le Fofoga Fetalai, e le toe nanea lava se matou tala, pe a faapea o le a muamua saunoa le o tuuaia.

**FOFOGA FETALAI:** Malie le sui usufono mo Salega, se i fai atu sau faamatalaga. E leai e avea foi lenei avanoa, e leai e le faigofie le faatinoga o le lipoti, malo faafetai. Ua manino ma malamalama o lea foi ua faafofoga mai Samoa, ae faapena, e lelei lava ona aumai manino, aumai foi le Fautuga a le Komiti, malo faafetai e le laeiina pe tau faafuluina. Ae na ona ou tapa i le sui usufono mo Salega, faapea ai e te tulai mai e faa-tolu le lipoti a le Komiti. Ae ui i lea, e leai o lenei e te fia saunoa i le mataupu lenei. Ae pei e manatu foi lea i ala o mea, e pei e manaia le fua o saunoaga i se finagalo o le sui usufono o lo o aafia o Gagaifomauga Nu 3 i sona finagalo, ona avatu lea o finagalo o le Palemene, ae leaga le see o le vaa o le Palemene ae faatautuaaupega sona finagalo e aumai i le Palemene. E pei foi o ananafi sa faamaualalo faamaualalo le sui usufono, ae oo i le taimi mulimuli ua toe tauai mai foi nai isi maa, ae lelei pea ona tuu atu le avanoa i le sui usufono mo Gagaifomauga Nu.3, a fia saunoa i le amataga ona o ia lea faasino i ai le

Lipoti lenei, ona tuu atu lea o le avanoa muamua i ai, ae le tauanauina e le Nofoa. Afai e leai, ia e faapena...

**Tofa Hon Faasootauloa Pati Taulapapa (Gagaemauga Nu.2):** Lau Afioga i le Fofoga Fetalai...

**FOFOGA FETALAI:** Ia malie le sui usufono, o e faafofoga mai o lea ou te fai i o?

**Tofa Hon Faasootauloa Pati Taulapapa:** O lea ou te faafofoga atu.

**FOFOGA FETALAI:** Ia, malie le sui usufono, se i tulai mai le sui usufono mo Gagaifomauga Nu.3.

**Susuga Hon LAAULI POLATAIVAO LEUATEA:** Faafetai i lau Afioga i le Fofoga Fetalai, ou te tulai pea ma le ava ma le faaaloalo tele, a o lo o epa le laufono i le paia o le tatou Maota i lenei taeao, aemaise foi le faafofoga tapuai mai o si o tatou atunuu e ala i le tauavameaina o lenei mataupu. E le o se mataupu na fai ananafi, o se mataupu foi ua leva ma vaeseuga o taumafai pea e lauliliu po o fea o taatia ai le amiotonu. Ona ou manatu lea lau Afioga i le Fofoga Fetalai, ta te tulai atu lava a o mata o maasiasi. E lagona foi le vaivai o le loto, ua mavae foi atuvasa i le po anapo ma le talitonuga ua maea atu mea sa feagai ai i futia ua sola ma aso ua alu. Peitai, i lenei taeao ua ta toe alafai foi i puapuaga ma ta vaai foi i ataatafasia ua toe agai mai.

Lau Afioga i le Taitaifono, faafetai mo lau Lipoti ma la outou Komiti ma outou uma o lo o saina mai ai leaga o la outou lea matafaioi, sa filitagaga i ai o outou o le Komiti aloaia a le Palemene e faasao ma filifili ma faatulaga le mataupu lenei i le mea e tatau ona i ai. Faafetai ua talia sau talosaga na avatu, leaga e le tatau ona toe faia se suesuega a le Komiti o Tupe o lea matou te finau i le mafuaaga na ala ai ona ou talosaga atu. Na ala ona ou talosaga atu le Komiti, silasila le atunuu po o le a le mea ua taugata ai le afi moli na aumai. O le a le mea ua ova ai i le \$300,000 le afi moli na aumai mo le falepuipui. O le mafuaaga lea, o le motive lea na ala ai ona ou tulai ma fofola i le Palemene. Aisea? Aisea ua faaalu ai lenei tupe tele? A o lea ou te molimau atu, o le tau lea e mafai ona ou aumaia i le Palemene.

E faamalulu atu i le Komiti i sau upu ma sau tala na ou faaalua manino. Ou te le i alo i le ata o le laau, na ou faaalua o le faamaoniga na aumai lau afi, na aumai lau afi. O le a le malosi? O i ina lea na ou fetuunai ai, o i ina tonu lea na ou manao e fetuunai ai aua e mafai ona ou aumaia se tau o le afi \$200,000 e alu ai le falepuipui. Peitai, e le i talia e le Komiti o Tupe le quote lea na ou aumaia, a o le proof lenei o le tau e tatau ona alu ai le falepuipui, e le tatau ona oo i se \$200,000. Na ou faamalulu foi i le Komiti leaga o tatou saunoaga

ma tuleiga e fa ii le Maota lenei, o felafolafoaiga faalauaitetele e span lau talanoa ma lau tautala, ae le o se agaga faapea ua ou taumafai e faasese le Palemene, tulou lau Afioga i le Fofoga Fetalai. O lau tautoga na ou sau ai i le Maota lenei, ou te le faia se mea e tasi pe ou te olegia le Palemene, a o upu ma tala, Toleafoa, o oe o le toe Ulutaia o le Maota, o lauga faalauaitetele, e ave i luga ma ave i lalo fai le faatusatusa ina ia manino lata mau na ave. O lau mau, o le a le mea o le a maumau ai le \$300,000 e faaalu i le falepuipui, o lea ou te mau e le atoa se \$100,000 e fai ai. O lou manaoga ma lou faaunautai, ia sefe tupe a le atunuu. Peitai, ua avea ai ma lape o lauga upu ia, o le agaga moni lena. Ou te le i toe alo lava i se upu. Mr Chairman, I have proven my point, I present to you, 200 kva e mafai ona ola ai le falepuipui, e le atoa se \$100,000. O le faamaoniga lena o lau tala na avatu, a o lea ua sisi faatautau ai nei ta ita. E sao le quote na avatu. O le faamaoniga, e sao le quote na avatu, e le tatau na ova i se \$300,000 se afi mo le falepuipui.

Ia, e lagona lava le faanoanoa i lau Afioga i le Taitaifono leaga ua e afisi le Komiti o Tupe ae toso faatata lenei itumalo. O le a le mea ua le tapa ai quotes na saunoa i ai le Taitaifono? Na ou finau atu, na ou finau atu, aumai la quotes na sa fai mai ai le Taitaifono, o le quote sili lena ona maualalo e \$300,000. Ia paga lea, o lea ua faafofoga le atunuu ua faafa ona e taua le olegia, olegia, olegia le Maota. A o lenei lava ta te nofonofo atu ma ta vaai i le fua i luma, fua i tua.

E ui o lea lau Afioga i le Fofoga Fetalai, ua ou manatu ua lava ia le Atua e fai ma au molimau i le aso lenei, i se mataupu sili ona faigofie, o tu ma aga o upu ma tala ma uiga o upu ma lape o lauga. Ia o lea o le a tulituli au pei se tagata fasioti tagata ua ou pepelo i le Palemene. E faapefea ona faatusatusa ma isi mea tetele ma faalavelave tetele na tutupu i le atunuu na lamatia ai le soifua, na e taitai ai leoleo i Satapuala e fai le puipuiga o le atunuu. E faapefea ona faatusatusa si au tala o le eseese o le malosiaga o le afi ma le mea lea ua faatea ai au? Na faatea Toolesulusulu i i? Na faatea? I le mea na poloka ai le auala ma toeitiiti o ifo e faaoo le oti i tagata. A o le a le mea ua fai ai lea mea ia ta ita?

Ia, ou te faamalulu atu i le Palemene, lau Afioga i le Fofoga Fetalai, ou te faamaualalo atu, leaga o lea foi ua... talofa e, se e le i pepe ota manua i le mea na fai nei a o lea foi ua toe agai mai le isi mea. Ou te faamaualalo atu i lau Afioga i le Fofoga Fetalai pe afai ua faapea ona feeseeseai lou lagona ma lou manatu o au e uiga le upu, o au foi e ona le upu, o au foi e faauigaina le upu. Ae peitai, o lea ua outou faauigaina i lo outou lava manatu. O le faamasinoga o le amiotonu na o le Atua, na o le Atua o lea foi ua saunoa le Taitai o le Malo, I can influence the court, but I can't influence. E tasi ae foi, leaga e silafia e le Atua, e leai se mea faapena na tupu. A ua ou faatoese atu lau Afioga i le Fofoga Fetalai, Toleafoa, afai ua ou lape i upu o lauga, e faamalulu atu i le Maota, e leai sou agaga ou te oleole pe ou te tauvaleina le Palemene. Tulou le Palemene o Samoa, leaga e le o se mea lena a au e fai.



Ou te le faalataina foi le Palemene i ni au upu ma tala, ae silasila i le agaga na ou momoli ai, ia sefe tupe a le atunuu. Ia o lea ua tuu le mea na ou finau ai ae liliu mai le spotlight ia te au, ua tulituli au i lau afi ma le mea sa fai. Ia, e faamalulu atu foi Faumuina, Leatinuu, e silafia e le Atua le upu na ala ai ona ou taua lau Afioga leaga o si au kamupani lea sa aumai ai le afi. E leai se collusion i le mea lea na fai nei, e mama lau Afioga ma le mataupu lenei. O lea foi ua saunoa le Afioga i le Taitaifono e ala i le alo o Samoa lea sa faia le tiute, o lana lena matafaioi. Ou te le i alu atu foi fai ni tulaga e fai se influence pe bribe, leai lau Afioga. Ae pei o le agaga lena lau Afioga i le Fofoga Fetalai ua ou manatu, le Palemene o Samoa, ia outou malilie. E faamalulu atu lava i se upu ma se tala, e faamalulu atu pe afai o uiga ia ua faauiga faapea lou taumafai atu. E tasi le auga o lou taumafai atu ia sefe tupe a le atunuu. When you go to catch a terrorism, you have to be a super terrorism. O le agaga lena. Ae afai ua ou sala ai, ia e faamalulu atu. O le a teu i lou fatu la outou faaiuga ma la outou iugafono. Le Palemene o Samoa, ua ou faatoese atu.

Lau Afioga i le Palemia o le a folo pea le oona, o le a folo pea le oona i le mea o lo o ta finau ai pea i taimi uma, o lou lagona na o le Atua o lo o i ai le faamasinoga o le amiotonu, ae lafo atu i o outou aao, i a outou Afioga i sui usufono, o lea ua ou faalalolalo atu afai ua ou sala ona o iu o upu ma lape o lauga, e faamalulu atu, ae tasi, tasi lava lou faanaunautaiga, ia ou agai i le lipoti e sefe tupe a le atunuu.

Le faafofogaaga a Samoa i lenei aso, ia talofa e, ua tuaoi afa ma afa, ua tuaoi foi puapuaga ma faigata, a o lenei sa faapea o lenei taeao fou o le a ta mapu ane mapu ifo, a o le lagona, tatou saili le amiotonu. E leai sou loto e faia, le tatou Palemene, afai o le a lo outou finagalo i le aso, ou te savali ma le filemu. Toleafoa, ou te tausi i le Tulafono Tumau. E le mafai ona ou agai e toe fai se isi faaiuga po o le a le faaiuga i le aso lenei. It's now Parliament Court, ma e le feaiaai tulaga tau faamasinoga. A o fea o le a ta toe sulu i ai? E ui o lea, o le a foi sou lagona. O le a lafo i le Atua i le ogatotonu o le Maota lenei po o fea o lo o i ai le amiotonu.

O se upu ua laavale i le faafofoga a Samoa ma lou itumalo, ia outou tapuai maia, tatalo malosi mai ia outou outou tatalo malosi mai i nei foi puapuaga ua toe oo mai. Ma le talitonuga, o lo o silasila le Atua. Le Atua, afai ou te sasi i le mataupu lenei, fai lau faaiuga i lou ola, o upu tautino lena. Ae afai o nisi o mea foi o lea ua toe agai mai, faamagalalo ia i latou ua latou le iloa le mea ua latou faia. Ma lou agaga faaaloalo.

**FOFOGA FETALAI:** Malo. Faafetai.

**Tofa Hon Faasootauloa Pati Taulapapa:** Lau Afioga i le Fofoga Fetalai, pe maua lava sou avanoa faamolemole.

**FOFOGA FETALAI:** Ia se i tulai mai, o avanoa e tai 10 minute, e faamanatu atu i sui usufono mamalu, o ai le sui usufono e fia saunoa, e na o le 10 minute. Ia tulai mai la, se i ave la i o i le alii matua... Tulai mai... Se i tulai mai lau Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, e taua tele ia te au le Lipoti lea, leaga na matua manino lava le Lipoti, ae pei lava o le ao ia te au le mafuaaga o le mea lea. E le o se mea foi na tupu atu i le Kapeneta, e le o se mea foi na tupu atu ia te au. Silasila i le saunoaga a le sui usufono, silasila i le saunoaga a le sui e pei o au lea e mafua uma ai nei mea. Ou te le i amata se mea. Na pau lava le mea lea sa ou tulai atu ai, ia taofi le tuuaiga sese e piopio le tapenaga a le Matagaluega o Leoleo, piopio i le aumaiga o le latou Tala o le Tupe i le afi lea e moomia mo Tafaigata, lena la e aumai ai le \$300,000 e le o le afi atoa, sa faasalalau, tauofo, e \$100,000 ea le tau o le afi, ma mea o le fale ma isi mea e mafua ai le mea lea e teu ai le afi ma mea o gaoioiga uma e tatau ona fai, o le taiga o uaea ma mea faapena. A o le afi lava ia lea ou te tau tomanatu ua fai si leva e \$100,000. A o tuuaiga ia na fai, e piopio le Minisita, piopio le Matagaluega o Leoleo, e faa-kuluku na fai. E masalomia ai sa fai ma se tau i ai. O lou tulai atu la i le aso lea e faamama le Malo, faamama le Minisita o Leoleo faapea foi ma le Komesina o Leoleo, sa sao lelei le tapenaga o le latou paketi ma le tau o mea ia. Na pau lava lena o le mea na ou naunau i ai. A o le tu faafia ae o le sui usufono na ou tapa ai loa faamaoniga, leaga o au na amata na ou masalomia, e le iloa pe sese leoleo na ala ai ona ou tutu atu soo, na iu lava i le naunau o le sui usufono, na iu lava ina ou tapa ai loa faamaoniga, na e sau ma au faamaoniga i le isi aso. E le o ni lape la o lauga. Na e sau ma le faamaoniga i le isi aso, pepa na faataoto i totonu o le Palemene, na tufa mai ia matou. Na ou tilotilo loa i ai, tupu ma lou masalosalo e le sao mea nei, e le sao ua tatau ona fai le suesuega, na mafua ai nei ona tilotilo loa i mataupu ia. Ia se i vaai e te le i amata ona fai lau lauga ae e valaau mai ia te au o au lea e faufau leaga ia te oe. Ou te le o faufau leaga, na pau lava le mea, ia mama le Ofisa o Leoleo ma le Malo ma i latou uma na tapena le Tala o le Tupe.

Lau Afioga i le Fofoga Fetalai, o lea sa tutulai mai le isi sui usufono le la lea e tuuaia na aafia i le aumaiga i tua o le afi. E lelei ona faamama foi ma ia se i tu mai i luga se i fai sana saunoaga a o le i avatua a matou lauga ma le matou sao i le mataupu lenei, pe oo lava i le po nanei o tatou taufai lauga uma i le mataupu lenei.

Lau Afioga i le Fofoga Fetalai, e pei o si au tulai atu lena, pe mafai lava ona tuu se avanoa i le sui usufono lea ia Faumui, latou nei e toatolu e tutu mai pea tutu mai pea, e tutu faatasi, o lea ua uma ona fai lana saunoaga e pei e foliga mai o ia le isi tagata mama, ia se i matou faalogologo.

**Afioga Faumuina Asi Pauli Wayne Fong:** Ia o le a tuu atu ia le avanoa i le toeaina matua o Saleaula. Faafetai.

**FOFOGA FETALAI:** Faafetai. Ia, se i tuu atu le avanoa ia Gagaemauga Nu.2, lau fetalaiga Faasoo.

**Tofa Hon FAASOOTAULOA PATI TAULAPAPA:** Faafetai i lau Afioga. Saleaula, tapuai mai, o lo outou sui usufono lea o le a faia so outou finagalo i le tulaga o le Palemene o Samoa. O Samoa ua taoto a o se alaoo.

Lau Afioga i le Fofoga Fetalai, faafetai lava i le mataupu lenei, o lea ua fai le faaiuga a le Komiti Faatonu. Ae faafetai i lau Afioga i le Palemia, o Saleaula e le nofonofoai, a o ona tiute ia e fai mo le sailiga o le filemu, ina ia alofa mai le Atua, ia afio mai ina ia tofu lagona uma e Samoa o potopoto ma faafogafoga mai, aemaise le Palemene o lo o latou veteia upufai o Samoa ma lona finagalo. Lau Afioga i le Palemia, faafetai tele lava. O au foi e le masani ona ou tautala i tulaga o upu faapenei, ae talu ai a oo loa i mea faapenei ona ou talitonu lea e tatau ona ou soso atu i ou tafatafa lau Afioga i le Palemia ma sui usufono mamalu mai Salafai. Ou te le tulai atu i Upolu nei, o mea e lelei i Upolu nei, e lelei i Salafai. E lagona lava le faanoanoa, o lea ua tau lau o le faamoemoe ma tulaga e pei ona alo atu i ai le Palemene aua se lelei o Samoa ma lona tau atinaeina. Ae paga lea, o upu lava ia e luga lalo ae matua lava i le oo. Faafetai lava i lau Afioga i le Palemia, e leai lava ma se mea. O lau foi fautuaga, Laauli, e foliga mai o au e pei e au ia Laauli i le ma mafutaga ma Laauli i le Matagaluega, e tutusa ia te au tagata uma. A o le tulaga o le faamoemoe, o lea ou te tatalo atu i lau Afioga i le Palemia. E ui lava o a tulaga ua oo i ai faamoemoga o le Palemene ma tulaga o upufai o Malo i le HRPP ma lona tulai mai, o lea ua ou tatalo atu, o fea o i ai le tofa ma le faautaga? E le o le taimi ea lenei e toe liliu ai lau faautaga mamao ma lau faautaga oo lau Afioga i le Palemia ma le Taitai o le Malo.

**FOFOGA FETALAI:** Se i tulai mai lau Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, e avatu lava si au faasaoga lea i le saunoaga a le sui usufono, e le i faia se matou manatu, o lea foi ou te lagona foi o le toatele o le Maota lenei e fia sausaunoa i le mataupu lea. E le mafai ona faia o matou manatu se i uma mai, aua o le faiga lea e fesili muamua ia i latou o tuuaia se i aumai muamua so latou taofi ona faatoa mafai loa lea ona faaali ni o matou manatu. Ae pei ua sese le taimi e tulai mai ai le lauga a Saleaula, o la e tatalo mai ia te au, na te le o iloa ni ou manatu. E pei o le mea lena, o lea se i tau, o lea foi e tau faufau malie o matou manatu se i uma ona oo mai se

faamalamalamaga mai le isi sui usufono lea e aumai i le Lipoti ona maua ai lea o le avanoa se i matou fai ai ni o matou manatu.

E pei o le tulaga lena o lea ou te tulai atu, ina ia malamalama lelei le faavae o tatou faaiuga, leaga e tautala nei mo le lumanai, e tautala le aso mo le lumanai mo le puipuiga o le Palemene lenei o Samoa, leaga o tatou o lupe na faia mai le fuifui. E le tatau ona mama ni lafoga e fai i totonu. O au na ou lagolagoa tele le finagalo o le sui usufono mo Gagaifomauga Nu.3 ona ua ou masalomia le sao o mea ia na fai e le Matagaluega o Leoleo. O le agaga tonu lena na ou tulituliloa ai ma faataua ia te au le saunoaga a le sui usufono mo Gagaifomauga Nu.3, ua ou masalomia le aufaigaluega a le falepuipui i le sao o le latou fuainumera na aumai i totonu. O le ala lena na ala ai ona taua tele ia te au le faaaliga a Gagaifomauga Nu.3, a o lea la ua malaga iugalu i le mataupu, pei o le mea lena o lea e tau faufau atu ai o matou taofi, a o lea ua vave faalava i i Saleaula. Saleaula, malie ia e le i taitai ona tatou oo i tulaga na. Pe oo lava i le po nanei o tatou talanoa i i, leaga e talanoa le aso mo a taeao.

**FOFOGA FETALAI:** Ua ou manatu o lea ua manino le saunoaga a le Palemia e faapupula i sui usufono mamalu o le Palemene. Aua tou te agai mai i le Palemia, e le i faaaliga se finagalo o le Palemia. O faiga ia masani a le Palemene, a aumai ni mataupu i luma pe saunoa foi e tapa faamaoniga ona aumai lea ona ave loa lea i le Komiti latou te iloiloia. E le faatoa tupu nei ananafi i le mataupu a Laauli, tulou, e leai, na ona sese lava o lau laa e faapena. O le mea e puipui ai le tatou Tulafono Tumau, aua ne i faafaagogo tagiao le paia o le Palemene. O a manatu e aumai, e faapena. E leai, ia aumai mea moni, mea moni lava i totonu o le Palemene ina ia faapena ona soalaupule ma fai i ai le finagalo o le Palemene. O le ala foi lena sa ou tapatapa atu ai i le taimi na saunoa ai le sui usufono mo Gagaifomauga Nu.3, ia aumaia o lape o lauga aua ou te lagona lava i ou tino o mea ia, o mea foi nei e pei e faataumate, ae peitai, e leai o la e sa fai lava i le finagalo o le sui usufono mamalu. E ui i lea, i se taimi... O lea ua saunoa. Ou te fautuaina le sui usufono mo Saleaula, e faapea, agai i le mataupu pe e te lagolagoia le tulaga o ni mataupu le faamaonia i totonu o le Palemene pe leai, ae te le saunoa mai agai i le Palemia aua leaga e le i faia e le Palemia. O le faaiuga lea o le fautuaga o le Lipoti a le Komiti, ae mafaufau i ai pe a tatou o i le tatou malologa i lau fautuaga lea e fai atu. Ae ona o lea ua e tu mai, ae o lea foi e tuu atu ia oe ae ese le mea e faasaga i ai lou finagalo.

Talu ai ona o lea ua tatou taunuu i le tatou malologa masani, o le a faataatiaese Galuega a le Fono mo lana malologa.

*Na faataatiaese Galuega a le Fono Aoa mo lana malologa masani i le itula e 10:51 i le taeao ma toe amatalia i le itula e 11:37 i le taeao.*

**FOFOGA FETALAI:** Ou te faasilasila atu ua toe amatalia Taulumaga ma Galuega a le Fono Aoaofaitulafono a le Palemene.

E faataatiaese Galuega a le Fono Aoaofaitulafono o saunoa le sui usufono mo Gagaemauga Nu.2. Ia, ou te tapa ma le faaaloalo lau Afioga i le sui usufono e tulai mai toe 2 ou minute.

**Tofa Hon FAASOOTAULOA PATI TAULAPAPA:** Faafetai tele lava i lau Afioga i le Fofoga Fetalai. Ia ua tele foi lena 2 minute. E momoli atu le agaga faafetai i lau Afioga i le Fofoga Fetalai ma le mamalu o lenei Palemene. Ua manatu foi ua maua foi se isi faamalosiaga aua le taliga o le malu taeao pei ona tatou i ai. Ae ua le o tele foi se agaga e pei foi o le faalogologo atu i le Lipoti a le Komiti. Ia o lenei lava itumalo e le tagisa. O a foi tulaga e i ai, e leai lava se isi e atoatoa. O lea ua aumai foi folasaga, a o le tuualalo foi lea a lenei itumalo. E le nofonofo ai Saleaula i tulaga o aso faapenei. Na ona tuu atu i ou tafatafa, a o mea uma lava e pule mai le Atua. O ni sese ma ni leaga, o ni sao ma... o le Atua lava e toatasi tatou te ave i ai. O a tulaga o fuafuaga faale-Malo mo le lumanai manuia o Samoa ma ona tagata, e pule le Atua. O lea foi ou te talosagaina, o au ou te le... faapea ai ou te au ia Laauli, o le ma mafutaga lava ma Laauli mai lava i le amataga e tutusa lava ma Lopaofo foi e pei ona i ai. Pe alofa mai Lopaofo pe leai, ou te alofa lava i ai. E tutusa lava ia te au tagata uma. O le mea lea, Laauli, o pule uma lava mai le Atua. O le Taitai o le Malo, o le matai sili lena i le tatou Palemene e pei ona tatou i ai. O a fuafuaga a le Taitai e aumai, tatou ave lea i uta. E i ai lou taimi, e i ai o tatou taimi ina ia faapena ona tatou ola ma le mautinoa, o le ala lava i le pule o le tautua. E leai se isi o tatou e atoatoa, ma agasala tatou uma ma ua le oo i le viiga o le Atua, ae faafetai o lea ua aumai le Alo pele e toatasi o le Atua, o lea ua maliu mo oe ma i tatou uma lava.

O le tuualalo lea a lenei sui usufono, e avatu i tafatafa o lau Afioga i le Taitai o le Malo, ia agalelei le Atua, ia faatumu le utu ma ia maua le tofa, onosai i so o se mea e oo i ai tulaga o faamoemoega. Ia agalelei le Atua, ia fesoasoani i lau tofa ma le faautaga. Ia manuia le Fono.

**FOFOGA FETALAI:** Faafetai. Ia malo saunoa. Se i tulai mai le sui usufono mo le Nuu Tu Taulaga i Sisifo.

**Afioga FAUMUINA ASI PAULI WAYNE FONG:** Faafetai atu i lau Afioga i le Fofoga Fetalai. E piiu foi i le saunoaga a Saleaula, i le tulaga o le... ua matu i fau le taligasua a le Palemene i lenei aso, ua maua foi se faasiligamalosia aua le faaauauina o le tatou Fonotaga i lenei aso.

E muamua ona momoli atu le faafetai i lau Afioga i le Fofoga Fetalai e faapena foi le Afioga i le Taitai o le Malo, Minisita foi ma Sui Minisita,

aemaise foi lenei itu. A o lenei itula e ao foi ona tulai atu foi e fai se faamatalaga i le tulaga foi o le Lipoti, Tulaga Aloaia ma Amio Taualoa ua taatia nei i le Maota. Faafetai i le Afioga i le Taitaifono, faafetai foi i sui usufono o le Komiti i le lipoti maeaea ua uma ona tauaao mai, ua i luma nei o le Maota Fono.

A o le taumafai atu lau Afioga i le Fofoga Fetalai i se taimi ua tuanai, i le tulaga e ao ona fia faamalamalama ni mataupu ua aliae mai i le Lipoti a le Komiti o Tupe sa faataatia i luga o le Laulau a Fono. E ui e le i talanoaina, ae faigata o lea ua oo mai i luma o le... ia ona avatu foi lea o se vaivaiga o lenei sui usufono lau Afioga, ona o le tulaga i tuuaiga foi, e uiga i lea lipoti. Ia e foliga mai ua faufau au nei aemaise foi le Afioga ia Laauli i tulaga o le faafitauli ua tulai mai i lana afi.

Ia ae faafetai i le Komiti, tulaga aloaia o le Palemene, ia o lea e pei ua toe faasaina ai le mataupu lea. O lea e tau momoli atu ai se finagalo, i lau Afioga i le Taitai o le Malo aemaise le Afioga i le Taitaifono, ia e uiga i lea tulaga. Ia ae talitonu le agaga, o lea ua malamalama le lipoti, o lea foi ua uma ona avatu le tuualalo a le Afioga ia Laauli, i tulaga i fuafuaga nei.

Ia ae faamalulu atu lava i le tatou Palemene, o le Kamupani lenei, e i lalo o le vaavaaiga a le Ofisa o Tiute. O a ni mea e aumai i totonu o Samoa, po o le a le ituaiga oloa, e leai se aia a le Kamupani a le Freight Plus, e ave ai i tua, vagana, ua aumai se faatagana mai i le Ofisa o Tiute. E le aia foi le Kamupani lenei, i tulaga o aiaiga e sui ai se tau pe sui ai se tiute, o ni mea e aumai i totonu e ala mai i le matou kamupani.

Leai, e limataitaiina matou i Tulafono ua uma ona faataatia mai e le Matagaluega o Tiute, ia o lea sa taumafai atu i ai. Ma o le isi foi tulaga, leai o lo o i ai le pule o le Kamupani, o au lea ua sui usufono o lea ua ou i inei. O lea foi la e taumafai atu ai se agaga i le tulaga i le Afioga i le Tama o le atunuu, i faapea ua fai se pati.

Lau Afioga, sa ou alu e taputapu ai ia le uso a sui usufono, ou te le i alu i ai ona o se tulaga tau pati pe ala mai i lenei tulaga. O le tapuaiga, po o ai lava le sui usufono e tulai mai i se tulaga faapea o le Faamasinoga, leai e tataua ona i ai ia le tapuaiga. O le a lava le faaiuga e sau i le Faamasinoga lau Afioga, ia e tatou te malilie uma lava i ai. Ia ae faigata, o lea o lo o taua lava le sui usufono lenei, i tulaga o se pati.

Ae silasila lau Afioga, o lea e i ai le tatou pati i le taimi lenei, ia o lea foi sa aumai le agaga i le Afioga i le Palemia, ou te faamavae atu, ae ou te le i faamavae lau Afioga.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui:** Lau Afioga i le Fofoga Fetalai, ou te tulai atu o se mea e fia faasao faamolemole.

O le tatou talanoaga, e pei o le tutu toatolu mai foi lea o outou, i si tamai mea lava lea na faasao atu ma le sese o le mataupu na outou tulai mai ai,

inaina e pei e foliga mai o lea e nana e le Malo le \$20 miliona Amerika, o lea na ou tu atu ai e tau tali, ae o si au lava mea malie. Ia lea sa talie uma ai ia le tatou a...

E pei sa tau agai si au mea malie i lou fautuaina o le tou toatolu, o lea ua matilatila le tou faitioina mai o le HRPP, faasalalau mai i lug o le facebook, aemaise lava le sui usufono o lo o saunoa nei, o le anoano o lana faasalalau. O le fai atu lava o le iuga a le Malo faasalalau mai i luga. Ia o lea foi la sa headline mai ai le.... faapea ua ou osofaia. Ae ou te le i osofaia se tou pati. E pei o si au tala faaataata, e foi lele e fesoasoani atu ia te outou, afai o le tulaga lea, se faatu loa le tou pati aloaia. Ia pei o si au tala lene. Ia ae soia le faaleiloga, faaleiloga ia le tou galuega faapea.

Ia o lea na ala ai ona ou taua ma le sui usufono foi le Afioga ia Leala, leaga o le sui usufono lea, na aafia i mea ia. Toeitiiti lava a toe ta le logo o le isi palota, ae faamavae aloaia ae o e fai le latou faiga palota, seia faaaloaia ai ia le latou pati ua formalise. O le ala lene e tusa o sina au tala faaata foi lea, afai e... o lea foi ua uma ona folafola, o le a vaai ai Samoa o le a faatu le tou pati, se a manao loa e faatu, faatu loa. Faatu, ae aua le felafiai solo. O le ala lene o si au tuualalo pei e fai ma le ata, ia sa talie foi le Palemene. E le faapea o se mea ua ou fai atu e a foi... ua faatu se tou pati, ae o si au fesoasoani atu, aua e pei o se mea e faatalitalie le Palemene, ona ua ou vaai atu, o le tu ae lava o lea tau fai tutu mai le tou toatolu o le mea lava e tasi, tutu mai le tou toatolu o le mea lava e tasi, tutu mai le tou toatolu o le mea lava e tasi.

Ia o lene na ou faalototele atu ai, se aua le felafiai ae toa le loto, faatu aloaia loa le tou pati. E pei o Lealailepule lea ua.... ae o Lealailepuleletautua, o lea ua toe fanaufouina. Ia e pei o le mea lene na ala ai ona ou... faaata ae o lea ua sese mai ai ma le Observer ia. Ou te le o osofaia, o le ou te fesoasoani atu ia te outou i le ala e fai ai mea faapena. Afai loa ua mananao e fai ia se tou pati, fai loa. Se e manaia mea na ae le o le felafiai solo.

**FOFOGA FETALAI:** Malo, faafetai. Ia leaga o lea sa taua le suafa o le sui usufono ia Lealailepule, se i tulai mai Lealailepule. Na o sina au saunoaga foi lenei....

**Tofa Lealailepule Rimoni Aiafi:** O Lealailepule, o le tagata ua toe faaolaina, faafouina le mafaufau i le la mafutaga ma le Atua. O le ala lea. Ae o lou oo mai nei i le tatou Vaega Faaupufai lea e i ai nei, ona ua ou talitonu ma le atoatoa, e lelei le taitaiga lea e i ai, toeitiiti lava lelei, sau loa Lealailepule lea faatoa atoa ona lelei. Faafetai lava i lau Afioga.

**FOFOGA FETALAI:** Malo, ma e toa le loto e tu i luga e tautala i le amiotonu. Malo se i tulai mai le sui usufono o saunoa nei.

**Afioga FAUMUINA ASI PAULI WAYNE FONG:** Lau Afioga i le Fofoga o le Fono, e momoli atu le faafetai i le Afioga i le Palemia. Lea la ua iloa i i ou te iloa o lana mea malie lea sa fai. Ae faafetai i le tulaga foi o tala malie a le toeaina, ia e so o se tala lava e malie e le moi. O le mea foi la lea e tulai mai ai le afioga i le sui usufono o Faleata, leai e ese foi lona ia finagalo i lona vaiitaimi.

E le taina i ai le sui usufono lenei. Leaga foi e i ai le tala a toeaiina i lona vaiitaimi, e ese lava le mato taaa, ese le malo valea. I lona vaiitaimi, e pei o se tulaga faapena sa tulai ai sui usufono ia e toatolu na toe o. Ae o le taimi lenei, ua lava le tofa i lenei vaiitaimi.

Ia e faamalulu atu foi i lau Afioga i le Palemia...

**FOFOGA FETALAI:** Ia se i tulai mai le sui usufono o Faleata.

**Tofa Lealailepule Rimoni Aiafi:** Lau Afioga i le Fofoga Fetalai. Talofa e i si uso, sa manaia lava lana faamatalaga, ae e pei e faauigalua. Tala faauigalua lea na sau ananei, ua leva ona fai lana mea lea. Ae a fai atu le palaai e le alu e fai se palota ae tautala faavalevatea mai i i. Fai ma se mafaufau au tala. Soia le faavalevatea ma au tala.

**Afioga FAUMUINA ASI PAULI WAYNE FONG:** Lau Afioga i le Fofoga Fetalai, o le mea la lea e iloa ai le lelava o le tofa a le afioga i le sui usufono. Ioe, o totonu i inei o le Palemene, o a lava faamatalaga e fai ai, ia lava le onosai. Aua o faamatalaga uma foi lea e saunoa ai le afioga i le Palemia, o lenei lava e tuualalo, ioe.

**FOFOGA FETALAI:** Ia, ou te fautua atu, ou te fautua atu i le sui usufono mamalu, e lelei lava ona fai fuafua aua e mau e faalele, ia e mau foi e e matau. Ia aua o le isi saunoga e fai mai toeaiina e malu a afeoe ae pisiia ai, e pisi ai fofoga. E manaia e pei e faaataata lafoga, ia ae tiga.

O le mea la lea, e saunoa foi le sui usufono, saunoa fuafua. Ia o le tali atu foi o le Malo, a le tali atu le Malo e tusa ai ma mea o pepa ma o i fafo e faatino ai na mea. Ae o le mea sili, se o le tatai mai o lea ua uma lau 10 minute. E faauma mai lau saunoaga o lea ua maea lau 10 minute.

**Afioga FAUMUINA ASI PAULI WAYNE FONG:** E faamalulu atu i lau Afioga, leai, leaga o lea e aumai le faamatalaga, a toa le loto, o le a le mea o le a ou alu ai fua e fai le faiga palota? E i ai se agasala a le sui usufono lenei? E i ai se mea ua afaina ai? Atonu lava o le faaaliga o manatu, o le tulaga lona o le tatou Fonotaga lenei. E faaali ou manatu. A faapea e le fiafia i ai se isi...



**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi:** Lau Afioga i le Fofoga Fetalai, o le tala lea na fai atu e au, e pei o se mea foi lea e faatalie ai ia le tatou Maota. Faatu aloaia loa le pati pe afai e manatu e fai se pati. O le uiga lena o le tala. Aua o au faasalalauga uma lava ia e alu, se ua matua tiga uma ai lava loto o le toatele o sui usufono o le Vaega lenei. O le matua tiga lava o finagalo o le toatele o sui usufono o le Vaega lenei. O le tulaga lena. Afai loa ua manao, faatu loa sau pati Ae e le o i ai i totonu o le Pati, ae e fagafaga mai i le Pati.

O au faasilasilaga ia e fai, e aafia uma ai lava sui o le Vaega Faaupufai. Ma e le faia e se tagata, o faasalalauga na a le tagata e le loyal to the Party. O le tulaga lena lau afioga, ae e le afaina foi pe a na sau e sau o ni mea e tonu ma sao. Aua foi o lea e i ai ia le tatou Vaega a tatou talanoa ona laga ai lea o finagalo. Ae ua ou leiloa fai e 50 fono a le Vaega sa fai i lenei tausaga ma le la tausaga, e na o le tasi lava le fono na e auai atu ai. O la e faamaumau lelei.

**FOFOGA FETALAI:** Malo, ia ua ou manatu ua maea le taimi o le sui usufono. Aua e tatou te toe o i tua, aua tatou te toe o i tua. Ua maea lou taimi.

**Afioga FAUMUINA ASI PAULI WAYNE FONG:** Faafetai i lau Afioga. O le a molimoli atu la le faafetai. Faafetai tele i lau Afioga i le Fofoga Fetalai, ia o le a foi se tuuaiga ua aumai, ia e le afaina, e le tetena foi i lenei itu. E le tetena foi ia te au nei, e tatau ona faaali ou manatu i le mea e te silafia e tatau ona faaali i ai. Afai ua le logomalie i le afioga i le Palemia, ia faamalie lou finagalo. Faamalulu atu foi i le afioga i le uso a sui usufono ia Leala, pe afai foi o i ai se tulaga leaga o lea ua aumai...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi:** Lau Afioga i le Fofoga Fetalai...

**FOFOGA FETALAI:** Malie le sui usufono se i tulai atu le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi:** O le mea e fia faasao. O totonu o le Maota lenei, o a tatou Tulafono Tumau, o le mea e fia faamalamalama, ma le mea e fia faasao. O le ala lena na ou tulai atu ai, e faasao ia le saunoaga a le sui usufono. A sau lava le sui usufono i le mea o la e sao, e leai se mea o le a ou toatamai ai fua i lona finagalo. Ou te fiafia tele i ona finagalo e faaalua. Ae pau lava le mea, e pio loa, ou faasaoina loa.

Lau Afioga i le Fofoga Fetalai, e pei o le tulaga lena o lea ou te tulai atu ai leaga o ia lea na muamua usu, ona nofo loa lea ma faauiga sese lau faamatalaga na avatu. O lea la na ou tulai atu ai e faasao.

**FOFOGA FETALAI:** Ua ou faamalie atu i le sui usufono, o le tulaga foi lea e vevesi ai, ia o le mea o le faamaoni i totonu o le lotoifale o le vaega. Ioe, e pei e faapena se lagona. E leaga lea mea e talanoa faalotoifale ia le mataupu o le Pati, ia ae mamailiu mamaioa, pe a o sui usufono i tua atu o le lio lea.

O le mea lena e ala ai ona fai atu, o le loyal i le Pati, e leai e le mama i tua ia tulaga o mea faapena. Leaga e fou mai le tou omai i le Palemene. Ae o mea sa i ai i aso ia, ia leaga e te i ua faoa i lau tala lea o le a tau fai atu. Na o mea uma e aumai e soalaupule i le faafaletui. Leaga e na o tagata faamaoni sa i ai i lena vaitaimi. A uma la ona soalaupule i i, maape ai i tulaga i le fulisia o le ioe ma le leai, ia ona aumai lea i le Kapeneta, pasi mai i le Kapeneta faau mai o se Tulafono Teuteu.

Ia ae o le mea lea e tupu nei i le taimi lenei i le aufaitatala lea e i ai, tulou sala le gagana, ia o le mea e le i maopoopo ae ua iloa e Siaopo ma Siasau. O le mea la lena, mea lena ua ou talanoa atu ai, ou te alofa. Ia ae mama le sausau ae a tali ea e le Malo i ni a? O outou faasalalau i tua ae o le a le tala a le Malo a fai atu? O le mea la lea, ia se i fuafua o lea foi e fuafua atu, ma o lau aiatatau, e aafia ai le aiatatau a le isi. Ae e pe i ua ou fautua atu.

**Afioga FAUMUINA ASI PAULI WAYNE FONG:** Faafetai, faafetai o lea o le a faauma atu lau Afioga. Ia e leai lava se isi e sao ma atoatoa i luma o le silafaga a le Atua lau Afioga. E tofu uma lava tatou ma sese. A faapea o i ai se isi o sao i totonu o le Palemene lenei, ia ou te iloa ai o se agelu lau Afioga. Ia ae o lenei itula, momoli atu le faafetai, maua se manatu.

E tatalo atu foi lau afioga i le Nofoa, ia tatou tilotilo i le uso ia Laauli. E le o se isi ua leva ona tautua i le HRPP, leva ona tautua i le Maota lenei, tatou faamagalo i ai. E pau lea o se manatu, ia manuia lava ia le tatou Fonotaga i lenei aso, faafetai.

**FOFOGA FETALAI:** Ia, tuu atu le avanoa i le sui usufono o Salega, tulai mai, Salega i Sasae, fetalaiga ia Olo.

**Tofa OLO FITI AFOA VAAI (Salega Sasae):** Ia, faafetai tele i lau Afioga i le Fofoga Fetalai mo lou avanoa, tulai foi ma le agaga faaaloalo tele e faaali foi ia se lagona vaivai, e tusa ai foi ma le tatou mataupu e pei ona taoto nei i paga.

Lau Afioga i le Fofoga Fetalai, ua mavae atu le taeao ua sola sa e siitia ai le taulaga faafetai, talosia ai le tatou galuega ma le tatou faamoemoe i lenei aso. Ma e oo mai i le taimi lenei lau Afioga i le Fofoga Fetalai, o lo o nofofale pea le agaga o le Atua i le taimi lenei. Faafetai e pei o le tulaga sa faapea ona siitia ai le tatou taulaga i le Atua. Ia ae avea foi lenei taimi e avatu le faamalo i lau Afioga. Mai nei vaiaso e 2 o lea ua alu le 3, ia, o lo o tauave pea ia ou

tiute faaFofoga Fetalai. E le faigofie foi i la matou matau atu. Ae malo faatoatoa malo foi le tauatai i lau afioga.

O le aso lenei o lea sa ou matau atu e pei o lea ua faatili foe o le ae, i le tatou galuega. Ae e i ai lava le agaga o Salega Sasae, ia, a ua ae ia lo tatou faiva, ia tatau ona ae ma se tatou ai. Ia peitai o lenei foi itula ma le lipoti a le Komiti e pei ona i ai, ia e i ai lava le lagona foi lea e pei o le a toe vaatua lava ia le tatou sa ua tatou ofi atu i le faaiuga o le tatou galuega. Ia e i ai laia o le agaga, o fea e i ai le tofa a lau Afioga i le mamalu o lenei Palemene, ia o le a toe faatafea lava le uso ua o tatou oo mai. E tusa ai ma le faaiuga a le tatou Komiti e pei ona filifilia i le mataupu lenei.

Ia e tele foi o taimi lau Afioga, e tatou te faasoa, e fetaai lava ao le uso. Tele foi o taimi tatou te fefaasoai ai, ia tatou fefaamagaloai. Ia afai la e i ai se tulaga faapena, o le a tulai mai i le uso a sui usufono, tuu ia a tatou faiga faavae faaupufai, ao tatou o le uso, tatou o le uso.

O le tulaga i le lipoti a le Komiti, ia ou te iloa o lena e te silafia lau Afioga i le Fofoga Fetalai ma le mamalu o lenei Maota. O le tele o mataupu ogaoga sa tulai mai i totonu o le Maota lenei. E le toe aloina i ai lou vaa i tua i mataupu na. Ao mataupu o mataupu e gata ai le ogaoga. Ae a ou tilotilo atu i le mataupu lea, ia na pau lava le mea lea e faapea mai ia le finagalo o le Komiti, taitai seseina o le Palemia i faamaumauga. A ou nofo la ma fua lea mataupu lea ma mataupu i tua atu 2,3,4,5,10 tausaga talu ai, e le i oo i ai se faaiuga a le Palemene. O le mama ia o le mataupu lenei.

Ia, ou te talitonu e le faia i sou loto ia le tulaga o le faaiuga a le Palemene, ae na ona faia ia au e fai ma leo ia ma fofoga foi o le Matautia. Paia o le Aiga Samoeleoi, ma le mamalu i le Alataua. O tootoo o Finao, e na ona matou faaooloo maau atu i lau Afioga ma le mamalu, paia o lenei Maota Fono, ia toe liuliu le tofa, toe liuliu le tofa.

Afai o le Palemene lenei ma le fale lenei e Faavae i le Atua, tatou fale loa i le Atua le aso lenei e tusa ai ma le mataupu. E pei o sau faamatalaga lena lau Afioga i le Fofoga Fetalai, ona ou te talitonu e tele tootoo e fia sausaunoa i le mataupu. Ae na o se matou faaooloo maau atu, se matou fautuaga ma se matou tautaualemau i lau Afioga ma le paia o le Palemene, ia, ia tatou maua le loto faamagalo i lenei aso. Ia manuia le tatou Fono.

**FOFOGA FETALAI:** Malo faafetai, ia se i tulai mai le sui usufono o Vaimauga. Tulai le sui usufono e...

**Afioga SULAMANAIA FETAIAI TAUILIILI TUIVASA (Vaimauga Sasae):** Faafetai mo le avanoa i lau Afioga i le Fofoga o le Fono. Masalo o lenei itula e tu lava ae gatete foi. Tautala foi ma le faaaloalo ma le migao i le paia o lenei Palemene. O lenei foi taeao ma le tatou Fonousu e lagona lava i tino matagi lelei le pai mai o le Agaga o le Atua. A matau i lenei 3 vaiaso o lo o feagai pea ma Fonotaga a lenei Faigamalo po o tatou Fonousu, e le

faigofie, ona o le a? O lo o i ai pea le Agaga o le Atua, o lea ua oo mai i le taeao lenei.

O anapo na tatou faafetai ai i le Atua ma pasi ai le tamaoaiga o le atunuu lenei o Samoa. O le aso lenei o lea ua pasia ai ma tuuina atu i Matagaluega ma Faalapotopotoga e faatino ai atinae a lo tatou atunuu. Ae e ese foi lenei taeao, e pei ona tulai ai foi ma fou mai i lenei Nofoaiga, e le lautaeao. E ese foi lava lenei aso ma lau foi oo mai, o lea ua opea i le Maota le lipoti a le Komiti, sa fuafuaina lenei mataupu.

Faafetai i le Komiti, faafetai i finagalo ua aumai i totonu o le Maota lenei. Ae e pei o le mea lena e ala ai ona ou mitamita ona o le malae lenei o le malae i Tiafau e faaututagi ai Samoa. O le a le mea e ala ai ona faaututagi Samoa i le malae lenei? E tele malae e i ai Niniva ma Punialavaa ma Fatutolo ma Pilioua ma... ae faaututagi lava iinei, mafua i se a? A le tofa lea, ao le faautautaga foi i tulafale ma e tofofi mai e le atunuu i le Maota lenei. O le mea lena e ese ai Samoa. O atunuu uma lava o le lalolagi, o lea foi e tau fai lava Tulafono nei e faataua ai tu ma aga i totonu o si o tatou atunuu, ona o aga ia. O aga ia, o tatou o matai.

O le a le uiga? E o mai e soalaupule le manuia o le atunuu. O lenei la taeao ma le faalogologo a le atunuu ma lenei itumalo, e lagona lava le popoe, ona o le taeao lenei e fou, ona faatoa tupu lea o se mea ua fai i se sui usufono. E i ai le manatu lau Afioga i le Fofoga Fetalai, avatu malu i puega. E lagona lava le faanoanoa foi i le Komiti. A silasila foi i le Komiti e i ai Loia, Suetusi, o lauia uma le Komiti. E pau lava le faanoanoaga i lenei Komiti o lenei sui usufono, fai mai ua oo lava ia le latou faaiuga, tapa loa se finagalo o Niu Sila ma Ausetalia. E o e a? O le a le mea ua o ai fua ia Ausetalia ma Niu Sila? A lea, faamatai lea. O matai tatou a Samoa e fai lava e tatou iam faaiuga.

O le ala lea o lou sau faanoanoa ai, ae o lauia tagata. A lea e fai mai e aumai le faaiuga.. o le mea lena e ese ai lava ia Samoa. E ese ai lava, e fiu lava Tulafono e tau aumai isi atunuu, leai leaga o tatou o matai, o le tofi na aumai i le Atua, ua vaelua i ai le Suafa o le Atua. O le taeao la lenei o lo o tatou i ai i le faamalumalu mai o le faamai oti, a lea ua tatou faalauiloa Samoa e Faavae i le Atua. Leai ma se tiapolo e oo mai i le taeao lenei.

O isi atunuu o la e fai lava sa, ae a tatou? O tatou lava lea e leai se faamai. E momoli le agaga faafetai i lau Afioga i le Taitai, e afua mai i mauga le manuia o le atunuu lenei. O lenei la taeao se i faapuupuu atu se matou tala, ia o le tulaga ua oo i ai ia le tatou faaiuga. O le ala lena o lou tatalo atu. E alu alu lava faaiuga i totonu o pulega a alii ma faipule, fai mai lava le tala lena. Ae ui lava i lea, ola le pagota. O le ala lena o lou tulai, ona e a? O lea e le gata o le faamalumalu mai le faamai, ao lo o tatou i ai foi i le taimi mulimuli o lenei Nofoaiga, fai ia se tatou ai, fai se tatou ai.

Ia o le a tatou tuu atu ia lenei uso se i tulou lava, tautala lava ma le ava ma le faaeteete... o Laauli se i tulou lona suafa Laauli, o le matai o le itumalo lenei o Vaimauga i Sasae, i le suafa Faatafamanogi. O le a lona uiga? O se

tulafale lea e faia upu o lenei afioaga. O le ala lea o lou faatoese atu lau Afioga i le Taitai ma le Maota, ia, a i ai se sasi po o se sala foi ua le logotamalii i totonu o le Maota lenei, o le agaga lena. O le agaga lena na tofofi ai tatou e le atunuu. O tatou o Taitai, ia ae o lea ua toe vaai mai ia si o tatou atunuu pele o Samoa, e pau lava lea o le tulaga o lo o vaai mai ai Samoa. Ua vaai mai po o le a foi se tulaga o le a fai...

**FOFOGA FETALAI:** Ia, malo, ua uma le taimi o le sui usufono.

**Afioga SULAMANAIA FETAIAI TAUILILI TUIVASA:** Ia, o le manatu lena o lenei itumalo ia ola le pagota. Ma lou agaga faaaloalo lau Afioga i le Fofoga Fetalai.

**FOFOGA FETALAI:** Faafetai lava, se i tulai mai le sui usufono o Faasaleleaga Nu.2.

**Tofa NAMULAUULU SAMI LEOTA (Faasaleleaga Nu.2.):** Ua tatou pisapisao i lenei taeao i Tiafau nei, ona o le mataupu taua ua folasia i le Maota. E momoli le faamalo ma le faafetai i le Afioga i le Taitaifono, i le lipoti aemaise foi le fautuaga ua tuuina mai.

E i ai le manatu o lenei itumalo o le Maota o Samoa, o le maota o matai. Ioe, e i ai le taimi e tatou te faataatiaese ai vaega faapati ae tatou talanoa faamatai. O lea ua folasia i Maota le faamaulaloga a le Afioga ia Laauli i lenei taeao, ioe. E... ae le i avatuina se manatu o lenei itumalo i le mataupu ua taatia mai, ma le fautuaga a le Komiti, Laauli aua ne i tetena ia te oe ia le faamatalaga lea o le a tuu atu ia te oe.

O lea sa e saunoa manino i le taeao lenei, e te malu i le Palemene lenei. O le tala a le Palemene lenei ia te oe i lenei taeao, e malu le Palemene ia te oe. Ioe, sa ou faalologo ma le totoa. 3 vaiaso talu ai, lua felafolafoaiga ma le Taitai o le Malo. Taitai o le Maota, o le faaaloaloga lena a le Maota lenei. Ioe, faatonutonu folau le Fofoga Fetalai. Maniti ou tino, i tala e te saunoa ai ma e tautalagia ai le Maota lenei.

Ua logo faatutuila le lalolagi atoa, i au lafoga na lafo i le Palemene lenei. E le malamalama le Tulafono, talofa e. O ananafi lea na ou faalogo atu o e faapea mai, e te sau e kiligi le Polokiki leaga lea e i totonu o le Palemene lenei. Se i ta vaai ma seu silasila. Aua foi lou naunau i le ia ma mea e masaesae ai le upega.

O lea ua ou talanoa atu faamatai, Safotulafai lenei, pule taitai pule matua. Ioe, lau Afioga i le Fofoga Fetalai, ia na ona ou faapena atu Laauli. Ioe, o le faaaloaloga a lo tatou Maota, teu ia tatou upu. Ua e lafo le upu, 'abuse le power'. Ioe, anapo manaia lau faamaulaloga. E faatoese mai ma e faapea mai ua sao. Sa matou tatalo ia manuia lau Faamasinoga. Ae e toe faasaga mai ia matou fai mai, 'watch it, I'm coming back'. E na o le vale e na te

leiloa faauiga upu ia. Ioe, faifai malu ia o tatou faiva. Ioe, Laauli, lau Afioga i le Fofoga Fetalai, o fasaga lena a lenei itumalo.

E le milia faauu upu a le Maota lenei. Ioe, leaga o i, e sua le aulapauta, sua le aulapatai, ae a? Tatou nonofo e poupou ia le tatou nonofo fealofani ae fusia i le alofa o le Atua. O upu a le Tusi Paia, ‘ a e tautala i le gagana a tagata ae leai sou alofa, e maumau le taimi’. O lea ua uma ona fai lau faamatalaga ia Laauli. Masaa atu se mea lea ou te le fiafia ai.

Laauli, Polataivao lenei, suli o le Faleulu Mailei. A fola le fala e a? E tatou te tau i o i Sasina. O lea e te fai mai o oe o le Saleaula, Safotulafai lenei, Leaula ma Letufuga, o le auuso.

**FOFOGA FETALAI:** Malo, faafetai. Ua maea le taimi o le sui usufono.

**Tofa NAMULAUULU SAMI LEOTA:** Faaiu atu se manatu i le taeao lenei.

Lau Afioga i le Fofoga Fetalai, o le manatu o Safotulafai, ua toe o se aga uma le tatou Paeaiga, ne i te i ua lagona e Laauli lona salamo, lea ua faatoese le mamalu o le Maota, o le manatu o Safotulafai, toe ave se avanoa ia Laauli, tatou faifaimea, tatou faifaimea to e, ioe.

Lau Afioga i le Fofoga Fetalai, o se manatu lena o lenei itumalo e faapuupu atu ai. Lau Afioga i le Taitai o le Maota, lau Afioga i le Palemia, o se sese o Laauli, o le sese foi lena o le usoga, faamagalo mai. Sui atoa mai Salafai, faamagalo mai. O lea ua manino mai i le Lipoti a le Komiti e le faamaonia tulaga ia, faamagalo mai. Ma lou faaaloalo, faafetai.

**FOFOGA FETALAI:** Ia, se i lafo mai i lea itu o le Maota, malie lau Afioga...

Tulai mai lau Afioga i le sui usufono mo Aiga i le Tai. Manatua foi e 10 lava minute e lavea uma ai ma le taimi... ma mea uma lava.

**Susuga MULIPOLA LEIATAUA LAKI (Aiga i le Tai):** O le aso ma le filiga, o le aso foi ma le mataigatila. O le lou ma lona fuata o le taimi foi ma le mea e tupu ai. Lau Afioga i le Fofoga Fetalai, e tele taimi e siisii ai le Maota, e tele taimi e lugaluga ai la tatou folauga, nofo toa lava Aiga i le Tai, malamalama lelei i lona taimi. Peitai o le aso lau Afioga i le Fofoga Fetalai, ou te manatu o lea ua fola i lumamea le Lipoti a le Maota, le Komiti o Amio Taualoa. O lea ua faafofoga le Palemene ma le tatou atunuu, e leai lava se vaipanoa e le i oooo i ai sailiiliga a le tatou Komiti. O le ala lea e tulai ai e faaleo le agaga faafetai lau Afioga i le Taitai Komiti. E leai e le i soona saili mamao le tofa ma le uta, ua sasaa faaoti lava le utu a le faimea. Ua malamalama le Lipoti i lau faitau, faamalo le tapena, faamalo le tofa tatala ma le tofa faasau, a o le faautautaga sa tuutumamao, o lea ua ou outou le

alo lava i le ata o se laau, o lele ua tautino le solo a le tamaloa, ua aumai le tou faaiuga, ua aumai la outou fautuaga e pei ona folasia i lumamea.

Lau Afioga Laauli, e le tau fai atua se tala, e tasi lava lo tatou aluga, e tasi lo tatou ieafu, e le mafai ona ou see ese ma tofiga. Nofo i le va o tama ia, a fefulituaai, o lou taimi lea, tootoo o le leleiga, tootoo o le filemu. O se vaiiliu lava lea e afua ai se lagona i lenei taeao, lau Afioga i le Fofoga Fetalai, a matau lava i lafoga i lenei taeao i lau Afioga i le sui usufono o agai i ai le mataupu, e lagona lava le faanoanoa, faanoanoa. Ua tatou masani i aso faapenei, o lalo lava e saili ai Malo, o lalo lava. O le a sa outou faafofoga, o le a sa tatou maitau i lenei aso, pei lava na ona togi o le moa ae uu le afa, talofa, e tuuaina lava le Malo. E pei lava na ona faamaualalo lava ae e i ai lava le agaga le lelei e i ai i totonu. E le faigofie le tuuaiga o le Malo, leaga a tuia lou aao, e logo i lou faiai, tulou. O lagona ia, e faanoanoa ai lava i lenei taeao, faamata e malu ae ivia, tulou le gagan. Peitai ou te manatua le tala e fai i le motu i Salafai na tagifano atu ai le tamaitai o Tagitu Taputele ma faapea ane, se talofa, talofa ia Faatuliaupolu, na fasia lava a o fea sa i ai ou aiga? O fea sa i ai Tuato ma Tuitolovaa? O fea sa i ai Tevaga ma Vaifale? O fea sa i ai Togiai ma Salemuliaga? O lagona ia o le taeao. A o le a se tala a le Tusi? “Ia e alofa i le Atua ma lou loto atoa, lou malosi atoa, lou agaga atoa. Ia e alofa atu i le lua te tuaoi, ia pei o oe lava ia te oe.” O le fesili, o lau lava fesili na o au, o ai lou tuaoi? O lau lava foi tali, “o lou fili”.

**FOFOGA FETALAI:** Ua maea le taimi o le sui usufono.

**Susuga MULIPOLA LEIATAUA LAKI:** Ou te faifili i lou uso a sui usufono ona e le manatu i le Taitai o le Malo, lau Afioga ma le Palemene i le tele o taimi, e siisii ai. A o le agaga lea lau Afioga i le Fofoga Fetalai, ou te tatalo ma le agaga faaaloalo, o fea o i ai le tofa i lau Afioga ma le Taitai o le Malo ma le Palemene, e ui lava ina matuitui, a o aga na o le alofa, o uiga na o le loto faamagalo. Ua ou faamolemole atu, na ona taatia atu, o fea o i ai le tofa, ia ola le uso. Ma le agaga faaaloalo. Ia manuia le Fono.

**FOFOGA FETALAI:** Malo faafetai. Ia, se i tulai mai le sui usufono mo Faasaleleaga 1 i Sisifo. Ia, o lea ua tulai mai le Tamaitai Sui Palemia. Se i tuu atu ia le avanoa i le Tamaitai Sui Palemia.

**Afioga Hon FIAME NAOMI (Sui Palemia):** Faafetai lava i lau Afioga i le Palemia mo le avanoa. Ou te tulai atu ma le ava ma le faaaloalo, e tulaga ese foi lenei itula ma lenei mataupu. E malie i le faalogologo le amata mai i le Lipoti maeaea a le tatou Komiti, e faapea foi le saunoaga a le sui suufono o lo o faasino i ai lenei mataupu, le sui usufono mo Gagaifomauga Nu.3. Ua maua foi lau Afioga nisi o saunoaga ma fetalai o le Maota, e matau atu i

le agaga lava e pei ona masani ai foi le tatou tu ma le tatou aga i taimi faapenei, o le tuu atu lava i le tofa ma le faautaga, aemaise o le tausiga o le nofo lelei ma le avafatafata. E maua lau Afioga i le Fofoga Fetalai, e pei o se taimi muamua leni, ua ou le manatua foi e au pe sao le mau a le tatou Komiti, ae atonu mo Paeaiga aupito lata mai, pe sao foi lena mau.

Lau Afioga i le Lipoti lava a le Komiti, ou te fia tautala lava i le Lipoti a le Komiti. Ou te talitonu o lo o sao le aumaiga o le mataupu a le Komiti, aua e faasino lea i upu na fai, saunoaga na fai ma mau tusitusia. Ma o lea lava ua aumai le Lipoti a le Komiti, ua faamaonia e le moni ma atoatoa mau a le Afioga ia Laauli sa tuu mai i totonu o le Maota, ua faamaonia foi e Laauli i lona oo atu i luma o le Komiti, e le sao lana saunoaga sa fai i totonu o le Maota.

Lau Afioga i le Fofoga Fetalai, o le a taatia le itu i upu na fai, e leai se faamasinoga e toe tau faamaninoina lena mea, a o le agaga i tua o faamatalaga, e le gata i e na faia upu, a o le tali atu foi, aemaise le Malo i le aumaiga o lena mau. Ma e mafai ona ou faapea atu, o le mau a Laauli ua le lelei le faasoa a le Malo, ua soona faaalu tupe, a o se mau i le faalogo a le Malo, pei o lo o fesiligia le amiotonu a le Matagaluega, o e sa tapenaina lea fuafuaga. E tuufaapeagai la mataupu nei e lua, o lea la ua i ai le faafesili, pe tatou te tuliloa le mataitusi i upu na fai, pe tatou te ave le faataua i le agaga sa i tua o upu e fai i le lafo a le sui usufono mo Gagaifomauga Nu.3 ma le tali atu foi a le Malo.

Lau Afioga, atonu e tofu lava tatou ma faamasinoga, o lea ua aumai le faasalaga e tusa ai ma le solitulafono i aga ma tu i totonu o le Palemene, ma ua fautuaina le tuuese a le sui usufono mo le 3 masina. Lau Afioga i le Fofoga Fetalai, so o se faasalaga lava, e i ai le itu foi lea le upu faapapalagi o le mitigating factors po o faiga e faaititia ai se sala ua lafo.

Ma e malie foi lau faitau atu i le Lipoti a le Komiti, ua avea foi lea mataupu ua oo ai a latou susesuega i totonu o ala o mea e faatino ai tatou faiga e faatau ai pe faaalu ai tupe a le tatou Malo. 1. Ua faapea mai le Komiti, vaivai tapenaga a le auaunaga o le falepuipui, e le i lelei le latou preparation. O la e tau mai i le Lipoti latou te le i sailia ni fautuaga a se tagata o lo o i ai le tomai e mafai ona fautuaina ai latou, lea e aumai ai le upu, ia o matou nei lea sa fai autago, o vaivaiga ia o le tatou system. Ona tatou oo mai foi lea i le faiga o le Tenders Board, e faalua ona fai, aumai muamua, e toa 3 e na ofo, fai mai le Tenders Board, e le lelei ofo ia e aumai ona toe tuu atu lea i tua toe faasalalau, e tasi le ofo, e tuai le taimi na fai ai, ae ona o le tasi lava lea, faaoga loa lea.

Ia, lau Afioga i le Fofoga Fetalai, o lea lava ou te tilotilo po o le a ea le tau o leni afi. Na pau lava le faamatalaga o le tau o le afi, o le tala a Laauli lea na fai i totonu o le Maota po o le Komiti, e \$72,000 le tau o le afi. Lau Afioga i le Fofoga Fetalai, ou te le o fai atu la i le itu o le sao po o le sese, a o mea



uma ia e ao ona aumai e fua ai faaiuga a le tatou Maota leni i le faasalaga ua lafo i le tatou mataupu lea.

Ma o lea la lau Afioga i le Fofoga Fetalai foi ou te le o manao e faoa se taimi o nisi foi o lo o fia saunoa, ae o itu ia ua ou tautala i ai, mitigating factors ae faapea foi le faalogologo atu i saunoaga a e o lo o tatalo mai i le Maota leni e tatou te maua le loto faamagalo, e pei ua taitaiina atu foi i ai sou lagona. Ma o ala o mea lau Afioga i le Fofoga Fetalai, a talafeagai ai i le taimi o le tatou faagasologa o leni mataupu, e i ai lau teuteuga o lo o fia tuu atu i le lafo o lo o i le Laulau a Fono. E fesili atu ma le faaaloalo pe avatu le lafo i le taimi leni pe taatia i le taimi mulimuli pe a tatou oo atu i le taimi e aumai ai le fesili. Ma le faaaloalo.

**FOFOGA FETALAI:** Malo. E so o se mea lava, e mafai foi ona faatali lou finagalo se i oo atu i le taimi mulimuli ona aumai lea o lau teuteuga pe a faapea o le a taoto se i... Pe te tulai mai e faatu mai lou finagalo mo se teuteuga.

**Afioga Hon FIAME NAOMI MATAAFA:** Faafetai i lau Afioga. Atonu e aoga foi mo faamaumauga a le tatou Failautusi.

Ma o le teuteuga o le lafo e faapenei, *Ia faamaonia le Lipoti a le Komiti o Tulaga Aloaia ma Amio Tauloa e faatatau i le mataupu a le sui usufono mo Gagaiformauga Nu.3, ma ia tuuina atu ia te ia se lapataiga malosia ina ia tausisia le faia o faamatalaga moni i totonu o le Palemene o Samoa.*

O le lafo lea lau Afioga.

**FOFOGA FETALAI:** Ia, se i faaauau le... o lea ua faataoto mai le lafo, ae se i i ai se taimi ona tuu atu lea o le fesili, aua e le iloa foi pe i ai nisi lafo e toe faatu mai. Se i tulai mai le sui usufono mo Falealili Sasae.

**Afioga FUIMAONO TEO SAMUELU TEO (Falealili Sasae):** Ia, pei o le ala lena o le tau faaoololomaau ona o lea o le a faatu le lafo pe maua ni nai avanoa se i fai ai ni o matou lagona foi e uiga i le mataupu. Ma le agaga faaaloalo.

**FOFOGA FETALAI:** Ia, saunoa mai e 10 ou minute.

**Afioga FUIMAONO TEO SAMUELU TEO:** Faafetai. Masalo o lea lava sa tau vaavaai ma tau tilotilo, o lea ua tatala le faautaga a le tootoo o Fuifatu, le Pule i Salafai. Sa matau foi o lea ua fetalai Tuisamau, e manatu lava o le fale o Samoa ua iloga lava ona pou, sa tau matau e faamuamua i ai se tala a Tumua ma Pule, o matou e vaesala pe faaoololomaau e faaola le sala. Peitai, e le avea lea ma auala e misia ai so matou avanoa.

E muamua lava ona faafetai i le Taitaifono ma le Komiti sa iloilo ina le mataupu. O upu moni lava, e le tau nanaina le Lipoti ua auiliili lelei ma ua manino lelei. Faafetai i lau Afioga i le Taitaifono. E manatu e le toe oo i ai se tala i le Lipoti lea a le Komiti, ae ua avea foi lea ma faatupu manatu, e fai foi ma taiala i le agai i luma o le Palemene leni. E i ai ona itu lelei o lo o fanau mai ai, o ona itu lelei ina ia toe matimati ai le faatinoga o galuega a le Malo, aemaise foi o se auala e ave ai le tuualalo i sui usufono uma o le Palemene i vaega o amio taualoa e taitaiina ai finagalo i totonu o le Maota leni. Ona i ai lea o le lagona faapea, ia na o nai motugaafa, e le o lilo ia Samoa ma le faafofoga aemaise o le Palemene leni, o lea foi ua tautino e le ua tausalaina le eseese o faamatalaga ma le le faamaonia, e le toe oo i ai sau faamatalaga.

I lou tulai mai o se sui usufono fou o le Maota leni, sa ou faalogologo mai tua, Laauli, sa e saofai ma e alaala i le Nofoa lea, o lou mimita ia. Ae sa ou vaai maualuga lava ia te oe i le taitaiga o le Palemene leni. Ina ua ou nofo ma ou matau, lea e pei e foliga e ese lau faalogologo mai fafo ese lau matau i totonu i le mea lea e tupu i le Palemene. O le a le mea e ese? E te tau soo lava e te mulimulitaia i Tulafono Tumau. A o le matou matau, matou nei o sui usufono fou, o le tele lava o taimi e luga lalo, o le upu moni e soli Fono, ma e i ai taimi matou te matau foi, ua oo i le tulaga ua le ava, ua le migao. O le matou lene matau. A o le upu moni lava, o le aoga ia o leni lesone mo matou, leaga o lea matau le atunuu. O upu lava ia, ia o faatasi le faaupuga ma le faatinoina. Ioe. Aua e tatalo i taimi uma e tuu i le Atua le amiotonu, e tuu i le Atua le amiotonu, a ia ogatasi ma le faatinoina o a tatou upu ma tatou tala. I lau matau, so o se mea lava e tupu i totonu o le Maota leni po o fea lava e agai i ai, e pei e tusitusilima agai i le Taitai o le Malo. O le Taitai o le Malo ua mafua ai, o le Taitai o le Malo ua mafua ai. O lea foi lava ua oo lava i ooooga i le va ma se tasi o sui usufono, ia e tuuaia lava. Ia o matou nei, e tele foi nai o matou aiga e valaau mai, o a ea polokiki leaga ia e i totonu o le Palemene e tatau ona kilia? O a na polokiki leaga? A o lea lava e tau matau ona o lea e taeaina faatasi le mamalu o le Palemene i saunoaga, aemaise ai foi o ni faatalatalanoaga i luga o alaata ma alaleo. Ia, o lau tuualalo, agai sao lava i sui usufono o lo o e silafia o la e faatino se amio le lelei i totonu o le Palemene ma ni faiga ua le ogatusa ma faiga faavae a le Palemene. A o le taaina atu lea o le Palemene atoa, leai e le aafia ai itumalo. Ona aafia fua lea o le maaveave le fua. O le Maota leni maualuga o Samoa i lana saofaiga i matai, o le ala foi lene o lea e ala ai ona faataua. E leai se eseese o le faatulagaga i tua i nuu ma le saofaiga i totonu o le fale Fono leni. Aisea? E alu lava le tulafale latou i le mea e gata mai ai, ona lafo lea i le tala ina ia aumai le tofa i aiga e faaoololomaau e faaola le sala.

**FOFOGA FETALAI:** Malo. Ua maea le taimi o le sui usufono.

**Afioga FUIMAONO TEO SAMUELU TEO:** E faapena le lagona. Ona alu alu lea o sa matou faamatalaga, e tele mea ou te fia talanoa i ai. A o lau tuualalo lau Afioga, e tau le tolaulauina aiga e te tausī, o Sa Tupua ma Sa Malietoa, se ua soo Samoa, ioe. A fofola lo tatou fala, e tasi lava tatou, ioe. O le tuualalo, faifai malu le faiva, aua ne i o tatou naunau i le i'a ae maumau ai le uega, ne i avea lo tatou naunau ma auala foi e soli ai le vatapuia, leaga e i ai le vatapuia o matai, o le va o tagata e faaaloalo i ai Samoa, e faaaloalo i ai matai o nuu. Ia a saga fai i fea? Lo matou tu ma matamata ae fai lava? A o le a sa matou tala? O le a la matou tausī i le taitai? E faapena le tausī foi i totonu o nuu, e faaaloalo tulafale i tapaaui aua o latou e malu ai tapaaui. Ae ui o lea, e pei lava o lagona o le taeao lenei, Laauli, o le fale lenei o matai, o le tatalo a Falealili, a lea ua manino mea uma. A o le lagona ia ola le pagota. Tuu le avanoa, tatou galulue, tatou galulue, a ia aoga lenei mea e fai ma aoaiga, fai ma lesona i le sui usufono. Ia o le tatalo lea tautaulenua a Falealili ina ia mafai, tefa le tauala to mai manu, ia, toe tuu le avanoa i le sui usufono mo Gagaifomauga Nu.3.

Ia o le agaga faaaloalo lea i lau Afioga, manuia le Taitai manuia lau Afioga i le Fofoga Fetalai, aemaise o lenei Maota. Soifua ma ia manuia.

**FOFOGA FETALAI:** Ia, se i tulai mai le sui usufono mo Faasaleleaga Nu.1 i Sisifo.

**Afioga Hon GATOLOAIFAANA AMATAGA ALESANA GIDLOW (Faasaleleaga Nu.1 i Sisifo):** Lau Afioga i le Fofoga Fetalai, ou te tulai atu i le agaga faafetai mo le avanoa o Faasaleleaga Nu.1 i Sisifo po o le avanoa foi o le sui tamaitai mai Salafai. Ou te tulai atu foi o au o le sulī o Vaoita, le tina o tama ia na avea pule ia i Savaii. Ma o lou tulaga la lena ou te muamua ai ona ou faamalulu, faamaualalo i luma o le Palemene o Samoa i le Afioga i le Palemia, le Taitai o le Malo, lau Afioga i le Fofoga Fetalai ma sui usufono mamalu o le Palemene o Samoa. O le sese ua faamaonia, o le Lipoti ua taatia. Po o a nisi faamatalaga e toe fai, o lea ua faamaonia. Ou te tulai atu la e avatu malu i puega, aua o le sese o le sui usufono mo Gagaifomauga Nu.3, o le sese foi lena o Puleono i Salafai. O le tala, o upu faa-Samoa, a sala uta e tonu tai. O le a se faamatalaga ua sasi ua mafua ai lenei taeao, e faapena ona fesetai le olaga.

Lona lua o au faatoesega lau Afioga i le Fofoga Fetalai, e leai se aso tatou te le taua ai le suafa o le Atua, silasila mai le Alii, faafofoga mai le Alii, a o lafoga ma faatinoga e le tusa ai ma le silafaga a le Atua. O le mea lea ou te tulai atu faa-tina, faa-tamaitai e faatoese i luma o le Atua i ni lafoga e faalemigao ma le le ava o le tagata i le silafaga a le Atua i totonu o le Maota Fono o Samoa atoa. I lenei itula lau Afioga i le Fofoga Fetalai, o le tatalo pei ona maea se faamatalaga, o le agasala ua faamaonia. A o le taimi lenei, o le sailiga o malo i lalo.

O lau tatalo lau Afioga i le Fofoga Fetalai, a amanaia se leo o le tina, se leo o Salafai, lau Afioga i le Taitai o le Malo, e tatalo atu i lou tulaga faa-tama o le atunuu po o le tulaga faa-taitai e lavapapale, ia onosai, aua e tauave uma e lau Afioga leaga ma sese ma vaivaiga ma faaletonu. O le mea lea na tofia ai oe e le Atua, e faauuina ai foi oe ina ia lava lou onosai. E ui i le faigata, e ui ina ua oooo i lou tagata faale-lalolagi, ae faigata ua faauuina oe e le Atua, o oe o le tagata o le Atua. O lea e tatalo atu ai, alofa, o a ni vaivaiga, o a ni sese, o a ni faamatalaga ua le tonu ma le sao, e faamaualalo atu, avea lea ma se faamaualaloga o matou uma nei o sui usufono o Savaii, aua o Gagaifomauga Nu.3 o le itutino o Salafai. Matou te faamaualalo atu ai i luma o le Palemene o Samoa. Laauli, ia avea mea tutupu e fai ma aoga ma aoga i le lumanai. O oe le isi tagata e te saunoa i le suafa o le Atua, soifua i le suafa o le Atua. Ia e loto maualalo. E le na o le tautau o le suafa o le Atua ae le o faapea ona savavali ai.

Lau Afioga i le Fofoga Fetalai, faafetai tele mo lou avanoa, ia faamanuia mai le Atua, ia maua lou soifua aua le taitaiga o le tatou Fonotga aemaise le Afioga i le Palemia. Ae ou te le i nofo i lalo lau Afioga, afai ae le i faaluaina le lafo a le susuga i le Sui Palemia, ou te faaluaina. Faafetai.

**FOFOGA FETALAI:** Malo faafetai. Se i tulai mai le Afioga i le Minisita mo Pisinisi, Alamanuia ma Leipa.

**Afioga Hon LAUTAFI FIO SELAFI PURCELL (Minisita mo Pisinisi, Alamanuia ma Leipa):** Lau Afioga i le Fofoga Fetalai, atonu o lea ua faafofoga le Maota i saunoaga a sui usufono mamalu, e ese lenei taeao, ese lenei aso, ese foi lagona ua tulai mai, leaga e le o se mea e masani ona tupu le mea lea ua tulai mai, e le o se mea e masani ai. O lea la ua tutupu ae manatu i le tulaga i faaiuga e tatau ona fai, po o faaiuga foi e le tatau ona fai. O saunoaga uma i totonu o le Maota lenei, e i ai tatou Tulafono e i lalo uma ai saunoaga. O a uma foi gaoioiga a sui usufono e i lalo uma o Tulafono, tatou in-houses rules. Ma e i ai le uiga na ala ai ona fai ia Tulafono faapena, e le tuufaua ai sui usufono i a latou saunoaga, i a latou taga e fai. O lea la ua tulai mai le mataupu lenei o lea ua silasila i ai le Maota i lalo o tatou Tulafono. O lea ua avatu i le Komiti o Tupe aumai toe avatu i o i le Komiti, o aga ia o Tulafono, ua oooo lava i le mea e gata ai Tulafono. Ua aumai foi le fautuaga, ou te talia lelei le fautuaga ua aumai, e sao suesuega na fai. E le mafai ona tatou alo ese ai, the facts are undeniable. Ua sasi po ua sese faamatalaga a le uso na fai.

O lea aumai le faaiuga i le faasalaga e fai. Ae pei ona saunoa foi nisi, tatou silasila i le manatu lava sa faaali e Laauli i lona ia lava manatu o la e sao, ae na o ia lava lona, aua tatou te le iloa atu mea sa i totonu o le manatu o le Afioga ia Laauli lea e faapea ia, with all good intensions, with all good intensions, o la e aoga ma sao. Aua na faapea mai lava i le saunoaga a Laauli,

“E mafai ona ou aumaia se proof e tau atu ai e maua le afi e taugofie atu na i lo le afi lenei e aumai i le Lipoti a le Komiti, ia aloga lava e i ai se pisa? E leai se pisa. Ae leaga ua lafo faaupuga” Na aumai la’u afi,” lea la ua maua ifo e le sao, e ese le afi na aumai. A o le uiga sao lava lenei o le mea, o le taumafai o le manatu o Laauli e prove mai, e i ai afi taugofie atu. O lea ua tatou oo ai i lenei aso faigata.

Ua ou tulai atu lau Afioga i le Fofoga Fetalai ma le mamalu o le Maota, o le ma nonofo ai ma Laauli tainane o le Asiata i Satupaitea, e matua ese le mamalu o le nonofo ai. O la foi e faalogologo mai si ou itumalo, po o fea le mea ou te savali agai i ai, leaga o le Lautafi, o lona faalupega, “Afioga mai lau Afioga Lautafi, o oe o le Matua.” O lea la e faalogologo mai le itumalo po o le a sau gaoioiga faa-matua e fai i le tulaga lea, leaga o lea, o le Vaimalae lea ua aafia i le mataupu lenei, le va o le Aiga Samoeleoi, le Aiga Sa Asiata, Tapaau ma le Alataua, o le Tofa, Susuga, le Afioga ma le Faautautaga, lea ua saunoa le isi sui usufono o le matou Alataua, ae ou te tulai atu, o le va o au nei ma le Susuga ia Asiata, na amata mai lava i le amataga e oo lava i le faavavau, o le va lenei e tapuia. E alu alu alu mea faapolokiki ona gata lea, a o le ma va ma le Susuga i le Asiata, e faaaauau pea.

O lau tatalo lau Afioga i le Fofoga Fetalai, ia ua faamaonia le le sao o faamatalaga. E pei ona ou fai atu, o a lava ni manatu o Asiata na tuu atu ai tulaga nei i luga i ina, o lona ia lava manatu o lo o sao, a o lea ua faamaonia, o le talosaga, o la ua lagona e le sui usufono mamalu lona sese, ua sasi i lenei taimi. Ae talosaga atu, ou te lagolagoina le lafo ua faatu mai e le Afioga i le Sui Palemia, ua faamaonia, o lea ua aumai le faaiuga, i le sala ua tulai mai, faamagalalo le sala lea, a ia i ai se aoga ua aoga. Laauli, o oe o le Asiata, toe afua se isi taeao. O lea lava foi ou te nofonofo atu, ae faanoanoa foi lava i le tele o taimi i saunoaga e te faia e le faapea ni saunoaga a Asiata. O oe e te tausivaatele, ia lava lau tofa, o lo o faalogologo mai si o ta itumalo a o lo o feaveai nei faamatalaga. Ia alofa mai le Atua, ia maua foi se aoga o lenei mea, ia maua se aoga, atonu foi o le a faatonutonu ai nisi foi mea i le lumanai. Aua ne i faapea e fai ae iloa o lo o i ai le Tulafono tatou te usitai uma i ai.

O le talosaga lenei lau Afioga, ia manuia tele le tatou Fonotaga i lenei aso.

**FOFOGA FETALAI:** Malo. Ia, se i tulai mai le Afioga i le Palemia.

## **LAFO MO LE FAAAUAUINA O ITULA FONO**

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai ona o le taua tele o le Lipoti lenei e ono fia saunoa uma i ai sui usufono. E taofi ia lava le taimi ina ia saausi saunoaga a sui usufono. O le ala lea ou te tulai atu ai, *Ina ia faaaauau taualumaga a le Fono Aoa o i le*

*aoauli nei, seia oo lava ina maea ona lauliliuina le Lipoti a le Komiti o Tulaga Aloaia ma Amio Taualoa ona tolopo ai lea o Taulumaga a le Fono Aoao.*

I le tuuina atu o le lafo lenei lau Afioga i le Fofoga Fetalai, e taua tele le mataupu lenei, e oo lava i le taeao nei o lafo mai lava upu, o au lea e i tua o mea ia. A lea sa faasinoino mai lava lima, e leai se salamo. Lau Afioga i le Fofoga Fetalai, e le taua au. Ia ua faafia ona lafo mai upu a tagata e lalafi i tua o le OLP. A o le taua o le mataupu lenei, o le tausima mamalu ma aloaia le Palemene lenei o Samoa. Aisea? O tumutumu ia o le mamalu o Samoa i ona tulaga faalupe, Aiga ma latou Tama, o Tama ma o latou Aiga, Tulatoa o Aiga, Faleupolu tofia faapea Tumua ma Pule, Ituau ma Alataua, Aiga i le Tai ma le Vaa o Fonoti, lea ua i totonu o le Maota lenei lau Afioga. Ma o le upu e faasino ia te au o le Taitai, e faasino foi i le mamalu atoa o le Palemene o Samoa. E oo lava anapo, oo anapo. Lea ua sau watch it! ia outou faaeteete. O a ia ituaiga upu? Sa tele le fia tali atu anapo, e atagia ai le tagata ua matua mauauga tele le mea lea e oo i ai ma le vaai mauaalo mai i le Palemene o Samoa.

O le mea lea ou te tapatapa atu i ai, o le mamalu o le Maota lenei, nei ma le lumanai. A laaloa ai le vaai lea, talofa i nisi Palemene i le lumanai i le tulaga o le a oo i ai le Palemene o Samoa, e ulagia, e ulagia. Ia e uma nei foi a tatou felafolafoaiga ona talanoa foi lea i o, o upu faamaualuga, vaai mauaalo i le Palemene lenei o Samoa. I le tulaga o lape ia, e 3 lelei aso lau Afioga, o lea ou te tau matau, e 3 lelei aso o talanoa le mataupu lea, e faalua ona e fautua mai ia Laauli, se taatia le mataupu, ae tulituliloa lava, tulituliloa lava. O lo o i ai au lipoti e aumai e faamaonia ai, ia lea lava na aumai lipoti fola i luma o le Palemene. O mea ia e igoa o ni lape o lauga? O lape o lauga e uma loa faasao i totonu o le 2 minute, 3 minute. A o le 3 o aso, o ni faufauga ua leva ona fai, e atagia ai le masalomia o fuafuaga na aumai e le Ministry o tatou Police, e le Matagaluega o Leoleo. O le ala lena e le mama ai ia te au. Talofa i le Komiti i le tele o le taimi na alu ai. Aisea? Leaga e le i mama i le Komiti, e le i mama i le Komiti. O le tulaga lena lau Afioga i le Fofoga Fetalai, ia aua ne i mama ia i tatou le galuega tele na fai e le Komiti. Ae mo le puipuiga o le Palemene lenei mo le agai atu i le lumanai, ou te lagona e fia sausauna uma sui usufono ona faatoa ou tulai atu ai lea i se taimi ona avatu lea o se manatu i le mataupu lea.

O le ala lena ua ou faatu atu ai le lafo, ona e i ai lagona, e taua tele i sui usufono, uma leaga o le mamalu lea o tupu ma ee o Samoa na ala ai ona tatou nonofo i nofoa nei. Lau Afioga i le Fofoga Fetalai, o lau lafo lena.

**FOFOGA FETALAI:** Malo faafetai.

*Faaluaina e Minisita o le Kapeneta.*

*Na faamaonia le lafo.*

**FOFOGA FETALAI:** Ia manatua e 10 lava minute. Ou te fautuaina le paia o le Palemene, fai mai le isi talitonuga, o Samoa e le o se atunuu, o Samoa o le aiga. Ia, e sao foi, e sao lelei lava. Ou te fautuaina, a tatou o loa i le tulaga lena, e leai se isi o tatou e le aiga ia Laauli. Ae na outou finagalo, e le o se finagalo o le Taitai o le Malo, a o le finagalo o le Palemene, faatasi ma le finagalo o Laauli ina ia tuuina atu le mataupu lenei i le Komiti o Tupe ma aumai ai le Lipoti a le Komiti o Tupe, ona outou toe finagalo lea, ave loa i o i le Komiti o Tulaga Aloaia ma Amio Taualoa. O lea la ua aumai le faaiuga, e le i faigofie le fia aso sa fono ai. O le uiga o le agaga sa i totonu o le Palemene lenei, e saili le amiotonu ina ia aumai na o mea moni i totonu o le Palemene lenei. Ioe. O le agaga lena, ae afai loa tatou te o e tilotilo la i le isi itu ona o le va fealoai lea, ona taumafai loa lea e ufiufi a manugase le tulaga o le amio lea, ona o amio le taualoa i totonu o le Palemene e aafia i a tatou Tulafono Tumau. Ma e manatua foi, o se sui usufono e tusitusiaa i le Afioga i le Palemia, a o le Taitai o le Malo ma le Taitai o le Maota, ou te manatu tasi foi lea itu le faaaloalo, tasi foi lea itu le migao i totonu o le Palemene. Ua ou faamanatu atu e agai i ai a outou saunoaga ma silasila i ai i le itu lea. Ou te le faaoloatauaina le tulaga o outou finagalo. Ae a le lelei ona fausia le aso lenei, e mama i liu mama i oa le tulaga o le mamalu o le Palemene, taeao ma i e lua. Ioe, ia e leai e faapena, ae na o se manatu e fautua ai sui uufono mamalu, leaga e pei e foliga e sili atu le manatu i le va fealoai lea, aua e moni lava o le saofaiga a matai, ae i ai Tulafono e limataitaiina ai. Ia na o se fautuaga ae tulai mai... o ai le sui lea... Tulai mai lau Afioga i le Minisita mo Galuega, Felauaiga ma Atinae Eseeese.

**Susuga Hon PAPALIITELE NIKO LEE HANG (Minisita mo Galuega, Felauaiga ma Atinae Eseeese):** E momoli atu le faafetai i lau Afioga i le Fofoga Fetalai mo le avanoa. E puupuu lava se manatu lau Afioga, ae muamua ona faatauaina le Lipoti a le Komiti, i fautuaga ua tuuina mai ma faamatalaga uma ua molimauina ai le tulaga o le Lipoti sa tapena ma le loto faamaoni ma le suesuega sa faatino e le Komiti. E momoli atu le faafetai i lau Afioga i le Taitaifono aemaise foi le mamalu o le tou Komiti. Lau Afioga e faavae se manatu ona o le a fesiligia ai le integrity o Lipoti ia e aumai i le tatou Komiti faapea. O lea e aumai le fautuaga e suspend le Afioga ia Laauli, o lau la tali i le tulaga lea, ua ou talia le fautuaga, ona o le tulaga ia e pei o le tulaga o le puipuiga o le integrity o le tou Komiti. Aua sa saunoa foi le Afioga i le Palemia, o tonu tatou te faia nei e aafia ai taeao.

Ia, lau tofa i le Matua lau Tofa Iuli, lau Afioga Laauli, na pau lava le mea ou te faanoanoa ai i lau Afioga, e maniti lou tino i au faamatalaga ia e fai faasinotonu i le Afioga i le Palemia. Manatua foi lau Afioga o le Palemia o le Taitai o le Maota, o le taitai o tatou sui usufono na filifilia mai e itumalo.

Aua ne i galo i lau Afioga upu o le Tusi, o tatou uma e submit i le authority. O ai le authority lea e i totonu i i? O le Afioga i le Taitai. Ua matau lava, tulou foi, e tau le malie i le faalogo saunoaga pei e te lui le Taitai, ae talitonu foi o oe o le tagata e mafuta i le Tusi Paia, le Afioga Paia a le Atua. A o le tele o taimi ta te maniti foi lenei i au saunoaga. Ta te alofa foi i le Taitai, ia ae masalo e faamagalalo le Taitai i au saunoaga, atonu e faamagalalo oe e le Atua. Lau Afioga, o le tele o saunoaga e pei e agai i se tulaga foi lele ina ia faamagalalo le pagota. O au lava ia e faigata ona ou faamagaloina le pagota ona o mea ia e molimaaina, ae faafetai o lea ua admit e Laauli lona sese. O le tulaga lava lea e taua ai, o lea ua aumai le Lipoti tuuaia i mea ia na tuuaia ai, ma o lea ua saunoa foi le Afioga ia Laauli ua admit i le tulaga lea e tuuaia ai ia. E pei o le tulaga taua la lea. O le mea sili foi o la e ua faafogafoga mai le mamalu o le atunuu o lea ua admit le sui usufono mamalu i le tulaga foi sa faasea ai ma fai folafolaga sese i totonu o le Palemene. Atonu foi o se aoaoga lelei lea mo le Afioga ia Laauli, aua ne i toe faia le tulaga le mafaufau lea se i tulou, i le mea lava foi lea o le le ava i le Taitai. E manino lava i le upu a le Tusi, tatou te submit i le authority. O le authority la i totonu o le Palemene o le Afioga i le Palemia, a o le authority lea tatou te galulue ai o tatou o fanau a le Atua, o le Atua. Ia na ona faamanatu o le tulaga lea lau Afioga i le sui usufono ona o lena e te talai mai le loto faamaoni ma le amiotonu. Ae na o nai mea laiti lava ia o lea ua faamaonia sa e faatamala ai, ia mea sili o lena ua e salamo. Ae ne i faaumi se faamatalaga lau Afioga, a o lou foi agaga lena, o tatou uma lava e mafuta i le Atua e maua le agaga faamagalalo. E ui i lau vaai mo le lumanai e ono aafia ai faaiuga a le tatou Palemene i Lipoti a tatou Komiti lea e tuu i ai le galuega e o e suesue ma aumai fautuaga, ae peitai ane, o lea ua tele ina sausaunoa foi sui usufono mamalu, ona ou te talitonu o le toatele lava o sui usufono mamalu ua faavae le agaga ma le loto i le Atua, e pei o le mea lea e faavae ai Samoa.

Ia e pei o se faamatalaga lea e lagolago ai le tulaga lea ma lagolago ai foi le lafo na faatu mai e le Afioga i le Sui Palemia. Ia avea lenei mea ua tupu e le gata e aoai ai le sui usufono, ae aoaia ai foi tatou Matagaluega ia e faaletonu a latou galuega e fesoasoani ai i galuega a le tatou Malo. Ma lou faaaloalo lava. Faafetai.

**FOFOGA FETALAI:** Malo faafetai. Ia se i tuu atu i o ia Aana Alofi Nu.2 le fetalai ia Ili.

**Tofa ILI SETEFANO TAATEO TAFILI (Aana Alofi Nu.2):** Faafetai lava i lau Afioga i le Fofoga Fetalai mo lou avanoa. Ou te tulai atu foi e avatu foi se lagona aua le mataupu ua opea nei i le Maota Fono o Samoa. E manatu foi e faiva ese lopepe i lenei foi aso ma lenei taeao. O le alofa foi ma le agalelei o le Atua, ia o lea ua tuanai atu le taeao foi sa faapena ona e fusifusi lapalapa o malo fai lau Afioga ma sui o le tatou Palemene nei e momoli le



faafetai i le Atua Silisilie Ese. Ua matou manatu foi o lea ua tatou folau i le laolao, ua mavae atu atuava ma atuvasa sa faapena ona faaaaogagase ai le tatou Palemene ona o le tau pasiaina o le Tala Faatatau o le Tupe 2020/2021. Ia lenei la taeao, ua alausu mai foi le Palemene o Samoa, ae paga foi lea ua toe faapena ona i ai foi nisi o toatuga ua tulai mai i totonu o le Palemene ona o nisi o vaega.

O le Lipoti a le Komiti Faapitoa sa faapea ona latou suesueina lenei mataupu, o le a le toe oo i ai sa matou faamatalaga, na pau lea o le agaga o le faafetai. Faafetai lava i lau Afioga i le Taitaifono faapea foi sui usufono mamalu. E manatu lava e le o se faaiuga sa faatalaole ona fai, sa faapena ona liuliu i ai le tofa ma le faautautaga, sa fetuutuunai foi muniao. Peitai ane o lea ua aumai lau o le tou suesuega, ua aumai ma ona aulape e pei ona faataoto mai ai le faasalaga uiga i le sui usufono. O le mea taua lava i le matou matau, o lea ua faamaonia suesuega uma na fai i le tulaga e pei ona i ai. E le gata i lea, ua solia foi Tulafono i tulaga tau Fono faa-Palemene, o le ala foi lea e ala ai ona matou nonofo lava matou ma matau, matou te le soona tulai foi pe lafo se tala, aua e i ai tua o patatua, e lafo se tala ae tapa se faamaoniga, e pei la ona tulai mai le vaega lea. O lenei la ua le gata ina faafofoga i ai le Palemene i le aso, a ua molimauina foi e Samoa o lo o faafogafoga i lenei foi aso i le mataupu e pei ona i ai.

Ona matou manatu lea, e agai sa matou faamatalaga i le Susuga i le sui usufono mamalu ia Laauli. O le upu moni lava ia, e te fuuaoa lava le toatele o sui usufono i le Maota lenei. E faavae lau faamatalaga ona o lau lafoga na fai i le taliga o le savali foi lea a le vaega lea a le SSIG na matou feiloai na e fesiligia ai tootoo na i totonu o le Komiti. O le uiga la lena o lau tala, e te fuuaoa le toatele o le Palemene lenei e see foi le uluga i le lua va nonofo ai ma le tatou Taitai. O le tele lava o taimi e matau lava ma le totoa e maniti foi tino, ioe, aua e i ai le avafatafata ma le avasootuli i le tatou va nonofo ai. Ae paga lea, e faoa lava i le ta nisi o taimi ae matou nofonofo lava ma tilotilo atu ma le alofa i le tatou Taitai. O lea la lau Afioga i le Fofoga Fetalai, le Afioga i le Taitai o le Malo ma le mamalu o lenei Palemene, ia o upu lava ia afai ua sala uta tonu tai, ae matou te le faia foi se faaiuga o lena e i ina le uta a le faimea, le tofa ma le faautautaga i lau Afioga i le Fofoga Fetalai ma le Taitai o le Malo, o lena so matou lagona, matou te le fai atu e faaauau le faasalaga e pei ona aumai e le Komiti, ona pau lava o lea matou te tatalo ma faamaualalo, aua o le faaletonu lava o Laauli, e i ai foi lo matou sasi i le tatou va nonofo ai.

A o lea se matou faamatalaga e tulai atu ai ma le agaga faaaloalo i lenei foi ituaso. Ia manuia le Fono a Samoa.

**FOFOGA FETALAI:** Faafetai. Ia se i tulai mai le Afioga i le Minisita mo Faatoaga ma Faigafaiva, sosoo ai ma le Taitaifono.

**Tofa Hon LOPAOO NATANIELU MUA:** Faafetai mo le avanoa. Lau Afioga e le umi tele sou manatu. A silasila foi i le galuega na gapatia ai le Komiti ma latou galuega fai, o tulaga ia masani a le Palemene. A o nei e fai ai taeao, o taeao e fau atu nei. O le tatou faaiuga e fai, o lena. Ona i ai lea o le manatu lau Afioga, pei ona ou fai atu, e faapuupuu lava le finagalo o le Vaisigano Nu.1. E i ai foi lau lafo e avatu, 30 aso e aunoa ma ni faamanuiaga, win-win le Komiti, e faapena le Afioga i le sui usufono mamalu. O nisi upu e uiga i le sui usufono mamalu pei ona i ai na ou fia tautala ai nei a ua toe pulea lou loto ua toe taofi. A o lau fautuaga lena lau Afioga i le Fofoga Fetalai, malie afenoa le finagalo o le Taitaifono ma le Komiti, ua ou tuuina atu e a pe a tuu mai i lalo o le 30 aso le sala, leai ni faamanuiaga. Ma le faaaloalo.

**FOFOGA FETALAI:** Malo faafetai. Se i tulai mai le sui usufono mo Alataua Sisifo, le Taitaifono o le Komiti o Tupe.

**Afioga ALIIMALEMANU ALOFA TUUAU (Alataua Sisifo):** Faafetai mo lou avanoa. Lau Afioga i le Fofoga Fetalai, e lagona foi le agaga e pei e faale-lelei le faalogo i lenei taeao ona o lea e matau, o a ma felafolafoaiga i luga o le Tala Faatatau o le Tupe na mafua ai nei Lipoti ma le tulaga ua i ai le tatou Palemene. A tala o tatou gafa, tatou te aiga uma lava. E i ai foi lo matou faalupega, tatou te aiga uma lava. E i ai foi lo matou faalupega ua outou masani ai i tina, o latou o le pae ma le auli, ae taua foi ia te au lo matou omai uma mai le motu tele lea i Salafai. Pau lava lea o le lave laitiiti lea e i ai, o le a fai tatou ma faataitaiga mo le lumanai o alo ma fanau ia e saofafai mai, e faapea le atunuu atoa o lo o faafogafoga tapuai mai. E pei ona maua i nisi saunoaga, o mea tatou te faia nei, e faavae ai le lumanai o le tatou atunuu. Tatou te maua uma lava le loto faamagalalo. E pei ona fai atu se tala, o le taimi lava na amata ai le mataupu lea, na matuai ou lagona lava le loto faamagalalo ia Laauli, aua foi o la e ou te iloa e le i maua atoatoa uma e Laauli mea ia na mafua ai ona fai le faaiuga lea a le Matagaluega o Tupe lea sa tapena le tatou Tala o le Tupe. Ae ui i lea, e le toe oo i ai se tala. Na ou faamagalalo ai lava i ina ma ou lagona le alofa i ai, leaga o lea na te le i maua uma mea sa tatau ona oo i ai ona fai ai lea o ana saunoaga. Ae ui i lea, o lou lagona lena, o le a fai tatou ma faataitaiga i le lumanai. O a fa tatou ma si tama lea o le Ofisa o Tiute lea na faamalolo? O a fa tatou ma le aufaigaluega lea e faamalolo pe a oo ina maua ni tulaga faapea e maua ai o la e na faamaonia ni a latou amio ua le tonu? Faatea, suspend, faamalolo, nai tagata faigaluega. A o lea a oo mai ia tatou o taitai, leaga foi o tatou o matua, tatou te lagona le loto faamagalalo ona tatou faapea loa lea, faamagalalo. Afai o le tulaga lea e i ai, faamagalalo uma la a tatou faaiuga ia na fai i le aufaigaluega lea na oo i ai tulaga faapea. O le mea lena o lea ou te popoe ai i le tulaga lea o le a tatou oo i ai, o le a tatou faia ni faataitaiga i lou lava lea taofi, aua ne i toe faia ni

Komiti e iloiloina ni amio taualoa, na ona aumai lava tatou otegiaina i luma i i, faamagalalo loa. O lou lava lea vaivaiga le Alataua Sisifo. Ia, o le faamagalalo ae le faapea la o le a sao ai le sui usufono ae ua tatou talia lana faamagaloga ma lona sese lea ua i ai. Pau lava lea, talia le Lipoti a le Komiti aua le vaai i luma, ma tatou vaai i fanua ia, lea e faalogologo mai, o latou ia o le lumanai o le atunuu. O mea e tutupu i luma, e aumai mea o le aso lenei e toe fai ai isi mea ia i le lumanai. Manuia le Fono lau Afioga i le Fofoga Fetalai.

**FOFOGA FETALAI:** Malo faafetai. Masalo toe pau lea o le saunoaga... Malie se i tuu atu ia...

**Afioga TUIFAASISINA MISA LISATI LELEISIUAO PALEMENE (Palauli):** Lau Afioga i le Fofoga Fetalai, faafetai i le avanoa. E fia faalelelei foi se manatu o Palauli Ssasae, faafetai ua 3 vaiaso e le i faia se manatu o Palauli Sasae i le tatou Tala o le Tupe, a o lea ua maua le laolao, e fai ai se manatu foi i lenei Lipoti aupito sili ona taua i lenei taeao.

**FOFOGA FETALAI:** Malo. O le fesili muamua lava ia oe, ua e malosi, aua leaga o lea sa...

**Afioga TUIFAASISINA MISA LISATI LELEISIUAO PALEMENE (Palauli Sasae):** Lau Afioga i le Fofoga Fetalai, o lea lava, ua uma ona pasia le 14 aso sa nofo fale ai.

Lau Afioga i le Fofoga Fetalai, e ave le faafetai i le Lipoti a le Komiti i lenei taeao, e faamaonia foi le galuega maeaea na oo i ai sailiiliga ma le tulaga e i ai. Ma e fia faamaonia foi le lagolagosua i le Lipoti aemaise lana fautuaga ua aumai i lenei taeao, ae mulimulitai lava le sui usufono mo Palauli Sasae aemaise le tootoo Vailoa i le amiotonu e faia ai lenei Lipoti, aemaise o tatou lafoga i totonu o le Maota lenei. E faavae lava se manatu ona o matou nei o sui usufono fou ua pale mai i le Maota lenei, e faateia lava foi se lagona i le maoae foi o faaupuga aemaise lafoga e taitaiina ai o matou tagata, o lenei lava matou te nonofo lava ma taputapu i lea aso ma lea aso, aemaise o le tulaga taualoa o lo o i ai le mamalu ma le galuega a le Palemene lenei. Aua e tautalaaso le tulaga o lo o i ai le tatou Palemene aemaise le lumanai manuia o le tatou atunuu. E pei o le agaga lena ua ese ai foi lagona o lenei taeao, o lea ua faatulai mai le saofaiga a Puleono i Salafai, e ese foi le latou foi lagona i lenei taeao, a o Palauli Sasae, e alu lava i le Lipoti o le amiotonu ma le puipuia o le mamalu ma le tamaliiaga o le Paeaiga aemaise ole mamalu o le Palemene. Ia e maniti lava tino foi o matou nei e laiti, matou te nonofo lava i taimi e faifai ai foi saunoaga a Laauli, aemaise o le sui usufono foi e masani i ai ma le tulaga e i ai, ia ua faatusa lava lona laei e

matua atu i lo tagata uma o lo o i inei, e atagia mai ai, e ese foi le lalolagi o lo o i ai lona ia mafaufau.

A o le tulaga o lo o i ai le tatou omai i totonu i inei, e tutusa uma lava tatou, aua a tatou talatala loa i tua, e fai lava se eseese foi o le mea tatou te agai mai ai ma tatou omai ai. O lea la, e fia faaleo ai lava... ua fiafia lava ua maua lenei agaga e fai ai lenei mea ona o le Lipoti lenei, ua alu ai tupe a le tatou Malo, a o le faigofie ia o le mea sa tatau ona fai i le taimi lena na i ai o le sau toe faasao mai le Lipoti, toe faasao mai upu na fai, ia ona uma ai lava lea i ina, se meamanu e leai ni tupe e alu i le faiga o le Komiti lea, leai le isi Komiti, ua maumau uma ai lava, tuli le tama lea na faigaluega i le Ofisa o Tiute, ua tele ai lava lenei gaosa. Ma e tatalo atu, masalo foi lenei taeao ua lagona foi e le uso ia Laauli le tulaga o le galuega sa i ai, ae tulai atu ma le ava ma le faaaloalo ou te lagolagoina le Lipoti a le Komiti e pei ona faatulai mai. Faafetai.

**FOFOGA FETALAI:** Malo. Tulai mai le Minisita mo Fesootaiga, Faamatalaga ma Fesootaiga Vavave Faaneionapo.

**Afioga Hon AFAMASAGA LEPUAI RICO TUPAI (Minisita mo Fesootaiga, Faamatalaga ma Fesootaiga Vavave Faaneionapo):** Faafetai i lau Afioga i le Fofoga Fetalai mo le avanoa. E matauina foi o lea ua toetoe a tumu le sasaga i le utugavai o le fefulisaiga faalaaui mamafa o finagalo o le Maota nei e tusa ma lenei mataupu. Ae ou te le i agai sou lagona i lenei mataupu, lau Afioga e muamua ona ou faafetai atu i le Komiti e tusa ai ma le latou Lipoti i lau Afioga Nafaitoa Talaimanu Ketu o le Taitaifono, lau Tofa Lauofo Fonotoe Nuafesili o le Sui Taitaifono, lau Afioga Tafua Maluelue Tafua o le sui usufono, lau Afioga Taefu Lemi o le sui usufono, lau Afioga Lio Foleni o le sui usufono, lau Tofa Aumua Isaia Lameko o le sui usufono ma lau Afioga Alaiasa Moefaauouo o le sui usufono. Lau Afioga, sa ou manao ina ia faafofoga le atunuu i le Komiti sa lauliliuina lenei mataupu faigata ona e foliga mai o le Komiti o lo o i ai uma i totonu Loia, o lo o i ai i totonu Suetusi, ma i latou ua matua lava le atamai ma ua leva i totonu o le Maota lenei. E malie lava i le faalogo lau saunoaga i le taimi ua mavae, o Samoa o le aiga, a o le Maota foi e i ai le talitonuga lau Afioga e pou i le tofa ae ato i le faautaga, o sui usufono mamalu uma o le Maota lenei. E i ai lava taimi tatou te faapea ai a tatou felafolafoaiga, e le milia faau upu o le Maota lenei, ae matou te manatu matou, e i ai lava lona gataaga, ia ma le mea e gata ai.

O le tulai mai o lenei mataupu lau Afioga e matauina e le i tasi se Komiti. O le Komiti o Tupe, ona toe talosaga lea o le sui usufono mamalu ina ia tuuina i le Komiti o Amio Taualoa, ia o lea ua aumai le Lipoti. Ae moni foi i le faalogologo, o lea foi ua matauina i totonu o le Lipoti le tulaga i le

faatinoina o le galuega, ae faafetai o le toe faatinoga lona lua o le tauofoga, o lea lava la sa toe tapa le atamai faapitoa i le tulaga tau eletise.

Lau Afioga, e tulai atu ma le faaaloalo, o le mea lea e tupu i le taimi lenei, o lea e taufai lagona uma e sui usufono le faamaualalo, a o lau ia faalogologo i le lauga a Laauli, e le o faamaualalo Laauli e tusa ma le Lipoti. O lou lagona lena lau Afioga. Ma ou te manatu, e tatau ona fai i ai se faaiuga, tatou te matau i le agai i luma e tusa ai ma saunoaga a le tele o sui usufono aua le mamalu o le Maota lenei, ina ia aloaia a tatou faiga faavae ma tulaga uma i a tatou upu e lafo i totonu o le Maota, o ni upu e le taitaiseseina ai le atunuu. Ae leaga e uma atu foi i lau Afioga, ma e molimauina lava foi i tua atu o le Maota lenei, e ui lava i mataupu ua maea ona faamaonia i a tatou felafolafoaiga, ae o lea lava e avese lava i tua e le sui usufono mamalu ma nisi o sui usufono. O le faalavelave la lea e tupu mai, o le tele o le atunuu e le o faalogologo i le tatou Fono lea e faamaonia ai le tele o nei mea, ae o la e la ua fesiligia ona o le faalogologo i upu e taitaisese ai le atunuu e tusa ma tatou mau o lo o faapena ona faamaonia uma lava i totonu o le Maota. O lea la ou te tilotilo atu foi i isi tagata ia i luga o upegatafailagi i le tatou Fonotaga o lea lava e fesili po o fea le \$20 miliona, fea le \$20 miliona. A o lea ua maea ona faamaonia i totonu o le tatou Fonotaga, ae mafua mai ona o mau ia e ave i tua atu o le Maota i nisi o faatalatalanoaga i luga o TV ma... o la e taitaisese ai le atunuu, e pei lava la o le mataupu lenei lau Afioga.

Ou te tulai atu ai i le ava ma le faaaloalo, o se lagona o le matou itumalo matou te lagolagoina le Lipoti a le Komiti ina ia faamaonia le solitulafono e tusa ai o le taitaiseseina o le Palemene. Ona ou faaluaina ai lea o le lafo a le Afioga i le Minisita o Faatoaga lau Afioga ina ia toe teuteuina le lafo a le Komiti. Ou te faamalulu atu i le Komiti ona o le lafo faatu ina ia faamalolo le sui usufono e tusa ma le 3 masina, leai ni alauni e agavaa ai e tusa ai o tulaga faa-Palemene. Ae ui i lea, ou te manatu e tatalo atu ma le faaaloalo i le tatou Palemene nei, ua ou faaluaina le lafo a le Afioga i le Minisita mo Faatoaga ina ia faaititia mai mai le 3 masina i le masina e 1 e faasalaina ai le sui usufono mamalu.

Ia o se leo lea e faaopoopo atu i lenei mataupu a le matou itumalo lau Afioga. Faafetai.

**FOFOGA FETALAI:** Malo. Se i tulai mai lava le sui usufono mo Anoamaa Sasae.

**Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU (Anoamaa Sasae):** Faamalo faafetai i lau Afioga i le Fofoga Fetalai. O au o le sui usufono o le Komiti, ae i ai lou manatu o lea ua tuuavanoa e sausaunoa sui usufono mamalu i lenei mataupu. O lea foi ua atoa lio o le masina i paia o sa ma mamalu. Ua logo foi faa-Tutuila le Maota ma Samoa i le afuaga o lenei

mataupu. Ona ou manatu lea, se e tele aa o le tagata i lo aa o le laau. O le vaai lea pei ona malie, o Samoa o le aiga, a o le tatou Fonotaga leni ma le tauaofiaga faa-Palemene, e leai, e moni a au o lupe na faia mai le fuifui aua Samoa, e le gata o nei, a o a taeao, a o a taeao. O le faletele leni, o a iole ma mea uma, o le faleoo ma... e leai e gase lava iinei i le faletele leni. O lea foi ua ou maua lafoga, e faa-matai le tatou Fono, ae a ou vaavaai i aga, e le o aga ia faa-matai i le va faa-Tumua ma Pule. Afai o Pule lea e tu ai le faalavelave, ia o le a tou toe omai lava toe tatalo mai outou, ae faapefea le usoga? Se e faapena ona fai le tatou atunuu, e te nofonofa lava ma matau aga a le Maota. E i ai foi taimi e nofo nofo lava tulai ae lea, o le Pule lea e a o le Pule lea e a, e olo lava le fua a Tumua, olo lava le fua, tausi le filemu, tausi le filemu. Ona ou manatu lea, o leni lava mataupu, se ua tele manatu ua fai i ai, ua saausi foi finagalo o sui usufono e uiga i le mataupu, ona e le fou, e le fou. Saunoa le Taitaifono, o le matou manatu foi lea, tuu mai i luma o le Palemene, fai i ai le finagalo o le Palemene. Afai e fia fai ni a tou lafo, ailoga e talia e le matou Komiti ni tou lafo? Fai ni tou Komiti e fai ni tou lafo. E 2 lava mea, talia ma le tafea o le lafo, pau lea, pau lea. O le agaga atoa lena o le Komiti.

Lau Afioga, e masani foi ona ou faalogo i lafoga a le sui usufono ua ou fautua foi i ai o ia o le uso. O lea foi ua saunoa le Minisita mo Galuega lafo le suafa Iuli, o le ioimata o le sui usufono leni mai Anoamaa mai Falefa, e le o ni tala e aveane ai. O Iuli, o le tula o le Alaiasa, o le sao lena o le va nofo ai, e le mama. O le mea lena ou te fai atu ai, e tele aa o le tagata i lo aa o le laau. Ioe. O lea ua tatou omai i leni taeao na liugalua, ia o nisi taimi e faaoioi, lau Afioga Tupua, i le lua va ma Fatialofa, a o lea lava ou te nofonofa. Leaga a ou tala foi le mea lea, leaga o lea e iloa uma e Samoa le mafuaaga o le mea lea. Ona ou faapea lea. o le a le mea tou te malilie ai, Pule i Salafai, o le tiute lena o Tumua e fai, faaoololomaau. O le tiute lena o au leni ou te nofo iinei ou te talosagaina le Maota i le tofa ma le faautaga loloto, pei ona ou fai atu o le Maota leni e malu ai Samoa. E pei ona ou fai atu o le Maota leni, e leai se isi o i sili, e leai se toe aisili, leaga e le toe omai lava outou toe tatalo mai i i e fai lava e outou outou, o lea e tatau ona outou vaai i le lea, o le va lea e taua, le vatapuia lea. Ona ou faapea lea, ne i faaumiumi se faamatalaga a Lufilufi, ioe...

**FOFOGA FETALAI:** Ua maea le taimi o Lufilufi.

**Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU:** E tetele lava a pesega ae alofagia, afai foi o le a se tofa o le a sasaa e le Taitai o le Malo ma i tatou uma, tatou tepa taulai i le fua taualuga, o le finagalo o le Atua. Na ona matou faaoololomaau, ae le fai ai. A o le matou tala lea, ia manuia le filiga, manuia le sailiga o le tofa, manuia lau Afioga i le Fofoga Fetalai, o oe

lava o le toe ulutaia, o oe e te faatautaia mea uma o le tatou Maota. Ia maua sou finagalo. Manuia le Fono a Samoa.

**FOFOGA FETALAI:** Malo.

**Susuga Hon Laauli Polataivao Leuatea:** Lau Afioga i le Fofoga Fetalai, ou te tulai lava i le ava ma le faaaloalo tele i lenei vaega o le aso...

**FOFOGA FETALAI:** Ia, se i tuu atu ia le avanoa.

### **LAUGA FAAMAVAE A LE SUSUGA HON LAAULI POLATAIVAO LEUATEA**

**Susuga Hon LAAULI POLATAIVAO LEUATEA:** Ioe lau Afioga i le Fofoga Fetalai, o lenei lava ua te matau ma le totoa, ua ta gualofa i faafofoga atu i tuleiga ma saunoaga a sui usufono mamalu. Le paia e i le nofo a Pule, ou te lagona le moni o lo outou alofa. Le paia foi i sui usufono uma o le Palemene o Samoa, ia ua ou lagona lo outou alofa, faafetai i lo outou manatu mai ia te au, faafetai lo outou seu silasila, ua maea foi ona avatu, ua le avatu faa-tasi lau faatoesega lau Afioga i le Fofoga Fetalai, ua avatu foi sautualasi lou manatu ma sou lagona. O sau tu ma sau aga sa faaletonu, o lea ua ou tautino. Lau Afioga i le Fofoga Fetalai, e ta liu lava ae popoe o la e tapuai mai si ou itumalo. Ua ta musu ua ta ma i avea lou faaletonu, leaga o le mea e fai mai ia te au, e oo i lou itumalo. Lau Afioga i le Palemia, lau Afoga Tuilaepa Auelua Fatialofa Neioti Aiono Sailele Malielegaoi, ou te faamaualalo atu i lo ta va faafeagai ai, malie lou finagalo i taimi uma sa ta va eseese ai. Ae silafia e le Atua lou fatu mo oe, e te silafia lelei, o lou agaga lea. Lau Afioga i le Taitaifono ua ou talia la outou lipoti. Ua ou talia. Ou aiga faalogologo mai ma lou itumalo, ia toa le tai, toa le tai. O lea ua ou faalalolalo, ua le faa-tasi ua le faa-lua, o sau upu po o sau tala na fai ile Maota lenei, ua ou faatoese atu. Ma e le o lilo ia te outou lau mataupu, faatoa 3 aso talu ona uma le mataupu, sa faapena ai ona ou nofo i le fale o maasiasi. A na sau le faaiuga e faaletonu, e faapenei o la ou te i uta i le falepuipui. Ae ui i lea lau Afioga i le Fofoga Fetalai, ou te faaalua manino ai i lenei aso, i le faafofoga a Samoa lau Afioga i le Fofoga Fetalai, ou te tuuina atu ai lau faamavaega aloaia mo le Palemene o Samoa. Ua ou manatu, ua ou pule i lou loto, o a tou tuleiga ma a outou saunoaga ua outou saunoa ai i le aso lenei. O le a ou alu ma le oona o mea ia. Faafetai nofo a pule, faafetai ia outou uma na lagolago ia te au. Aua o le taeao lenei, Toleafoa ou te le sola e pei o le sola a Faleata, pe ou te mou e pei o le mou a Aana. O le a ou savali gugu e fai lo outou finagalo. O le aso ua ou faamavae aloaia atu ai i le Palemene, ua ou faamavae ona o le mataupu lenei. Ua ta ma, ua ta

musu i toe tulai ae foi sui usufono a le Palemene, e na ona fegaui lava ma feato. O la e tapuai aiga sa Malietoa ma aiga sa Tupua ma le faletolu, tatou silasila i le Atua, o ia o lo o i ai le amiotonu o mea uma. O le aso lenei, ua ou talia le faaiuga a le Komiti, o lou faamalolo mo se vaitaimi. O le faamalolo lava lena o au mai le Palemene.

I lou agaga faaaloalo, lafo atu i lau Afioga i le Fofoga Fetalai, ua uma se upu, faamanuia le Atua i lau Afioga, ia maua lou malosi i le tino le agaga ma le mafaufau, e tauave ai le Palemene o Samoa. Faamanuia i lau Afioga i le Palemia, o le a sou sese i lo ta va, faamagalo au e le Atua. Le tapuaiga a Samoa ma ou aiga, ia ua ou pule i lou loto, faasatauro au, ae ia aua nei savea ai le maaveave e le fua i le tatou motu. O lou agaga lea ma lou faaaloalo. Ae o le a ou tulai ma le Maota.

**FOFOGA FETALAI:** E faamalulu atu i le sui usufono mo Gagaifomauga Nu 3. O le agaga maua i lenei Palemene, e leai se isi o manatu e tuulafoai oe, tulou, sala le upu ua ou fai atua. E leai foi se isi e faapea e le alofa ia te oe. Laauli o Samoa o le aiga, o le ala lea na ou fai atu ai le upu lea, o Samoa o le aiga. E tatou te galulue mulumuluaufoe, ina ia saili se manuia aua le tapuaiga a le atunuu la e tapuai mai. Tatou te le i o mai, tatou te tauaimisa, ae na tatou o mai e fetufaai le tofa, ina ia faapena ona maua ni manogi e faasua ai le lolo. E faapena foi ona tatou ave le faamoemoe le faatuatuaga i Ofisa Sili o Pulega o Matagaluega ma Faalapotopotoga a le Malo, i le latou foi fatuaiga tausii latou te fautua mai ai i le Malo. Ona e te silafia e le tau avatua i luma, ona aumai lea i le Kapeneta ona faapea lea ona filifili foi le Kapeneta, fesili mo se fautuaga a le Loia Sili, ona ave lea i luma o le Palemene, e avea o teuteuga o se Tulafono po o le a se pili. Ae o le finauga o lo o mafua ai lenei faatauteega, o le tulai mai o le sui usufono, e manatu e fai mea faalogo le fiasefulu o i latou ia, i le fingingalo o le sui usufono. O le tiute la o le Malo o le tulai atu e puipui le itu lea, o la e sao le faasologa ol e mataupu e pei ona tuuina mai. Ne i umi naua se matou tala, ae o le puipuiga lena i le taimi na e tulai mai ai i le Minisita o Faatoaga i lena vaitaimi. E te tulai e defend le tulaga o le Matagaluega ma le Malo, pe afai e tulai atu se isi tuuaiga, e tuuaiga ni faiga faavae. O le mea la lea, e leai se agaga faapena o i le Palemene, ona o lea e foliga ua e fai mea ita. Onosai, onosai ona o le mea o lo o taumafai atu nei, e le mo nao lau afioga. E mo tatou uma lava, e fai mai, a faafofoga mai foi alo ma fanau, o tupu ma ee o le atunuu o lo o i ai lo latou faamoemoe e tauva mai e fai ma taitai o le atunuu. Ia o latou iloa, e o mai ma le faaeteete i le Palemene lenei, e saili le amiotonu e saili le mea moni, e o mai ma latou e saunoa ma fetalai ai. Ae le faapea e o mai e lau mai, tulou e sala le gagana, e o e lau mai ni lapisi ma ni otaota, e against ai i le Malo, pe faatauta ai le isi sui usufono i le isi sui usufono. E leai, e le o le agaga lena, e tataua ona tatou faia se fofonei ia manuia taeao ma e lua. Aua tatou te tiu talaloa leaga e tuuina tatou. Ae o le a le mea na le fai ai ia Laauli?



O le fesili lena, O le a le mea na le fai ai ia Laauli, ae o le tali lena, fai mai leaga e aiga uma i ai sui usufono o le Palemene. O le a le mea ua tetea ai le aufaigaluega a le Malo, a molia i se a? e tetea, ae a oo mai ia tatou ua faamagalalo. E tatau ona tatou silasila i se tulaga, afai ua tatou o i le faamagalalo, e leai se mea aua o tatou e pule, o tatou o taitai. O le mea lena o le mea tatou te fau tele. O le mea la lea, ua na ona ou taumafai e faatamamua se lagona, o lo o taumafai i ai le Taitai o le Malo. O le Taitai o le Malo tatou te faaaloalo i ai, aisea? O ia o le Palemia, e lagona foi lou tiga, pe a ou faalogo atu, e saunoa atu lava le Palemia, ae saunoa mai, saunoa mai. Taatia ia au ia, ua ta masani lava i le tulaga e i ai, ae e faapena. Sa e i i foi oe Laauli, o le lagona foi lena sa i ai.

O le mea la lea, a o faafofoga mai Samoa, o le manatu lena o le Nofoa, ae o le a ou tapa lau Afioga i le Palemia, e te tulai maia. Ae pei ua ou faatamamua i se lagona faapena.

**Susuga Hon LAAULI POLATAIVAO LEUATEA:** Ioe, o lau Afioga i le Fofoga Fetalai, ua ou apaapa atu lava, leaga ua avea au ma tagata leaga i le tatou mafutaga i lenei aso. O lagona ia, ae ua ou manatu Toleafoa, ia e finagalo malie, e le o se faata le mea lea ou te fai atua. Ia e malie, ua ou pule i lou loto, ua ou pule i lou loto, o a uma tuleiga ma saunoaga o le aso lenei, tatou ave lea i uta. E toe oso foi le la, e toe oso le la i le mataupu lenei. Ae ua lava ia lea, se faamolemole, faamolemole, ua ta aioi atu, aua e fai foi o upu e fai iinei, a o upu ia te mafatia i upu i fafo atu o le Palemene. Ona ou manatu lea, Toleafoa faamalulua atu o le a ou tuua le Maota ma lou agaga faaaloalo. Ae tuu atu pea ia e fai le finagalo o le Afioga i le Palemia, ma le Komiti faa-Palemene. O lou tulai, e le tatau ona ou toe nofo i i, o lea ua ou faamavae atu. Ua ou tootuli atu ma ou faalalolalo atu, o le a ou tulai mo le aso, o le agaga lena o lenei aso, ma le faamoemoe na o le Atua, na te silafia lou vaivai. Ae o lea ua uma ona ou faamaualalo atu, o le a se va faafeagai ai, se upu ma se tala i le tatou mafutaga, faamagalalo Laauli. Ua uma foi ona ou faamagalalo le Afioga i le Palemia, ua ou faalalolalo atu foi i lau Afioga i le Fofoga Fetalai ma le tapuaiga a Samoa i lenei aso, ua lava lea mo au. Ma lou agaga faaaloalo.

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai, ua ou tulai atu ma le agaga faaaloalo. E masalo e leai se isi o tatou e le o te i i le finagalo ua faaaliga e le sui usufono. O lea e faagasolo ia saunoaga, ae i ai le taofi, e uma ona ou tulai atu lea e fai sau faamatalaga, aemaise foi o lea ua taoto lafo. Na i ai lava lou manatu, se i maea le faaaliga o taofi, ona ou faia lea o se tuualalo foi i le Palemene, o se tulaga tatou te fiafia uma ai, fiafia ai foi ma le sui usufono. Ae o le taua ia te au, ia mau i faamaumauga, o lea foi ua uma ona

aumai lana faamatalaga ma ua ioe e tusa ai o le lipoti lea na aumai. Ou te faafetai foi i le Komiti e tusa o le latou sailiiliga. Ia manatua, e le tasi se Komiti, e 2 Komiti. Ma o le finagalo lava o le sui usufono, lea na mafua ai ona lagalaga lenei mataupu, e pei lava ona faafogafoga mai, o ou toe agai i le amataga o lenei suesuega, ina ia faamaonia ia le tuuaiga ua uma ona avatu i o i le Matagaluega o Leoleo. Ma ia te au, e pei foi ona ou taua, sa lelei i lau faalogo lana tuualalo mai i le Palemene. O le ala lena na ala ai ona ou manatu e tatau ona fai se suesuega, ina ia matua saili pe sao le tuuaiga faasino i le Matagaluega o Leoleo. O i ina lea na amata mai ai le mataupu lenei. Ua uma foi ona e saunoa, e faa-lua ona e saunoa, ua lava ia lea tulaga, e pei ona e silafia na tala aao o le sui usufono ma aumai faamaoniga i luma o le Komiti, o faamaoniga sa ou manatu foi, e tatau ona faamaonia lelei, i te i ua tutuli nisi o le Matagaluega o Leoleo ae le faamaonia. O i ina la lea na ala ai ona ave le mataupu i le Komiti o Tupe, aumai le latou lipoti ae augani mai lav le sui usufono e ave i le Komiti Taualoha. O lea foi la na ou toe tulai atu foi, faatu le lafo, ave loa i le Komiti Taualoha e tusa ai o lana fanoga po o lana talosaga. Le lipoti la lea ua tatou talanoaina i le aso. O lea la e le i saausi ia finagalo o le tatou Palemene, o aga ia faa-Palemene. O lea foi la ua faafogafoga mai, i sui usufono na sausaunoa, e i ai se manatu e faamagalalo. O lea e le i uma le tatou fefaasoaiga, ma o lau faalogo atu, e fulisia i le faamagalalo. O mea uma ia e tusa ai ma tatou aga faakerisiano aga faaleaganuu. Ia ma aga faa-westminister. O lea la ua...o lea e pei e vaai atu toetiiti uma felafolafoaiga.

Ma o le a tau atu loa le agaga sa ia te au, e le toe tuua i tua. O le agaga sa ia te au, o lea ua taoto le lafo a le sui Palemia, ma e tatau ona fai ni ai o mea ia. O le galuega tele sa faafeagai ma le Komiti o Tulaga Taualoha. Sa ou manatu la, ua matua manaia le tulaga lea, ia fai ni ai, o upu ia a lo tatou atunuu, fai ni ai o le galuega tele sa faafeagai ma le tatou Komiti.

O le Komiti foi, o lauia ia o le Palemene. Lau Afioa i le Fofoga Fetalai, o lauia ia o le Palemene. O lea la ua aumai ia le latou fautuaga, i totonu o le Palemene lea ua toe aumai e toe soalaupule. Ae o lea la faatoa tau atu, o la e toaitiiti lava e le toe toatele, ona ou tu loa lea i luga, ua maua foi ma lau faaiuga. O lau faaiuga, o le lapataiga. Pau lava lea ina ia aua ne i toe faia ia ni nei tuuaiga le faavaeina.

O lau faaiuga lena o lea sa ou manatu, o le a ou tulai atu e fai, muamua, ia aloaia, fai ni ai o le Komiti, ia ona tuuavanoa loa lea i lo tatou sui usufono ia faautagia ona o lea e tuuai mai ia te au, e le o... o le iuga a le Palemene na fai i le lafo.

Lau Afioa i le Fofoga Fetalai ma le mamalu o le Palemene, ia e le o ni aga a le Palemene lenei. Ae o lea lava ua aumai lana faamavaega, ia o le a la se isi upu e toe fai? O lea ua i ai le lagona i le sui usufono, e tuuina mai i le Palemene lana faamavaega, ae aoga tele ia saunoaga ia na fai i le aso. O le

aoga mo le Palemene lenei mo le agai i le lumanai. Leaga e tautala le aso mo le aso a taeao.

Sa i ai le mataupu faapenei na tulai mai o lea ou te tau matau o le tausaga e pei lava o le 1989. A le o le 1989 po o le 1990, sa ou tutulai atu ai e fai lau tautalaga i le Palemene i le fuafuaga a le Malo e faatuina le tatou Faalapotopotoga o mea Taufale, ina ia fesoasoani ia lo tatou atunuu, fesoasoani i lo tatou atunuu ona o lo o manaomia ia se fesoasoani, ni nai nonogatupe e fau ai ia o latou fale ia ua tele nei le faalapotopotoga.

O le faalavelave sa le mafai ona faigofie ona maua ia ni a latou nonogatupe mai faletupe. Ia ona o tulaga lava ua masani ai ia lo tatou atunuu. O lea la na faatu ai ia le Faalapotopotoga lea o Mea Taufale, ae o au la lea e talanoa i le tulaga o le Tulafono, faitauga lona lua, e faatu ai le faalapotopotoga lea. Ae tutu mai loa le sui usufono o Anoamaa i Sasae, ia ma tuu sao mai lava ia te au, e pepelo uma lava na mea. Ia ona ou toe tu atu lea tali, leai e le pepelo mea ia na ou talanoa atu ai. E faatolu ona ma fetalai, ae tulai mai loa lafo loa le lafoga i le Palemia, lafoga mataga, matua mataga. Ona faatu loa lea o le lafo e Sefuiva, ou faaluaina, e alu e aumai ia ni faamaoniga, o ana lafoga mataga ia e lafo mai i le Taitai o le Maota.

E... o lea ou te taumatau e 4 aso na alu ai, ia ae sau e leai se mea. A fai loa ma le faaiuga, na faatea ai lava ma le Maota, mo masina uma ia na totoe e e pei lava e 12 ea masina, ona fai lea o le Faiga Palota. Ua i ai la mea ia na tutupu i totonu o le Palemene. E le o se mea fou, aemaise e tutupu i lou taimi, o lea ou te molimauina mea ia na tutupu i le tulaga lea i mataupu e soona lafo i totonu o le Palemene. O le tulaga lea e taua tele aemaise lava aso nei, o aso e faia ai loa se lafoga i i, alu loa i le lalolagi atoa. O lea ua faasalalau ia tatou felafolafoaiga i totonu o le Maota lenei.

Ma e o upu nei e tatou te talanoa ai, ua alu i le lalolagi atoa. O le ala la lena, e taua tele ia saunoaga a sui usufono i lenei aso lenei. E le o au e taua, e le taua lou tagata. Ua na o au o se tasi o sui usufono. Ae o le itu taua, o le mamalu o le Palemene lenei. Ia aua ne i vaai maualalo i ai se sui usufono o le Palemene lenei ma tauaifai mai i ai. E leaga e matautia mea ia faatoa ou faalogo lea i ai faapea, talu ona ou sau i le Palemene, faatoa ou faalogo lea i ni tuuaiga mataga, ma ua tau ai lava, o lo o i ai nisi sui usufono o taupulepule, e faaoo lea oti ia te ia. E leai se mea faapea, ia te au e pei e foliga mai foi lea, o lea e faatupu ni tala, e faatupu ai le alofa ma aumai se... e faatupu ai se ita i le Palemene lenei.

Lau Afioga i le Fofoga Fetalai, o le tulaga lena e taua tele ai finagalo ia sa faaalua. O finagalo ia i le matau mai a le atunuu, aua o lea e fai ia tatou saunoaga, ma fai ia tatou faaiuga i totonu o le Maota lea a e o lea foi e faamasino mai tatou e lo tatou atunuu. Pe faavae i le alofa pe faavae i le vafealoai ia... pe fai i le amiotonu. Aua e tuu loa i le amiotonu, lau Afioga i le Fofoga Fetalai, e te le toe tilotilo i le itu taumatau po o le itu agavale, ae tuu loa le Faamasinoga i le amiotonu, po o le Faamasinoga tonu, o le mea

lena e fai. E le tilotilo i le tiu taumatau po o le itu tauagavale. O lea foi e faatupu i totonu o tatou nuu. O ai lava se e faatuala i le nuu i tulaga o le faatumutumuga o sala, e oo lava i ai faaiuga a le nuu.

Lau Afioga i le Fofoga Fetalai o le tulaga lena. Ae o lea foi e i ai le fetalai ma le feavatai i totonu o le Maota lenei, tatou tu ma tatou aga i le avafatafata. A tatou tilotilo i mea la e fai i fafo i isi Palemene, e oo lava ina fetai i totonu e tau i totonu o le Palemene. Ae o le a le mea lea e fai? O le ava, o le ava lava lea e fai ai, feavatai. O tu ma aga ia a Samoa. E tiga lava ona luga lalo, ae matua lava i le oo. O upu ia e le mili faauuina ia upu pe a oo ina talanoa i totonu o le Maota lenei. Ae o le iuga lava na o mea uma lau Afioga i le Fofoga Fetalai, e matua i le oo, o le faamagalo.

O le tulaga lena o lea sa ou... o lea ou te vaai atu o lea ua toeitiiti lava uma, ona ou tulai loa lea e tusa ai o le tofamamao lea na tatala mai. Ma ou manatu ai, manaia tele lava ia le lafo lea sa faatu. Ua lava sina lapataiga, e fai ni ai o le Komiti lenei. O upu na a lo tatou atunuu. E tele le taimi na alu a le Komiti, e fai ai ia latou suesuega. E le na o le tasi foi e lua Komiti. Fai ai le suesuega lea. Leaga e faigata le mamalu o le Palemene ma le faatonuga na avatu.

Lau Afioga i le Fofoga Fetalai, o le tulaga lena, ae ua leai nei se aoga. Ua leai se aoga o lea ua masaa le ipuvai, o lea lava ua aumai le faamavaega a le sui usufono. Ma e o lea foi la o le a ou toe talanoa atu i le tulaga lenei, e leai se mataupu o va ai au ma le afioga i le sui usufono.

O le sui usufono o le matai o le nuu nei, o le Tupua, e pola puipui e tausi vaatele Fatialofa ma Auelua. O au na ou faapaiaina lana nofo. E taua tele ia te au le mea lea. Ae e le mafai ona aumaia tulaga ia, ia le maua faavaifalevea, i totonu o upu a Lepa.

Lau Afioga i le Fofoga Fetalai o le taua lena. O le a le mea e taua ai ia te au le tama lea? Sa Fofoga Fetalai, filifili e le Vaega lenei, ave i ai le faatuatuaga, ona uma lea, ou toe filifiliina e ave ma Minisita o lau Kapeneta. Ina ua tupu le fetai ma le afioga ia Peseta, na ma talanoa ai, o upu nei o upu sao, ae ou faalogo atu, ua teena foi. O upu lava i lo maua va o au o le Palemia ma Minisita o le Kapeneta, a oo taeao ona aumai lea o lau faamavaega. Ae fai mai o le a faamavae mai i le Kapeneta ma le tofi sui usufono. Ona o lau tala lava lenei, aua, e leiloa pe e te laki i i Faamasinoga ia. Ia o lea ua laki.

Lau Afioga i le Fofoga Fetalai, ia ae o lea foi ua toe faatino ia lana faamavaega i le aso. E le o se faaiuga la a se isi, ae o le faaiuga saoloto lava a le afioga i le sui usufono. Ae semeamanu lava, ua leva e le o toe ave ma sui usufono o le Maota lenei pe ana ou tuuulafo, e pei ona tuuulafo mai, oi e pei ona le tuuulafo mai i lau fautuaga. E oo mai nei foi o lea foi e teena na mea ou te le i fai atu ai.

Lau Afioga i le Fofoga Fetalai, masalo o upu a le atunuu, ua tautuauega se upu. Sa ou faatalitali leaga e i ai lava ia le tatou ava o lea ua uma ona

tutulai ae, e le o toe tele ni sui usufono e saunoa uma le tatou mataupu, ona ou tulai atu lea e taoto le lafo e pei ona saunoa i ai le Sui Palemia. Manaia ia o le lafo, o le lafo o lea ua tu i le va. O lea ua fai ia ai o le tatou Komiti. Ae o lea foi ua i ai le puipuiga, masalo o le mea e pito sili lea ona mama, nai lo o isi lafo ia na faatulai mai.

Lau Afioga i le Fofoga Fetalai, ia faamalulu atu i le Maota e leai se mea o va ai au ma le uso, le Afioga ia Tupua. Ma o lo o matau uma mai lava e lo tatou atunuu. Aisea? Leaga o tatou talanoaga ia e fai, o la e silasila mai ia lo tatou atunuu. O le ala lena o lau upu, e mafai lava, ese ia tatou faamatalaga i fafo, ae e le mafai ona le silafia e le atunuu o lo o faafogafoga mai, i a tatou felafolafoaiga. Ma o lo o mau foi i faamaumauga a le Palemene lenei.

Ia malilie lau Afioga i le Fofoga Fetalai, ia faapea foi ia le Maota. Faamalie foi i le faafogafoga mai a Samoa, e le o se tatou faaiuga lea. Ua maua ai le iuga o le aso, o le finagalo lava o le sui usufono, e mafua ai ia le tatou faaiuga ua taunuu i ai. Ia atonu e le o le faaiuga ia o mea, e oso pea le la. Lau Afioga i le Fofoga Fetalai, tatou tuu i le Atua o le Atua e aumaia le faamafanafanaga i le tatou uso sa tatou galulue faatasi i totonu o le Palemene lenei. Tatou faamagalalo foi i lo tatou uso, ia ma le tatalo, faamagalalo mai foi ia i ai tatou, ae o le agaga lau Afioga i le Fofoga Fetalai, ia tumau le mamalu o le Palemene lenei, nei ma elua. Ia, soifua ma ia manuia.

**FOFOGA FETALAI:** Malo faafetai, ia ua...

**Afioga Afioga Amituanai Mauli (Palauli Sisifo):** Lau Afioga i le Fofoga Fetalai...

**FOFOGA FETALAI:** Ia ua maea, faamalie atu i le sui usufono mamalu, alala mai i lalo. Ia ae ou te faamalie atu ma faamolemole atu i sui usufono mamalu o lo o tutulai mai, o lea ua malele ia le afioga i le Palemia, i le mataupu sa faapena ona tuuina atu i le Palemene, e saunoa tai 10 minute, e tusa ai o lipoti a le Komiti o Tulaga Aloaia ma Amio Taualoa.

Ia o lea ua alu alu suataga o le vaatele, ia o lea ua tulai mai ia le Palemia, e faatu le lafo e lagolago i le finagalo e pei ona faatuina mai e le Afioga i le Sui Palemia, ia ma ua faapena foi ona faaluaina e nisi o Afioga i Minisita o le Kapeneta. Ia ae o lo o i ai foi isi lafo o lo o faapena ona faatuina mai ma ua faaluaina, e i ai le manatu o le a tuu atu le fesili i le lafo, aua o le lafo lea ua faatu mai e le Palemia e lagolago e pei e mafuli i ai finagalo o le Maota.

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr SAILELE MALIELEGAOI:** Lau Afioga i le Fofoga Fetalai, e i ai le mataupu lea e tusa ai ma le Vaega 46 o le Faavae, (2b). O lo o faatulai mai i totonu o le

Faavae, ina ia tapa ma faatino le faamavaega a le sui usufono tusitusia ma agai sao mai i lau Afioga i le Fofoga Fetalai.

**FOFOGA FETALAI:** Ia, malo faafetai. Ia e talu ai ona o le mataupu o lea sa i lumamea, e i ai le manatu ona o lea ua faaali le finagalo o le Palemene, ia ma faatuina mai le lafo lea, talu ai ona o le galuega o le Lipoti a le Komiti, ia fai ni ai o le Lipoti a le Komiti ua gasea ua faapena ona latou feagai ma galueina. Ia o le mataupu lava o le faaiuga lava i le tulaga o le tatou felafolafoaiga. O se taimi ona avatu lea o se manatu o le Nofoa i le tulaga e pei ona faatuina mai e le Afioga i le Palemia.

O le lafo e pei ona lagolagoina, ua faamaonia le Lipoti a le Komiti i le Tulafono o Tulaga Aloaia ma Amio Taualoa e faatatau i le mataupu o le sui usufono mo Gagaifomauga Nu.3. Ma ia tuu ia te ia lapataiga malolosi, ina ia tausia lea faia o faamatalaga moni i totonu o le Palemene ma ia tausia amioga taualoa.

Ia ua na ona... e i ai le manatu e faamau ia le tulaga o le iugafono e tusa ai i fesiligia i le lumanai, ae o lea ua faatino ia le tulaga o le galuega o le iugafono a le Palemene e tusa ai ma le tuuina mai o le Lipoti e le faigofie ia le Lipoti a le Komiti.

Ia ae... o lea ua..

**Afioga Hon Fiamē Naomi Mataafa:** Lau Afioga i le Fofoga Fetalai...

**FOFOGA FETALAI:** Tulai mai le Sui Palemia, e i ai se mea ua....

**Afioga Hon Fiamē Naomi Mataafa:** Ioe lau Afioga i le Fofoga Fetalai. Ma e faafetai i le saunoaga a le Taitai o le Malo, amanaia foi ia se lafo toe teuteu na tuuina atu.

Ae o tatou o tagata fai Tulafono ma e pulea foi tatou i ala o mea. E pei o le auala foi lena sa faatu atu ai le lafo e faavae ai se finagalo o le Maota. O lo o faafesili lou mafaufau, ona o lea e manino i a tatou faamaumauga, o lea ua faamavae mai ia le Afioga ia Laauli. E faamavae mai ae e le i iu le tatou mataupu lena. Ma e ou te fesili atu pea foi lea ona o lea ua le tonu i lou mafaufau, po o le a la le uiga o se tatou faaiuga e fai, ae o lea ua le toe i ai le tagata lea? Ia po o lea o lo o i ai ia le Failautusi o le Fono, o lau Afioga foi po o le a so outou malamalama i nei auala, ia vagana ai pei o lea ua toe tau maua atu i le saunoaga a le Palemia, e ao ona aumai ia le faamavaega tusitusia. Ae tau lava i le puipuiga o tatou, aua ne i atagia foi lea e tatou te talanoa i le mamalu, o le mamalu foi o le uia o ala o mea.

Ae e pei e na o le pau lea o se faafesili atu i lau Afioga i le tulaga lea.

**FOFOGA FETALAI:** Malo faafetai. Ua i ai le manatu o le Nofoa, e tulai ma faamavae mai le sui usufono o Gagaifomauga Nu.3. o lo o faapena ona

lamalama faaiu le faaiuga a le Palemene i a latou felafolafoaiga. Ia ona o le mataupu lava latou o lea ua tuuina mai ia le Lipoti a le Komiti, ia o lea foi e tataua ona fai i ai se faaiuga a le Palemene e tusa ai o le Komiti sa outou filifiliina e galulue i le tulaga o le mataupu. O lea sa aomasui i ai ia le Komiti.

O le mea la lea o lea ua fai le faaiuga, ina ia fai se lapataiga, ina ia faamau ai, o le faaiuga lena o lea ua tatou faia mo taeao ma e lua, pe a toe tulai mai se mataupu faapea.

**FOFOGA FETALAI:** Ae o lea ua faatulai mai e le Palemia le lafo, ina ia ou tapa le faamavaega tusinga a le Sui Usufono mo Gagaifomauga Nu.3.

*Faaluaina e le Minisita mo Pisinisi, Alamanuia ma Leipa ma le Minisita mo Tina & Tamaitai, Atinae o Nuu ma Afioga ma Agafesootai.*

**FOFOGA FETALAI:** Ina ia tapa e le Fofoga Fetalai faamavaega tusinga a le Afioga i le Sui Usufono o Gagaifomauga Nu.3.

*Na faamaonia le lafo.*

**FOFOGA FETALAI:** Ia, masalo lau Afioga i le Palemia mo se lafo mo le tolopoina o le tatou mataupu ma se aso e tolopo i ai.

### **LAFO MO LE TOLOPOINA.**

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr SAILELE MALIELEGAOI:** Lau Afioga i le Fofoga Fetalai, talu ai ona o lo o i ai...

*Ina ia tolopoina nei Taulumaga o le Fono Aoa o le Aso Lua, 18 o Aokuso 2020 e pei ona i ai i le kalena o le aso Fono a le Palemene.*

*Faaluaina e le Sui Palemia, Minisita o Pisinisi, Alamanuia ma Leipa ma le Minisita o Tina & Tamaitai, Atinae o Nuu ma Afioga ma Agafesootai.*

**FOFOGA FETALAI:** Malo faafetai, malo le galulue i lena aso. Ua leva ona faaaaogagase le Palemene mai lena vaiaso e lua ua tuanai, tolu i lena vaiaso, ia o uiga lava nei o galuega faaPalemene a oo lava i le taimi e mamafa ai galuega, ia e faapena ona tatou alu i le ao alu i le po. Ia e fua lava i ai le malosi.

Ia e manatua a misi le faanoi sosoo i le Fofoga Fetalai i aso e tolu, ia e tasi lena avanoa e faaavanoaina ai lou nofoa. Ua na ona faamanatu atu leaga e i ai isi sui usufono e pei ua faataelega i vai foi lea a fia nofo lava ia nofo. Ia ae faamanatu atu, leai e tatau ona e... a e tuatuagia, logo mai ia le Failautusi ia po o le Fofoga Fetalai ia ma tulaga masani ia aua ia le Fonotaga.

Ia ae avea foi lenei avanoa, ia ou te faamalulu atu foi i outou finagalo, o le a foi se upu ua faapena ua le tautamalii pe ua faamanua ai se finagalo, sa taumafai atu ai le Nofoa i le faagasologa o a tatou galuega, e i ai le manatu e leai se isi e atoatoa ia ona faiva. Ia ae faamagalo le auauna, ia ae tuli i luma ia so tatou ai.

Ae e tatou te le i tolopo, o le a ou faaiuina ia le tatou Fonotaga i se tatalo.

*Na tolopo Taualumaga a le Fono Aoao Faitulafono i le itula e 2:12 i le aoauli seia aulia le itula e 9:00 i le taeao o le Aso Lua 18 Aokuso 2020 e tusa ai ma Polokalame o Fonotaga a le Palemene 2020/2021.*